

Tuhun vaha nacyhyí Juan sahá ña nacaja Jesucristo

Jesucristo cúu á tuhun Ndióxi ta nanduu a ñayivi

1 Tánacava sáhá saha ñuyívi sa íin va mé á naní tuhun Ndióxi. Nasahiin mé á xihín Ndióxi ta in cúu mé á xihín Ndióxi. ²Ta janda mé saha sa íin va xihín Ndióxi. ³Ta mé a cán cúu á Jesucristo ta nacaja Ndióxi ña nacavaha mé á tóco ndihi ñaha. Ta ni in túhún toho ñaha íin, a cóo tá ná cávaha mé á ña, nduu. ⁴Ta mé á quéa cája ña ná catacu tóco ndihi ñaha ta mé á jándiyéhe a ínima ñayivi já ná ndicuni na yo cúu mé á. ⁵Mé Jesucristo cúu á tátuhun in núhu cáyi ña jándiyéhe a xoo naá ta a cuú ndahva ña.

⁶Ta ndaja coo nachindahá Ndióxi in dataa naní Juan. ⁷Naquixi da caxi tuhun da xihín ñayivi ña cúu Jesucristo ña jándiyéhe ínima ñayivi, na ndúu nuú naá já ná cuu candúsa na mé á sahá ña nacahan da. ⁸Mé Juan yóho co cúu dá mé á jándiyéhe ínima ñayivi. Naquixi cuití da caxi tuhun da xihín ñayivi ña mé Jesucristo quéa jándiyéhe ínima ñayivi. ⁹Mé Jesucristo naxinu a ñuyívi yóho ta cúu ndusa mé a ña jándiyéhe ínima tóco ndihi ñayivi.

¹⁰Naquixi mé a naní tuhun Ndióxi ta nasahiin a ñuyívi yóho. Ta xihín ña nacaja Jesucristo nacavaha Ndióxi ñuyívi. Joo ñayivi ndúu ñuyívi yóho coo naxeen na canda ini na yo cúu mé á. ¹¹Naquixi Jesucristo ñuyívi ña nacavaha mé á joo na ñuu mé á coo naxeen toho na ndiquehe vaha na mé á. ¹²Joo ndá na ná ndiquehe vaha mé á ta candeé ini na mé á já quéa sahan mé á ñamaní nu ná ña ná nduu na na cúu cuénta Ndióxi. ¹³Ta na cán cúu na nanduu jahyi mé á. Ta co cúu á sahá ña nacacu na ñuyívi yóho ta ni co cúu á sahá ña cúní in taa cacu in jahyi da. Nanduu na jahyi mé á jáchi já nasacu ini mé á coo.

¹⁴Mé Jesucristo, mé a naní tuhun Ndióxi cán nanduu a in taa ta naquixi a nasahiin a tañu nde. Ta tóco ndihi ña nasacaja mé á nasacuu a ña ndaa. Ta a juú quiahva quíhvi ini a ñayivi. Ta naxini nde ndá quiahva cáhnu cúu mé á jáchi sahá ña cúu mé á in túhún jiní já jahyi Ndióxi sahá ña cán quéa

nacaja Ndióxi ña ná ndicáhnu ndivaha mé á. ¹⁵Tá nandicani mé Juan sahá Jesús nuú ñayivi já nacachi da já saha mé á:

—Mé a yóho cúú á ña nacahan i sahá nu ndo tá nacachi i xihin ndo ña vaxi inga a jatá yehe. Ta nacachi i xihin ndo ña íin chága saha mé a cán a juú ga yehe jáchi janda tá cámaní yí cacu u sa íin va mé á —nacachi Juan.

¹⁶Ta sahá ña íin ndivaha ñamaní nu mé á sahá ña cán quéa a juú quiahva ñehe táhvi tóco ndihí nu mé á. ¹⁷Nacahyí Moisés ley Ndióxi sanahá. Joo Jesucristo, mé á cúú á ña ndaa naquixi a ñuyíví yóho sahá ña quíhvi ndivaha ini a mí. ¹⁸Ta ni in túhún toho ñayivi coó naxini na Ndióxi. In túhún Jesucristo, mé á cúú in túhún jini já jahyi Ndióxi, mé a cán quéa xini ndá quiahva íin Ndióxi jáchi in cúú á xihin á ta mé a quéa nanaha ña yóho nu yo.

Ndicani Juan nuú ñayivi yo cúú Jesús

(Mt. 3:11-12; Mr. 1:7-8; Lc. 3:15-17)

¹⁹Ta ndaja coo java na sacuahá nuú na Israel, na ndúu ñuu Jerusalén cán nachindahá na java jutú xihin java na naquixi chichi Leví nu íin Juan ña ná ndaca tuhún na da á cúú dá da nasahan Ndióxi tuhun a chindahá a ñuyíví. ²⁰Ta cáxi táhyí nacahan Juan xihin ná ña co cúú dá da cán ta já nacachi da já:

—A juú toho yehe cúú da nacachi Ndióxi chindahá a cacomí cuénta sahá ñayivi —nacachi Juan.

²¹Anda já ndaca tuhún tucu na da já nacachi na já xihin dá:

—Yo já cúú yóhó, dá já. Á a juú yóhó cúú profeta Elías —nacachi na.

—A juú toho yehe cúú profeta Elías —nacachi Juan.

Anda já nacachi tucu na já xihin dá:

—Á a juú toho yóhó cúú profeta da nacachi Ndióxi chindahá a, dá já —nacachi na.

Joo nanducú ñehe Juan tuhun nu ná já nacachi da já xihin ná:

—Ni in túhún toho da cáchi ndó jan co cúú yehe.

²²Anda já nacachi tucu na já xihin dá:

—Ndítahan ndicani lohún nuú nde yo cúú yóhó. Jáchi java na nachindahá na ndehe ña ná quixi nde ndaca tuhún nde yohó. Ta tá co cúnun caxi tuhún xihin nde yo cúú yóhó, ndá cuhun nde quehe nde tuhun nducú ñehe nde nuú na nachindahá ndehe cán —nacachi na.

²³Anda já nacachi Juan já xihin ná:

—Yehe cúú da xíca nuu tañu yucú íchí ta cáyuhú cóhó i já cáchí i já xihin ñayivi: “Cuná ndó in íchi ndacú nu mé á ña ná ndihvi a ínima ndo” —nacachi Juan xihin ná tá quiahva nacahyí profeta Isaías sanahá.

²⁴Ta na nandaca tuhún Juan cán nasahan na jáchi já natahnda chuun nacaja na fariseo, mé na sáhdá chuun ñuu Jerusalén cán. ²⁵Já nacachi tucu na já xihín Juan:

—Ndá cuéntá quéa cája nduta yóhó ñayivi tá ta co cúun Cristo, da nachindahá Ndióxi cacomí cuéntá sahá ñayivi. Ta ndá cuéntá quéa jácandútun ñayivi tá ta ni co cúun Elías ta ni co cúun mé profeta, da nacachi Ndióxi chindahá a —nacachi na cán.

²⁶Anda já nacachi Juan já xihín ná:

—Yehe cája ndutá i ñayivi xihín ticuí joo tañu mé ndó íin in da co xini ndo. ²⁷Ta vaxi in da jatá yehe ta íin cuaha chága saha dá a juú ga yehe. Ta chí ni coó sahá i ndaxí i correa ndusa dá —nacachi Juan xihín na nasahan ndaca tuhún ñahá cán.

²⁸Tócó ndihi ña yóho nayaha chí ñuu Betábara ña ndacaan inga xoo yuta Jordán nuú nacaja nduta Juan ñayivi.

Jesús cúu á tátuhun in ndicachi rí jóco na nu Ndióxi

²⁹Ta inga quiví itaan já naxini Juan cáyati Jesús vaxi a nu íin da. Já nacachi Juan já xihín ñayivi ndúu cán:

—Candehé ndo. Da vaxi jan cúu dá tátuhun ndicachi jóco na nu Ndióxi. Ta da jan cúu da jándoo cuachi ñayivi ndúu ñuyiví. ³⁰Da jan cúu da cáchí i saha ña vaxi in da jatá yehe ta íin cuaha chága saha dá a juú ga yehe. Jáchi janda tá cámaní cacu yehe sa íin va mé da jan. ³¹Ta ni mí i coó naxini i ndá quiahva cáa da joo nacasáhá i jácandutá i ñayivi xihín ticuí já ná canda ini na Israel yo cúu mé dá —nacachi Juan.

³²Ta nandicani da ña naxini da já nacachi da já:

—Sa xini xihín nuu mí i ndá quiahva nanuu ínima yii Ndióxi jatá Jesús. Mé ínima yii Ndióxi cán nanuu a indiví ta cáa tá quiahva cáa in ndijata.

³³Mé a ndaa coó naxini toho yehe yo cúu mé da yóho, nduu. Joo Ndióxi, mé a nachindahá yehe jácandutá i ñayivi xihín ticuí, mé a cán quéa nacachi já xihín i: “Ndá da ná cunún ná nuu ínima yii mí i ta sacoo a jata dá, da cán cúu da jándicutú ini ñayivi xihín ínima yii mí i”, nacachi Ndióxi xihín i. ³⁴Ta viti mé a ndaa sa xini vi yo cúu mé á ta cáxi tuhun i xihín ndo ña mé á cúu á in túhún jini já jahyi Ndióxi —nacachi Juan.

Tá nacasáhá java ñayivi ndíco na Jesús xica na xihín á

³⁵Ta inga quiví itaan nasahiin tucu Juan cán xihín ivi na xica xihín dá.

³⁶Já naxini da ña yáha Jesús cuahan já nacachi Juan já xihín na xica xihín dá cán:

—Candehé ndo. Da jan cúu tátuhun ndicachi, rí jóco na nu Ndióxi —nacachi Juan.

³⁷Tá naxini johō dā ndíta xihín dā cán ña yóho já ndíco dā jatá Jesús cuahān dā. ³⁸Tá naxini Jesús ña ndíco dā cán jatá já nandicoto nihni a nū dá já nācachi a xihín ndíví dā cán já:

—Ndía cúní ndo —nācachi a.

Já nācachi dā cán já xihín á:

—Maestro, ndájá íin vehe ndó já —nācachi da.

³⁹Anda já nanducú ñehe Jesús tūhun nū dá já nācachi a já:

—Cóho ná cuni ndó, dá já —nācachi a.

Já ndáca táhan da nāsaḥān dā xihín á sándehé dā nū íin a. Ta nāsacuu a tátūhun cāa comí saḥini já nāsanduu dā xihín á.

⁴⁰In táhan da naxini johō ña nācachi Juan ta ndíco dā jatá Jesús cán naní dā Andrés, dā cúú ñani Simón, dā cáḥān nā Pedro xihín cán. ⁴¹Mé Andrés yóho ndáva da nāsaḥān dā ndínducú dā ñani da, dā naní Simón cán. Ta tá nandīñeḥe ñahá dā já nācachi dā já xihín dá:

—Nanditahan nde dā nāchindahá Ndióxi cacomí cuéntá saḥá ñayivi, mé a cúú Cristo —nācachi da.

⁴²Tá nandihi já ndáca Andrés cán ñani da nāsaḥān dā nū Jesús. Ta tá naxini Jesús dā já nācachi a já xihín dá:

—Yóhó cúún Simón, jahyi Jonás. Joo yeḥe chinúu i quivun cananún Cefas viti —nācachi Jesús.

Quivi Cefas yóho in cúú va xihín Pedro ta cúní cachi a in tóto.

Cána Jesús Felipe xihín Natanael ña ná caca tuun da xihín á

⁴³Ta inga quiví itaan já naquee Jesús cuahān chí estado Galilea. Ta cán nanditahan mé á dā naní Felipe já nācachi a já xihín dá:

—Naha quíi caca tuún xihín i —nācachi a xihín dá.

⁴⁴Mé Felipe yóho cúú dá dā ñuu Betsaida ta mé ñuu cán cúú ri ñuu Andrés xihín Pedro. ⁴⁵Ta ndaja coo Felipe yóho ndáva da nāsaḥān dā nandínducú dā Natanael ta tá nandīñeḥe ñahá dā já nācachi dā já xihín dá:

—Nanditahan nde dā nācahyí Moisés saḥa nū ley sanahá. Ta jári nā profeta nācahyí ri na saḥa dá. Ta mé dá cúú Jesús, jahyi José, dā ñuu Nazaret —nācachi Felipe xihín Natanael cán.

⁴⁶Anda já nācachi Natanael já:

—Ndá quehe ri ñaha vaha quixi chí ñuu Nazaret jan —nācachi da.

Anda já nācachi Felipe já xihín dá:

—Cóho candehún —nācachi da.

Anda já naquee da cuahān dā nū íin Jesús.

⁴⁷Ta tá naxini Jesús nācayati Natanael nū á já nācachi a já:

—Dā yóho cúú ndusa in dā nāquixi chichi Israel ta cúú dá taa cája ña ndaa cuití va —nācachi Jesús.

⁴⁸Tá naxini johoh Natanael ña yóho já nandaca tuhún da Jesús já nacachi da já xihin á:

—Á xini ndó yehe, vaha.

Anda já nacachi Jesús já xihin dá:

—Janda tá cámaní quee Felipe cuhun da cana da yohó já naxini i íin coún saha titó ñuhú —nacachi Jesús xihin Natanael.

⁴⁹Anda já nacasáhá cáchí da já xihin Jesús:

—Maestro, jivi ndusa cúu ndó in tuhún jini já jahyi Ndióxi ta cúu ndó ña cómi cuénta sahá ñayivi Israel —nacachi da xihin Jesús.

⁵⁰Anda já nanducú ñehe Jesús tuhun nu dá já nacachi a já:

—Nacandúsun yehe sahá ña nacachi i xuhun ña naxini i íin coún saha titó ñuhú. Joo náhnu chága ñaha cunún xihin nduchú núún caja i —nacachi Jesús xihin dá.

⁵¹Anda já nacachi tucu Jesús já:

—Mé a ndaa ná cahan i xihin ndo ña cuni ndó xihin nuu ndó ña nuná indiví. Ta cuni ndó táto Ndióxi ndaa na ta nuu na xinu na nu íin yehe, da nachindahá Ndióxi nduu ñayivi —nacachi Jesús.

Tá nasahan Jesús in vicó tándaha

2 Tánayaha uni quivi já nasahin in vicó tándaha ñuu Caná ña ndacaan estado Galilea cán. Ta nasahan María, náná Jesús mé víco cán. ²Ta jári nacana na Jesús xihin na xica tuun xihin á ta chí nasahan ndihi na mé víco cán. ³Joo ndaja coo nani cúu víco cán nandihí va vino xíhi na. Ta tá naxini náná Jesús ña yóho já nacachi ñá já xihin Jesús:

—Sa nandihí va vino xíhi na —nacachi ñá xihin á.

⁴Já nacachi Jesús já xihin ñá:

—Co xini ñuhú toho cahan ndó já xihin i jáchi cámaní yii va ndindaa hora caja i ñaha xituhún —nacachi Jesús xihin ña.

⁵Tá nandihí já nacachi náná Jesús já xihin na jácaca vino cán:

—Ndá ñaha ná cahnda Jesús nu ndó caja ndó, caja ndó ña —nacachi ñá xihin ná.

⁶Ta mé vehe nu cúu víco cán nasahin inu yoo náhnu ña nacavaha na xihin yuu. Mé yoo cán nasacuu a nu táan na Israel cán ticuí, dó ndája vii na mé ná tá quiahva sáhdá ley nu ná caja na. Ta tátuhun comi jícó á in ciento litro ticuí queta ini in in yoo náhnu cán. ⁷Tá nandihí já nacachi Jesús já xihin na jácaca vino cán:

—Jacutú ndihí ndó yoo náhnu jan xihin ticuí.

Ta chí najacutú jini ndaa na yoo náhnu cán xihin ticuí. ⁸Tá nandihí já nacachi tucu Jesús já xihin ná:

—Ta viti tavá loho ndó do ta quiahva ndó do ná coto ndojó da cómi chuun saha víco yóho —nacachi Jesús.

Já ñehe na do nasahan na nuú da cómi chuun saha víco cán. ⁹Joo sa nacaja Jesús ña ná nduu ticuií cán vino. Ta naxito ndojó da do joo co xini da ndájá naquixi dó. In túhún na xini cúu na naxini ña nandaja Jesús cán ticuií ña ná nduu dó vino. Tá naxito ndojó mé da cómi chuun yóho do já nacatontó da ta nacana da mé da tándaha cán. ¹⁰Já nacachi da já xihin dá:

—Ndijáá ñayivi tá cája na in víco já sahan na vino vaha nu cuítí nuú na táhan cán. Ta tá sa naxihi cuahá na já sahan na dó núu cán. Joo yóho nasacu vahún vino vaha ta ja víti sáhún do nuú na táca víco —nacachi da.

¹¹Ña xitúhún yóho nacaja Jesús ñuu Caná cuénta estado Galilea nasacuu a ña xitúhún nu cuítí nacaja Jesús já ná cuni ñayivi ndá quiahva cáhnu cúu mé á. Ta xihin ña yóho nacandee ini na xica tuun xihin a cán mé á.

¹²Tá sa nayaha ña yóho já naquee a cuahan xihin na xica tuun xihin á chí ñuu Capernaum. Ta ndáca táhan náná a xihin ñani a ndíco na cuahan na xihin á. Ta nasanduu na ñuu Capernaum cán chá quivi cuítí va.

Tává Jesús na ndúu jícó veñuhu cáhnu ñuu Jerusalén

(Mt. 21:12-13; Mr. 11:15-18; Lc. 19:45-46)

¹³Tá nacayati quiví caja na Israel víco pascua já naquee Jesús nasahan chí ñuu Jerusalén. ¹⁴Ta tá naxinu coo a veñuhu cáhnu ndácaan Jerusalén cán já naxini a ña jandá johu ndúu na jícó. Java na jícó tindiqui xihin ndicachi xihin ndijata viti ta java na ndúu coo ndíjama jiuhún. ¹⁵Ta chí natiin Jesús yóho ta nacavaha in churrú xihin á já nacasáhá táxí ndihi a na ndúu jícó cán. Ta janda tindiqui xihin ndicachi jana ná natavá a ri quee rí cuhun ri. Ta já naxinu coo a nu ndúu na ndíjama jiuhún cán já naxicó ñehe a mesa na já nacuyu ndihi jiuhún na nu ñúhu. ¹⁶Ta nasahnda a chuun nuú na jícó ndijata cán já nacachi a já:

—Tavá ndihi ndó ña jícó ndó jan. A cája ndó xihin vehe tátá i ña cúu á nu cáyahvi ñaha —nacachi Jesús xihin ná.

¹⁷Tá nandihí já nandicuhun ini na xica tuun xihin Jesús cán ña cáchí tuhun Ndióxi. Já cáchí a já: “A juú quiahva xójo ini i sahá ña co cája cáhnu ñayivi vehe Ndióxi”, cáchí tuhun Ndióxi.

¹⁸Tá naxini na Israel cán ña nacaja Jesús ña yóho já nandaca tuhún na mé á já nacachi na já xihin á:

—Xini ñúhú cajún in ñaha xitúhún já ná cuni nde ña mé a ndaa íin sahún tasún na ndúu jícó veñuhu yóho —nacachi na xihin Jesús.

¹⁹Anda já nanducú ñehe Jesús tuhun nu ná já nacachi a já xihin ná:

—Tá ná jánditani ndó veñuhu yóho ta tixi uni quivi já jácandichi tucu u ña —nacachi Jesús xihin ná.

²⁰Anda já nacachi na Israel cán já xihín á:

—Cō cándúsa nde ña cáchún jáchi nacaja chúun na ivi jico iñu cuiá já naxinu veñuhu jan. Ta yóhó cáchún ña tixi uni víxí quivi jácandichi tucún ña, vaha —nacachi na cán xihín Jesús.

²¹Joo cō cáhan toho Jesús sahá veñuhu cáhnu cán jáchi cáhan mé á sahá yiquí cuñu a. ²²Ña cán quéa tá naxihi Jesús ta nanditacu tucu a tixi uni quivi já nandicuhun ini na xica tuun xihín á cán sahá tuhun nacahan mé á nuú na Israel yóho. Ta chí nacandúsa na tuhun Ndióxi ta nacandúsa na tóco ndihi ña nacahan Jesús xihín ná.

Sa xini va Jesús ínimā ñayivi

²³Cuahá ñayivi ñuu Jerusalén cán nacandúsa na Jesús nani nasahiin a víco pascua cán sahá ña náhnu xihín ña xitúhún nacaja nu ná. ²⁴Vatí nacachi na cándúsa na mé á joo cō nacandúsa toho Jesús na jáchi xini vaha mé á ndá ínimā ñéhe in in na cán. ²⁵Ta cō xini ñuhú toho a ña caxi tuhun na xihín á ndá quiahva íin in in ñayivi jáchi sa xini ndihi va mé á ínimā ná.

Ndítuhún Nicodemo xihín Jesús

3 Nasahiin in da xica cuénta na fariseo naní Nicodemo ta cúu dá da sacuahā nuú na Israel cán. ²Ta ñuú naqueta da cuahan da coto nihni da Jesús. Ta tá naxinu cō da nu á já nacachi da já xihín á:

—Maestro, cándaā caxí ini nde ña nachindahá Ndióxi ndohó vaxi ndó nuú nde ña ná jánahā ndó nuú nde. Jáchi ni in túhún toho ñayivi a cúu caja ña náhnu cája mé ndó tá ta cō íin Ndióxi xihín ná —nacachi da xihín Jesús.

³Anda já nanducú ñéhe Jesús tuhun nu dá já nacachi a já:

—Mé a ndaa ná cahan i xihín ndo ña ni in túhún ñayivi a cúu cacomí Ndióxi cuénta saha tá ná a ndícó cō tucu na cacu tucu na —nacachi a.

⁴Anda já nandaca tuhún Nicodemo Jesús já nacachi da:

—Ndá quiahva cuu cacu tucu na tá sa nacayatá na. Ama ná ndihvi tucu na tixi náná na já cacu tucu na —nacachi Nicodemo xihín Jesús.

⁵Anda já nacachi tucu Jesús já xihín dá:

—Cáhan i ña ndaa xihín ndo. Tá nacandúta ñayivi xihín ticuií ta tá nandicutú ndaa ínimā ná xihín ínimā yii Ndióxi já cúu á tátuhun cacu tucu na ta anda já cuu cacomí Ndióxi cuénta saha ná. ⁶Jáchi ñuyiví yóho cacu jahyi ñayivi ta sa já ñayivi cúu va na. Joo na jándicutú Ndióxi xihín ínimā yii mé á, na cán cúu jahyi mé á. ⁷Ta cō ndítahan catóntó ndó tá cáchí i xihín ndó ña ndítahan cacu tucu ndihi ñayivi já ná cacomí Ndióxi cuénta saha ná. ⁸Jáchi cúu á tátuhun tá xícó tachi ndá xoo cúni mé á. Vatí xini

joho í xícó tachi joo co xini yo ndá xoo quíxi a ta co xini yo ndá xoo cuahan. Quiahva já iin ínima yii Ndióxi jáchi vatí co xini ñayivi mé á joo xini na ndá quiahva cája mé á tá ñúhu a ini na —ñacachi Jesús xihín Nicodemo.

⁹Tá nandihí já ñacachi Nicodemo já xihín Jesús:

—Co cándaa toho ini i ña cáchí ndo xihín i —ñacachi da.

¹⁰Anda já ñacachi Jesús já xihín dá:

—Cúú ndó da jánaḥa nuú ñayivi Israel ta ndítahan cándaa ini ndó ña yóho, nduu jáchi cúú ndó maestro cáhnu nu ná. ¹¹Mé a ndaa ná caḥan i xihín ndo. Cáḥan nde saḥá ña cándaa ini nde ta saḥá ña naḥini nde xihín nuú nde joo ndóhó co cándúsa ndó ña cáḥan nde xihín ndo. ¹²Cáḥan i saḥá ñaha ñuyíví yóho xihín ndo ta co cándúsa ndó ña. Ndaja ga ví caja ndó tá ná caḥan i saḥá ñaha iin indiví.

¹³Ni in túhún toho ñayivi a ñaha ndaa cuḥun chí indiví. In túhún da ndaa indiví cúú da nanuu, da naquixi ñuyíví yóho. Ta da cán cúú yeḥe, da nachindahá Ndióxi nduu ñayivi. ¹⁴Sanahá ndivaha ñacata caa Moisés in coo, rí ñacavaha xihín caa nu yító yucú íchí. Quiahva já cata caa ri na yeḥe, da nachindahá Ndióxi nduu ñayivi ndica crúxu ¹⁵já quéa ná cacu ndaa ínima ñayivi já ná a cuḥun na indayá tá ná candeé ini na yeḥe. Ta xihín ña yóho catacu na anda ama cáa quívi.

Quíhvi ndivaha ini Ndióxi ñayivi ndúu ñuyíví

¹⁶Jáchi saḥa ña naquihvi ndivaha ini Ndióxi ñayivi ndúu ñuyíví saḥá ña cán quéa nachindahá mé á in túhún jini já jahyi a ñuyíví yóho. Já quéa tá ná candeé ini na mé á cuu cacu ndaa ínima ná já ná catacu na anda ama cáa quívi. ¹⁷Coó nachindahá Ndióxi jahyi a ña ná quixi da jándihí da saḥá na ndúu ñuyíví yóho. Nachindahá a jahyi a jáchi cúni a jácacu a ñayivi.

¹⁸Ta ndá na sa candeé ini yeḥe, ña cúú u jahyi Ndióxi, na cán cúú na cája cáhnu ini Ndióxi saḥa. Joo na coó naxeen cándúsa ñahá cán, na cán cúú na co cája cáhnu ini Ndióxi saḥa jáchi coó naxeen na cándúsa na da cúú in túhún jini já jahyi mé á. ¹⁹Ta na coó naxeen cándúsa cán sa nasacu va Ndióxi saḥa ná cuḥun na indayá jáchi naḥaan na cája na ña núu. Saḥá ña cán quéa naḥinu mé á cúú jahyi Ndióxi ñuyíví yóho ta cúni a jándiyéhe a nuú ñayivi. Jáchi catóó chága na canduu na nuú naá jáchi cája na ña núu. ²⁰Jáchi tóco ndihí na cája ña núu cándají na ña vaha, ña cúú tátuhun ña yeḥe. Ta co cúni na cayati na nuú ña yeḥe cán já ná a ndítivi ña núu cája na. ²¹Joo na cája ña ndaa, na cán cúú na cáyati chága nuú ña vaha, ña cúú tátuhun ña yeḥe já ná ñaha ña mé a ndaa cája na ña cúni Ndióxi —ñacachi Jesús.

Ndícani tucu Juan sahá Jesús

²²Tá sa nayaha ña yóho já naquee Jesús nasahan chí estado Judea xihín na xíca tuun xihín á. Ta cán nasahin a chá tiempo xihín ná jáchi najácandúta ná ñayivi mé cán. ²³Ta jári Juan va najácandúta dá ñayivi chí ñuu naní Enón yati ñuu Salim cán jáchi cán ñuhu cuahá ticuií. Ta cuahá ñayivi nasahan na cán candúta ná. ²⁴Tóco ndihi ña yóho nayaha tá cámaní tiin na Juan chicaan na da vecaa.

²⁵In tañu java na xíca xihín Juan cán nacasáhá na ndítuhún ihvi na xihín java na Israel sahá ña yóho: á ndíyahvi chága tá cája ndúta Juan ñayivi á tá cája ndúta na xíca tuun xihín Jesús ñayivi. ²⁶Tá nandihí já ndáva na xíca xihín Juan nasahan na cáhan na xihín dá já nacachi na já:

—Maestro, dataa, da nandituhún xihín ndó inga xoo yuta Jordán cán, da nacahan mé ndó saha nuú nde cán, viti xíca nuu da jácandúta dá ñayivi ta jandá johó tóco ndihi ñayivi ndíco na da viti —nacachi na cán xihín Juan.

²⁷Anda já nacachi Juan já xihín na cán:

—Ni in túhún toho ñaha a cúu caja ñayivi tá co sáhan Ndióxi ñamaní nu ná caja na ña. ²⁸Ta sa naxini johó ndó ña nacaxi tuhun yachi vi xihín ndo ña co cúu yehe da nasahan Ndióxi tuhun a chindahá a cacomí a cuénta sahá ñayivi. Nachindahá Ndióxi yehe já ná cacu tiaha i íchi nuú quixi mé da cán. ²⁹Candehé ndo. Cúu á tátuhun tá cúu in víco tándaha. Ta da cúu amigo da tándaha cán ndáti da casaa da. Ta cájii ini da tá xini johó da nu cáhan vatá da tándaha cán jáchi íin ñájíhí da xihín dá. Ta quiahva já cájii ini i jáchi casáhá ñayivi ndíco na jata Jesús viti. ³⁰Mé Jesús jan ndicáhu johó ga cuhun a. Ta yehe ndítahan nuu ndáha johó i cuhun i —nacachi Juan.

Jesús quéa naquixi chí indiví

³¹Mé Jesús naquixi chí indiví ta cáhnu chága mé á nu ndíhi ñaha. Ta ñayivi nacacu ñuyíví yóho cáhan na sahá ñaha ñuyíví cuití va. Joo mé á naquixi chí indiví cán cúu á ña cáhnu chága nu tóco ndihi ñaha. ³²Ta cáhan mé a cán sahá ña naxini xihín nuu a ta cáhan sahá ña naxini johó a. Joo ni in na co cúni candúsa na ña cáhan mé á. ³³Joo ndá na cándúsa nu cáhan mé á, na cán cúu na cándaa cáxí ini na ña cáhan Ndióxi ña ndaa. ³⁴Ndióxi quéa nachindahá mé á ta cáhan ndinuhu tuhun Ndióxi jáchi co ndáhví toho cúu ini Ndióxi jándicutú ndaa mé a cán xihín ínima yíi mé á. ³⁵Ta Ndióxi, tátá a ña íin indiví quíhvi ndivaha ini a in túhún jini já jahyi a ta nasahan ndée a nuú jahyi a ña ná cuu caja tóco ndihi ñaha. ³⁶Ta ndá na cándee ini mé a cúu in túhún jini já jahyi Ndióxi cán, na cán cúu na catacu anda ama cáa quívi. Joo na co cúni candúsa ñahá cán, na cán cúu

na a ñéhe táhvi toho na catacu na xihín Ndióxi. Ña caja Ndióxi xihín ná quéa chindahá a na cūhun na indayá anda ama cáa quivi.

Ndítúhún Jesús xihín in ñáñáha cuénta Samaria

4 Ta ndaja coona fariseo nacandaa ini na ña cuaha chága ñayivi ndíco jatá Jesús ta cuaha chága ñayivi jácandúta Jesús a juú ga Juan. ²Vatí a juú mé Jesús jácandúta ñayivi joo na xíca tuun xihín á cán jácandúta ñahá. ³Ta tá naxini johó Jesús ña cáhan ñayivi sahá já naquee a estado Judea xihín na xíca tuun xihín á cuahan na ndíco coo na chí estado Galilea.

⁴Ta nuú cūhun a Galilea cán ndúsa yaha ndaa estado Samaria já xinu a nuú cūhun a cán. ⁵Ta naxinu a in ñuu loho naní Sicar cuénta mé Samaria cán yati nuú ñundáhyi ña najándicoo táhvi Jacob nu José, jahyi da. ⁶Ta cán nasahiin in chīcoho ña naní chīcoho Jacob. Ta cúu á tátuhun caxivi tá naxinu coo Jesús ñuu Sicar cán. Ta chí a váha ga nacanaa a sahá ña cán quéa nasacoo a yati yuhú chīcoho cán. ⁷Ta nani íin coo a cán já naxinu in ñáñáha cuénta Samaria tavá ña ticuií ini chīcoho cán. Já nacachi Jesús já xihín ñá:

—Quiahva loho ticuií ná coho i —nacachi a xihín ñá. ⁸Jáchī sa cuahan na xíca tuun xihín á ñuu cueen na ñaha cuxu na.

⁹Anda já nacatontó ña jáchī co xíní táhan vaha na Israel xihín na Samaria. Ta nacachi ñá já xihín Jesús já:

—Ndá cuénta quéa xíca yóhó, da Israel, ticuií nuú i cohún ta ñá Samaria va cúu yehe —nacachi ñá cán xihín Jesús.

¹⁰Já nacachi a já xihín ñá:

—Tá ná candaa inún yo cúu yehe, da xíca ticuií nuun ta tá ná candaa inún ndá quiahva íin ña cúnī Ndióxi quiahva nuun já cacún ña nuú i. Jáchī yehe cuu caja i ña ná catacún anda ama cáa quivi ta ña yóho cuu a tátuhun ticuií, do a cúu ndihi saha —nacachi Jesús.

¹¹Anda já nacachi ñá cán já xihín á:

—Candehé ndo. Ni yáxi co ñéhe ndó tavá ndó ticuií ini chīcoho yóho ta chīcoho cúná ndivaha cúu ña yóho. Ndá cuu caja ri ndó quiahva ndó ticuií cáchī ndo jan nuú i. ¹²Tásáhnū jícó nde, da naní Jacob cán najándacoo chīcoho yóho nuú nde. Ta nuú chīcoho yóho naxihi da cán ticuií ta sa mé chīcoho yóho naxihi ri jahyi da cán ta yóho naxihi ri quítī jana dá. Ama ná cuu quiahva mé ndó ticuií vaha chága a juú ga dó najándacoo Jacob nuú nde —nacachi ñá cán xihín Jesús.

¹³Anda já nanducú ñéhe Jesús tūhun nu ñá já nacachi a já:

—Ndá ñayivi nacuu va xíhi ticuií chīcoho yóho já quéa ichi tá ichi ini na. ¹⁴Joo ndá na ná coho ticuií táhan dó sahan yehe, na cán cúu na a ndíco coo ga na ichi ini na anda ama cáa quivi. Jáchī cúu á tátuhun sa mé

ini mé va na cana ticuií, dó a ndíhi saha ta catacu na anda ama cáa quivi —nacachi Jesús xihin ñá.

¹⁵Anda já nacachi ñá cán já xihin Jesús:

—Quiahva mé ndó ticuií, dó co ndíhi saha jan nuú i ña ná a íchi ga ini i ticuií já ná a quíxi ga i yóho tavá i dó coho i —nacachi ñá xihin á.

¹⁶Anda já nacachi Jesús já xihin ñá:

—Cuáhán cana yíun ná quixi da yóho xuhun.

¹⁷Anda já nanducú ñehe ñá cán tuhun nu á já nacachi ñá já:

—Coó toho yíi i.

Anda já nacachi Jesús já xihin ñá:

—Mé a ndaa coó toho yíun. ¹⁸Joo nasahiin uhun yíun ta da íin xuhun viti jan co cúu toho da yíun. Ndaa ndusa cáhun —nacachi Jesús.

¹⁹Já nacachi ñá já xihin á:

—Jivi ndusa in profeta cúu mé ndó. ²⁰Tásáhnú jícó nde, na Samaria yóho nacaja cáhnu na Ndióxi yati jiní yúcu jan. Joo ndóhó, na Israel cáchi ndo ña ndúsa ndítahan nuú nde cuhun nde ñuu Jerusalén caja cáhnu nde Ndióxi. Ta mé ndó ndaja cachi ndó —nacachi ñá cán xihin Jesús.

²¹Anda já nanducú ñehe Jesús tuhun nu ñá já nacachi a já xihin ñá:

—Xíní ñúhú candúsún ña cáhan i jáchi mé a ndaa vaxi quivi caja cáhnu ndihi ndó Ndióxi, tátá yo ndá xoo nacuu va. A cúní ñúhú ga ndó cuhun ndo jiní yúcu cáa ta ni a cúní ñúhú ga ndó cuhun ndó ñuu Jerusalén caja cáhnu ndó Ndióxi. ²²Joo ndóhó, na Samaria cája cáhnu cuáá ndo Ndióxi jáchi co xíní ndó a. Joo ndehe, na Israel xíní vaha nde yo cúu Ndióxi cája cáhnu nde. Jáchi chichi mé nde, na Israel nasacu ini Ndióxi quixi mé á jácacu ñayivi. ²³Ta viti naxinu quivi tá ndítahan caja cáhnu ñayivi Ndióxi, tátá yo xihin ndinuhu ini na tá quiahva cúní ínima yíi Ndióxi jáchi quiahva já cúní Ndióxi, tátá yo ña ná caja cáhnu ñayivi mé á. ²⁴A cuú cuni yó Ndióxi jáchi coó toho yiquí cuñu a sahá ña cán quéa xíní ñúhú caja cáhnu ñayivi mé á xihin ínima ná ta xihin ndinuhu ini na —nacachi Jesús xihin ña.

²⁵Anda já nacachi tucu ñá cán já:

—Sa cándaa cáxi ini i ña vaxi quivi quixi da chindahá Ndióxi cacomí a cuénta sahá ñayivi, mé da cúu Cristo. Ta tá ná quixi da cán já ndicani ndihi da nuú nde ndaja coo —nacachi ñá cán xihin Jesús.

²⁶Anda já nacachi Jesús já xihin ñá:

—Da cán cúu yehe, da cáhan xuhun viti —nacachi Jesús xihin ñá.

²⁷Ta nani cáhan Jesús xihin ñá naxinu coo na xíca tuun xihin á já nacatontó na jáchi naxini na ndítuhún a xihin in ñáñáha. Joo ni in túhún na coó nasahan ndeé ini na cuhun na ndaca tuhún ñahá ndá a cúní ñá cán, á ndá saha ndítuhún a xihin ñá. ²⁸Tá nandihí já najándacoo ñá cán yoo ñá

ta naquee ñá cuahan ñá ñuu. Ta cán nacasáhá cáhan ñá xihín na ñuu cán já cáchí ñá já xihín ná:

²⁹—Naha quíi ndó. Candehé ndó in dataa, da nacahan ndihi da tá quiahva nacaja i. Á a juú da yóho cúu Cristo, da nacachi Ndióxi chindahá a cacomí cuéntá sahá ñayivi —nacachi ñá cán xihín ná.

³⁰Tá nandihí já naqueta ndihi na cán cuahan na xihín ña nu íin Jesús.

³¹Joo tá cámaní xinu coo na nu íin Jesús já najacahan na xíca xihín á mé á ña ná cuxu a vatí loho.

³²Anda já nacachi Jesús já xihín na xíca tuun xihín á cán:

—Sa íin va ñaha cuxu u. Ta ndóhó, co xini toho ndó ndá a queá —nacachi Jesús xihín ná.

³³Tá nandihí já nacasáhá na cán ndáca tuhún táhan na já cáchí na já:

—Ndá na sa naquixi ñehe va ñaha cuxu a —cáchí xihín táhan na.

³⁴Sahá ña cán queá nacachi Jesús já xihín ná:

—Tá quiahva ndívaha ini ñayivi tá xíxi na quiahva já ndívaha ini i tá cája i chuun ña nachindahá Ndióxi yehe caja i ñuyívi yóho. Ta xíní ñúhú caja i ña janda quiahva ná jáxinu coo i ña. ³⁵Xíní ñúhú ndiñehe ndó nuu ndó candehé ndó ñayivi jáchi cúu ná tátuhun nuú naxutu na trigo. Joo co xíní ñúhú caja ndó tá quiahva cája ñayivi tá ndáti na comí yoo jáquee na trigo. Jáchi viti ñúhú íin tiahva ñayivi ndiquehe na tuhun Ndióxi. ³⁶Ndá na xíca chindeé ñayivi ndiquehe na tuhun Ndióxi, na cán cúu ná tátuhun na xíca jáquee trigo. Ta a cája chúun uun toho na jáchi quehe na yahvi sahá chuun cája na. Ta na ndiquehe tuhun Ndióxi cán cúu na cuhun catacu indivi anda ama cáa quívi. Ta sahá na cán cavatá da naxutu xihín da najáquee. ³⁷Jáchi íin in tuhun ta ndaa cáhan ña. Já cáchí a já: “In da xútu ta inga da jáquee jáchi cúu ndívi da da cája chúun nuú in xitoho.” ³⁸Ta quiahva já nayaha xihín mé ndó jáchi yehe nachindahá i ndohó ña ná cuhun ndó chindeé ndó ñayivi ndihvi na íchi cuéntá Ndióxi vatí coo nandoho ini ndó caxi tuhun ndó tuhun Ndióxi xihín ná. Jáchi inga na nacaxi tuhun tuhun Ndióxi xihín na cán joo ndóhó ñehe táhvi ndó chindeé ndó na ndihvi na íchi cuéntá Ndióxi —nacachi Jesús xihín na xíca tuun xihín á cán nani cámaní xinu coo ñayivi ñuu cán nu á.

³⁹Ta cuahá ñayivi ñuu Samaria cán nacandúsa na Jesús sahá ña nacahan ñáñáha cán xihín ná jáchi nacachi ñá cán já xihín ná: “Nacachi mé á xihín i ndaja cáa tóco ndihi ña nacaja i.” ⁴⁰Sahá ña cán queá tá naxinu coo na Samaria cán nu íin Jesús já naxíca tahví na nu á ña ná coo chága xihín ná. Sahá ña cán queá nacandoo Jesús nasahíin a ivi quívi xihín na cán. ⁴¹Ta cuahá java ga na Samaria cán nacandúsa na Jesús sahá tuhun nacahan mé á xihín ná. ⁴²Já nacachi mé na Samaria cán xihín ñáñáha cán já:

—Nacandúsa nde yohó tá nacahún sahá Jesús nuú nde joo viti cándéé ini nde mé á jáchi naxini johó nde nu cáhan mé á. Ta viti ndusa cándúsa nde ña cúú á Cristo, mé á nachindahá Ndióxi jácacu a ñayivi ñuyívi —nacachi na Samaria cán xihín ñá.

Tá nandaja vaha Jesús jahyi in da cája chúun cuénta gobierno

⁴³Tá sa nayaha ivi quivi nasahin Jesús mé Samaria cán já naquee tucu a cuahan chí estado Galilea. ⁴⁴Jáchi sa nacachi mé Jesús já: “Ni in túhún toho profeta co cája cáhnu na da ñuu da”, nacachi Jesús. ⁴⁵Joo tá naxinu coo Jesús estado Galilea cán já nandiquehe vaha na cán mé á jáchi sa nasahan ri na cán vicó pascua ñuu Jerusalén ta cán naxini na ña náhnu nacaja mé á.

⁴⁶Anda já naxinu coo tucu Jesús ñuu Caná cuénta Galilea cán nuú nandaja mé á ticuif nanduu dó vino. Ta mé ñuu cán nasahin in dataa, da cája chúun cuénta gobierno. Ta a juú quiahva quíhvi jahyi da cándúhu dá ñuu Capernaum. ⁴⁷Ta tá naxini johó da cán ña sa naquee Jesús estado Judea ta íin a estado Galilea viti já ndáva da nasahan da nu á já naxica tahví da nu á ña ná cuhun a vehe da ndaja vaha jahyi da jáchi sa ndicáhvi da cándúhu dá. ⁴⁸Tá nandihi já nacachi Jesús já xihín dá:

—Ndúsa caja i ña náhnu xihín ña xitúhún nu ndo já cuu candúsa ndó yehe á tá coó ta co cúni ndó candúsa ndó yehe —nacachi Jesús.

⁴⁹Anda já nanducú ñehe da cája chúun cuénta gobierno cán tuhun nuú Jesús já nacachi da já xihín á:

—Á a cuú caja ndó ñamaní cuhun quíi ndó vehe e jáchi cúni quivi jahyi i —nacachi da xihín Jesús.

⁵⁰Anda já nacachi Jesús já xihín dá:

—Cuáhán ndicó coo ndó vehe ndó jáchi nandivaha jahyi ndó —nacachi Jesús xihín dá.

Ta nacandúsa da cán ña nacachi Jesús xihín dá chí naquee da nandicó coo da cuanúhu dá. ⁵¹Ta tá sa yati xinu coo da vehe da já ndáva nihni na cúú mozo da nasahan na ñehe ná da já nacachi na já xihín dá:

—Sa co quíhvi ga jahyi ndó viti.

⁵²Anda já nandaca tuhún da cán mozo da já cáchí da já:

—Ndá hora nacasáhá nandivaha jahyi i —nacachi da xihín ná.

Já nacachi na cán já:

—Cuni tátuhun caa in sahini já nandindaa ña chícaan cáhni á da.

⁵³Xihín ña yóho nacandaa ini da cán ña mé a ndaa nandaja vaha Jesús jahyi da jáchi mé hora cán nacachi Jesús xihín dá ña tácu tá tácu jahyi da. Sahá ña cán quéa nacandúsa mé dá xihín na vehe da Jesús.

⁵⁴Ta xihín ña yóho naxinu ivi ña xitúhún nācaja Jesús estado Galilea cán anda nani naquee a Judea já nandicó coo tucu a Galilea.

Tá nandaja vaha Jesús in da quíhvi, da íin yuhú ticuí naní Betesda

5 Tánayaha ña yóho já naquee Jesús cuahan ñuu Jerusalén nu cája na Israel víco. ²Ta mé nu quíhvi johu na ñuu Jerusalén cán íin in yéhé naní yéhé ndicachi. Ta yati cán nasahjin in vehe ta íin uhun yuyéhe nu quíhvi na ini a ta ini mé vehe cán ndacaan in pila cáhnu nu ñúhu ticuí ta naní a Betesda tuhun hebreo. ³Ta ní ini mé vehe cán nacaníhni na quíhvi ndúu na. Java na cúu ná na cuaá. Java na quíhvi saha. Ta java na naxihi tuchu. Ní cán nacaníhni na ndúu na ndáti na ndicanda ticuí cán. ⁴Jáchí ndá tañu núu táto Ndióxi ta jándicanda mé á ticuí cán. Ta ndá na ná queta nuu nu cuítí ini mé ticuí cán tá nandihí nandicanda do já ndivaha na ta co cája toho a ndá cuehe ndóho na. ⁵Ta tañu tóco ndihí na quíhvi nasanduu cán nasandacaan in dataa, da sa íin oco sahun uní cuia quíhvi da. ⁶Ta tá naxini Jesús cándúhu dá tañu na quíhvi cán ta tá nacandaa ini a ña sanahá ndivaha quíhvi da já nandaca tuhún a da já nacachi a já xihín dá:

—Á ndivahún cúnun.

⁷Anda já nanducú ñehe da cán tuhun nu á já nacachi da já:

—Coó ni in ñayivi yóho ña chindeé na yehe queta nuu i ini ticuí tá ndicanda do. Jáchí tá jacá cáhán uun i jáqueta i mí i, sa naquee vaha va inga na nuú i. Ña cán quéa a cuú ndivaha i —nacachi da cán xihín Jesús.

⁸Anda já nacachi Jesús já xihín dá:

—Cuáhán ndacoo nditivún yívun ta cuanúhun —nacachi Jesús xihín da cán.

⁹Tá nacachi Jesús já chí ivi laá ndivaha da quíhvi cán já nandiquehe da yívi dá já nacasahá da xíca da. Ta sahá ña cúu á quívi ndíquehe ndée ná ¹⁰sahá ña cán quéa naqueta java na sacuahá nuú na Israel já nacachi na já xihín dá:

—Viti cúu á quívi ndíquehe ndée yo ta co ndítahan toho nuun cojún yívun caca nuún —nacachi na xihín dá.

¹¹Anda já nanducú ñehe da cán tuhun nu ná já nacachi da já:

—Mé da nandaja vaha yehe cán cúu da nasahnda chuun nuú i ña ná cojo i yívi cuhun i —nacachi da cán xihín ná.

¹²Já nandaca tuhún tucu na Israel cán da já nacachi na já:

—Yo já nacachi xuhun ña ná ndicojún yívun cuhun —nacachi na cán.

¹³Joo da cán co xini da yo nandaja vaha ñahá jáchí tá nandaja vaha Jesús da já naquihvi nuu a cán tañu ñayivi cuaha cán cuahan. ¹⁴Tá nandihí já nanditahan Jesús da cán ini veñuhu cáhnu já nacachi a já xihín dá:

—Candehé. Sa cō quíhvi gaún viti. A ndícó cō gaún cajún cuachi jáchi tiahva náá quixi ña ndeé chága ví ndohún —ñacachi Jesús xihín dá.

¹⁵Tá nandihi já ndáva da cán nasahan da cáxi tuhún da nuú na Israel ña Jesús cúú ña nandaja vaha ñahá. ¹⁶Sahá ña cán quéa ñacasáhá na Israel cán cája xíxi na xihín Jesús. Ndúcú na cahní na a sahá ña cája chúun a ndája vaha mé á na quíhvi quívi ndíquehe ndée ná. ¹⁷Anda já ñacachi Jesús já xihín ná:

—Cája chúun ta cája chúun Ndióxi, tátá i sahá ña cán quéa cája chúun ta cája chúun ri yehe va —ñacachi Jesús.

¹⁸Sahá ña cán quéa ví ga ví cúni na Israel cán cahní na Jesús jáchi cáchi na cō cája cáhnu a Ndióxi quívi ndíquehe ndée ná tá quiahva cáchi ley. Ta cúni na cahní na mé á jáchi cáchi a ña cúú á in túhún jini já jahyi Ndióxi ta xihín ña yóho ndája mé á tátuhun mé Ndióxi.

Ña cúú cája Jesús sahá ña cúú á in túhún jini já jahyi Ndióxi

¹⁹Já ñacachi Jesús já xihín na Israel cán:

—Mé a ndaa ná cahan i xihín ndo. Yehe cúú u in túhún jini já jahyi Ndióxi ta cō cája i ni in ñaha cuéntá mí i jáchi cája i ña xíní i cája Ndióxi, tátá i. Ta tóco ndihi ña cája tátá i ña cán cúú ña cája ri yehe va. ²⁰Jáchi sahá ña quíhvi ini Ndióxi, tátá i yehe sahá ña cán quéa náha mé á nuú i ndaja táhan ñaha cája mé á. Ta janda ñaha náhnu chága ví náha mé á nuú i ta chí catóntó ndihi ndó tá ná cuni ndó ña. ²¹Jáchi tá quiahva cája Ndióxi, tátá i jánditacu a ndii ña ná catacu na quiahva já cuu caja ri yehe jánditacu u na cúni mí i catacu. ²²Ta mé Ndióxi, tátá i cō cája víi toho a sahá ñayivi. Ña ñacaja mé á quéa nasahan ñamani nuú i, da cúú in túhún jini já jahyi mé á, ña ná caja víi i saha ná. ²³Já quéa ná caja cáhnu ñayivi yehe tá quiahva cája cáhnu na Ndióxi, tátá i. Jáchi ndá na cō cája cáhnu yehe náha ña cō cája cáhnu na Ndióxi, tátá i jáchi mé a cán nachindahá yehe vaxi i.

²⁴Mé a ndaa ná cahan i xihín ndo. Ndá na táa johó vaha nu cahan i ta cándúsa na Ndióxi, mé a nachindahá yehe quixi i, na cán cúú na catacu anda ama cáa quívi. Ta a jándoho Ndióxi ini na indayá jáchi cúú á tátuhun sa najánditacu tucu Ndióxi na. ²⁵Mé a ndaa ná cahan i xihín ndo ña vaxi quívi ta cúú á tiempo viti tá na cō tácu cuni johó na ña cahan yehe, da cúú in túhún jini já jahyi Ndióxi. Ta ndá na ná ndiquehe vaha tuhún cahan i xihín ná catacu na anda ama cáa quívi. ²⁶Jáchi tá quiahva cuu caja Ndióxi catacu ñayivi quiahva já ñacaja mé á ña ná caja ri yehe, da cúú in túhún jini já jahyi mé á, ña ná cuu catacu ñayivi. ²⁷Ta nasahan mé á ñamani nuú i ña ná caja víi i sahá ñayivi ñuyívi jáchi yehe cúú da ñaquixi indivi nduu in ñayivi. ²⁸A catóntó ndo sahá ña cahan i xihín ndo yóho jáchi mé a ndaa

vaxi quivi tá cuni johó tóco ndihi ná sa naxihi nuú cahan i xihin ná ²⁹já queta na camasanto. Ta ná nacaja vaha cán nditacu na ta cuhun ná catacu na anda ama cáa quivi. Ta ná nacaja ña quini nditacu na ta cuhun ná indayá ndoho ini na.

Náha Jesús ña iin saha cája tóco ndihi ña cája

³⁰Tóco ndihi ña cája i a juú in túhún mí i caja ña. Tá quiahva sáhná Ndióxi, tátá i chuun nuú i ña ná caja vií i sahá ñayivi quiahva já cája vií i saha ná. Ta cája vií ndaa i saha ná jáchi co ndúcú u caja i ña cúní mí i. Ña ndúcú u caja i cúú ña cúní Ndióxi, tátá i caja i jáchi mé á nachindahá yehe quixi i. ³¹Jáchi tá saha mí i ná caca nuu i cahan i, co nditahan ndiquehe ndó ña cahan i sahá i. Co ndítahan nuú i cahan i saha mí i ³²jáchi iin inga ña cahan sahá i ta ña cahan mé a cán sahá i cúú á ña ndaa. ³³Ta mé ndó nachindahá ndo java na nasahan ná ndáca tuhún ná Juan sahá i. Ta ña ndaa nasacuu tóco ndihi tuhun nanducú ñehe da cán nu ndo. ³⁴Vatí co ndátí i cándusa ndó yehe sahá ña cahan in ñayivi sahá i joo cuu cacu ndaa ínima ndó tá ná candúsa ndó ña cahan Juan sahá i. ³⁵Jáchi mé Juan, da nacaja ndúta ñayivi cán nasacuu da tátuhun in íti, dó jándiyéhe nuu ndo. Joo chá tiempo cuití va nacajii ini ndó xihín tuhun nacahan da. ³⁶Iin inga ña cáhnu chága a juú ga ña nacahan Juan sahá i. Ta ña cán cúú á ña náhnu xihín ña xitúhún naxini ndó nacaja i. Ta ña yóho náha nu ndo yo cúú yehe ta náha ña cúú á ña ndaa ña nachindahá Ndióxi, tátá i yehe. Jáchi tóco ndihi ña cája i cúú á ña nacachi Ndióxi, tátá i xihín i caja i. ³⁷Ta Ndióxi, tátá i, mé á nachindahá yehe náha tuhun sahá i. Joo ndóhó, co xíní johó ndó nu cahan mé á ta ni co xíní tívi ndó a. ³⁸Ta ni coó tuhun mé á ndácaan ínima ndo jáchi co cándusa ndó yehe, da nachindahá mé á quixi ñuyíví yóho. ³⁹Vatí jácuaha vaha ndó tuhun Ndióxi sahá ña ndúcú ndo ndaja cuu catacu ndó anda ama cáa quivi joo co cándaa ini ndó ña mé tuhun Ndióxi cán cúú á ña cahan sahá yehe. ⁴⁰Ta co cúní ndó quixi ndó nuú i já ná caja i ña ná catacu ndó anda ama cáa quivi.

⁴¹Co ndúcú toho i ña ná caja cáhnu ndó yehe. ⁴²Sa xíní vaha i ínima ndo ta cándaa ini i ña co quíhvi ini ndó Ndióxi. ⁴³Naxinu i ñuyíví yóho cuéntá Ndióxi, tátá i ta co cúní ndó ndiquehe vaha ndó yehe. Joo tá ná quixi in da cuéntá mé dá já ndiquehe vaha ndusa ndó da. ⁴⁴Jáchi mé ndó cátóo ndó candoo vaha ndó nuú ñayivi cuití va ta co ndúcú ndó candoo vaha ndó nu Ndióxi. Sahá ña cán quéa ihvi ndivaha cúú ini ndó cándeé ini ndó in túhún jini Ndióxi. ⁴⁵Coto a juú cahan ndo ña jácojo i cuachi jata ndo nu Ndióxi, tátá i. Mé ley nacahyí Moisés, ña cán cúú á chícáan cuachi jata ndó vatí cándeé ini ndó da. ⁴⁶Tá ta mé a ndaa cándusa ndó ña nacahyí Moisés sanahá já quéa cándusa ndó yehe jáchi sahá yehe nacahyí

Moisés sanahá. ⁴⁷Joo sahá ña co cándúsa ndó ña nacahyí Moisés sahá i sahá ña cán quea co cándúsa ndó ña cáhan i xihín ndo —nacachi Jesús xihín na Israel cán.

Sáhan Jesús ña cuxu uhun mil taa

(Mt. 14:13-21; Mr. 6:30-44; Lc. 9:10-17)

6 Tása nayaha tócó ndihi ña yóho já naquee Jesús cuahan inga xoo tañuhú Galilea cán. Ta mé tañuhú cán cáhan tucu na xihín dó naní do Tiberias. ²Ta cuahá ndivaha ñayivi ndíco jata Jesús cuahan na jáchi naxini na ña náhnu nacaja mé á tá nadaja vaha mé á na quíhvi. ³Tá nandihi já nandaa Jesús in xiqui ta cán nasacoo a xihín na xíca tuun xihín a cán. ⁴Ta mé tiempo já sa cáyati vicó pascua ña cája mé na Israel cán. ⁵Ta tá nandicoto nihni Jesús já naxini a ña ndíco cuahá ñayivi jatá vaxi na já nacachi a já xihín Felipe:

—Ndájá cájún cuéntá cohó cueen nahá yo ña cuxu tócó ndihi ñayivi yóho —nacachi Jesús xihín dá.

⁶Nacachi Jesús ña yóho xihín Felipe jáchi cúni a cuni a ndíá cachi da cán xihín á. Jáchi sa xíni vaha Jesús ndáa quea caja ña ná cuxu ndihi na cán. ⁷Anda já nanducú ñehe Felipe tuhun nuú Jesús já nacachi da já xihín á:

—Ni ivi ciento denario ná cañehé, a quéta toho ña cán cueén pan ná quiahva in yuhú in yuhú cuxu in in ñayivi ndúu yóho —nacachi da cán xihín Jesús.

⁸Anda já nacahan Andrés, da cúu in táhan na xíca tuun xihín Jesús, da cúu ñani Simón Pedro. Já nacachi da já xihín Jesús:

⁹—Yóho ín in taa loho ta ñehe da uhun pan cebada xihín ivi tiyacá. Joo ama ná queta ri ña yóho cuxu tócó ndihi ñayivi jan —nacachi Andrés xihín Jesús.

¹⁰Anda já nacachi Jesús já:

—Cáhan ndó xihín ná ña ná cacoo na.

Anda já nasacoo ndihi na cán. Ta a juú quiahva ndató nasahnu yucu nuú nasacoo tátuhun uhun mil taa. ¹¹Tá nandihi já natiin Jesús pan cán já nandiquiahva ndixahvi nu Ndióxi. Ta tá nandihi já nasahan ña nuú na xíca tuun xihín á ta nandicahnda na ña nuú na ndúu coo cán. Ta quiahva já nacaja ri a xihín tiyacá va. Ta naxixi ndihi na janda quiahva nachutú tixi na. ¹²Ta tá nandihi já nacachi Jesús já xihín na xíca tuun xihín á cán:

—Jánditaca ndó tócó ndihi ña nacandoo jan já ná a tívi ña —nacachi Jesús xihín ná.

¹³Sahá ña cán quea najánditaca na ña ta najándicutú na uxu ivi toyicá xihín ña nacandoo. ¹⁴Tá naxini ndihi ñayivi cán ña xitúhún nacaja Jesús yóho já nacasáhá cáchí xihín táhan na já:

—Jivi ndusa da yóho cúu profeta nacachi Ndióxi chindahá a ñuyívi yóho —cáchi xihín táhan na.

¹⁵Joo naquee Jesús cuahan in túhún mé á coo a yúcu jáchi xini mé á ña ndúcú ñayivi cañehe ndúsa na mé á jáchi cúni na ndaja na mé á rey nu ná.

Tá naxica sáhá Jesús nuú tañuhú

(Mt. 14:22-27; Mr. 6:45-52)

¹⁶Tá sa nacuaá já nanuu na xica tuun xihín Jesús xiqui cán cuahan chí yuhú tañuhú cán. ¹⁷Ta chí sa nacanaá vaha va ta coó Jesús xinu coo nu ndúu na sahá ña cán quea nandaa na jatá in barco ta nacasáhá na jándicaca na do jáchi cúni na cuhun na ñuu Capernaum. ¹⁸Ta ndaja coo nacasáhá ndícojo ticuifí nuú tañuhú cán jáchi nacasáhá xicó in tachí ndee ndivaha. ¹⁹Ta tá sa nacaxicá na uhun á ñnu kilometro cuahan na xihín barco cán nuú ticuifí já naxini na xica sáhá Jesús cuahan nuú ticuifí já cáyati a nu barco cándójó na cán. Anda já nacasáhá yíhvi na ndúu na. ²⁰Ta tá naxinu coo Jesús nu ná já nacachi a já xihín ná:

—A cáyihvi toho ndó jáchi yehe va cúu u —nacachi a xihín ná.

²¹Anda já cávatá na najándaa na a jata barco. Ta ivi laá sa naxinu coo na nuú cuahan na.

Ndínducú ñayivi Jesús

²²Tá nativi inga quiví itaan já nacasáhá ñayivi ndínducú na Jesús jáchi naxini na ña coó nandaa toho a in túhún barco nasahin cán xihín na xica tuun xihín a jáchi mé cuití na cán sa nandaa cuahan. ²³Ta nani ndúu na yuhú tañuhú yati nuú nandaja cuaha Jesús pan tá nandihi nandiquiahva mé á ndixahvi nu Ndióxi cán já naxinu coo java barco, dó naquixi chí ñuu Tiberias. ²⁴Ta sahá ña coó nanditahan na Jesús sahá ña cán quea nandaa na barco cán já naquee na cuahan na ñuu Capernaum ndínducú ñahá na.

Jesús cúu á tátuhun pan xixi ñayivi já tácu na

²⁵Tá naxinu coo na cán inga xoo tañuhú já nanditahan na Jesús. Ta nacasáhá ndáca tuhún na mé á já cáchi na já:

—Maestro, ndá hora naxinu coo ndó yóho —nacachi na xihín á.

²⁶Anda já nacachi Jesús já xihín ná:

—Mé a ndaa ná cahan i xihín ndo. Xica ndó ndínducú ndó yehe joo co cúu á sahá ña nacandaa ini ndó yo cúu yehe. Sahá ña náhnu nacaja i tá nasahan i ña naxixi ndó janda nachutú tixi ndó sahá ña cán quea ndínducú ndó yehe. ²⁷Co ndítahan ndihi nahá ini ndó sahá ña cuxu ndó ñuyívi yóho. Ña ndítahan caja ndó quea ndínducú ndó ndá quiahva catacu ndó anda ama cáa quivi. Jáchi yehe cúu da nachindahá Ndióxi nduu ñayivi ta cuu

caja i ña ná catacu ndó anda ama cáa quivi. Jáchí Ndióxi, tátá i náha ña mé a ndaa nacaxi a yehe caja i chuun yóho —nacachi Jesús xihín na cán.

²⁸Anda já nacachi na cán já xihín á:

—Ndía ndítahan nuú nde caja nde já ná jáxinu coo nde ña cúní Ndióxi —nacachi na xihín Jesús.

²⁹Já nacachi Jesús já xihín ná:

—Ña cúní Ndióxi caja ndó quea ná candúsa ndó yehe, da nachindahá mé á ñuyivi yóho.

³⁰Anda já nacachi tucu na cán já xihín á:

—Ndá ñaha xitúhún chága cuu caja ndó nuú nde viti ña ná cuni nde ña já ná cuu candúsa nde ndohó. Ndá a náhnu quea cuu caja ndó. ³¹Jáchí mé tásáhnu jícó nde naxixi na pan tá naxica na yucú íchí nu co ndúu ñayivi cán. Já cáchí tuhun Ndióxi já: “Naxixi na pan ña naquixi indiví nacaja Moisés” —nacachi na cán xihín Jesús.

³²Já nacachi Jesús já xihín ná:

—Mé a ndaa ná cahan i xihín ndo. A juú toho Moisés cúu da nasahan pan ña naquixi indiví nu ná. Jáchí Ndióxi, tátá i cúu ndusa ña nasahan pan naquixi indiví nu ná. Ta viti cúní Ndióxi quiahva in ñaha vaha chága nu ndo a juú ga ña nasahan Moisés nuú na cán sanahá. ³³Jáchí yehe cúu u tátuhun pan ña nanuu indiví nacaja Ndióxi ña ná cuu catacu ñayivi anda ama cáa quivi —nacachi Jesús xihín na cán.

³⁴Anda já nacachi na cán já xihín á:

—Nini quivi quiahva ndó táhan pan jan nuú nde, xitoho.

³⁵Já nacachi Jesús já xihín ná:

—Yehe cúu u tátuhun mé pan jan. Tá ná ndiquehe ñayivi yehe já ndivaha ini na ta cúu á tátuhun a cuíco ga na. Ta ndá na cándúsa na mí i já cúu á tátuhun a íchí ga ini na ticuí. ³⁶Joo cúu á tá quiahva nacachi i xihín ndo: co cándúsa toho ndó yehe vatí xíní ndó yehe. ³⁷Joo tóco ndihi na vaxi nuú i cája Ndióxi, na cán cúu na cándúsa yehe. Ta ndá na cándúsa yehe, na cán co táxi i na ña ná quee na cuhun na. ³⁸Jáchí vatí nanuu i indiví nu ín Ndióxi joo coo naquixi i caja i ña cúní mí i. Vaxi i caja i ña cúní Ndióxi, tátá i jáchí mé á nachindahá yehe. ³⁹Ta ña cúní Ndióxi quea ña ná a quiahva i ñamani ndihi sahá na nasahan mé á nuú i. Ña cúní mé á quea ná jánditacu u tóco ndihi na tá ná xinu coo quivi nu ndíhí. ⁴⁰Ña cúní Ndióxi quea ná catacu ñayivi, na cándeé ini yehe anda ama cáa quivi. Ta yehe, da cúu in túhún jiní já jahyi mé á jánditacu u na quivi nu ndíhí cuí —nacachi Jesús.

⁴¹Anda já nacasáhá na Israel cán cahan núu na sahá Jesús jáchí sa nacachi a ña cúu á tátuhun pan ta nacachi a ña nanuu a chí indiví. ⁴²Ta já nacachi xihín táhan na cán já:

—Á a juú jahyi José va cúú Jesús yóho. Ta xíní vaha va mí yo cúú náná da xihín tátá da. Ta ndá cuéntá quéa cáchí ri da ña ñaquixi da chí indiví, dá já —ñacachi xihín táhan na cán.

⁴³Anda já ñacachi Jesús já xihín ná:

—A cáhan núu ga ndó sahá i. ⁴⁴Jáchí jácahan Ndióxi, tátá i, ñayivi ña ná candúsa na yehe. Ta ni in túhún toho ñayivi a cuú candúsa na yehe tá ta cō jácahan Ndióxi ínima ná, mé á nachindahá yehe. Ta na cán cúú na jánditacu u quiví nu ndíhí. ⁴⁵Já ñacahyí na profeta sanahá: “Jánaha Ndióxi tóco ndihi ñayivi.” Ña cán quéa tóco ndihi ñayivi, na xíní johó nu cáhan Ndióxi ta cája na ña jánaha mé á nu ná, na cán cúú na vaxi nuú i.

⁴⁶Joo a juú cahán ndo ña cuu cuni java ñayivi Ndióxi, tátá i. Jáchí yehe, da nachindahá mé á ñuyiví yóho, cúú in túhún da xíní ñahá. ⁴⁷Mé a ndaa ná cahán i xihín ndo. Ndá na cándeé ini yehe, na cán cúú na catacu anda ama cáa quiví. ⁴⁸Jáchí yehe cúú u tátuhun pan ña cuu caja ña ná catacu na. ⁴⁹Sa xíní ndó tásáhnú jícó ndo ñaxixi na pan yucú íchí sanahá joo ñaxihí tá ñaxihí na. ⁵⁰Joo yehe cúú u tátuhun pan ña nanuu chí indiví já quéa ndá na cándúsa yehe cúú ná tátuhun na xíxi pan ta já a quiví na. Jáchí tá ná cuxu na pan quiahva i nu ná já quéa catacu na anda ama cáa quiví. ⁵¹Yehe cúú u tátuhun mé pan xíxi na. Nanuu i indiví ta a cúu ndihi sahá i. Ta jivi mé yiquí cuñu i cúú á tátuhun pan xíxi na yóho ta vaxi quiví ndiquiahva i ña nu ná já ná cuu cacu ndaa ínima ná. Ta tá ná cuxu na ña já catacu na anda ama cáa quiví —ñacachi Jesús.

⁵²Anda já ñacasáhá na Israel cán ndítúhún cuehe xihín táhan na já ñacachi na já:

—Cáchí da yóho ña cúú yiquí cuñu da tátuhun pan xíxi ñayivi. Ndaja cuu caja ri da quiahva da ña nu yo cuxú —cáchí xihín táhan na.

⁵³Anda já ñacachi Jesús já xihín ná:

—Mé a ndaa ná cahán i xihín ndo. A cuú catacu ndó anda ama cáa quiví tá ta cō cándúsa ndó yehe. Ta tá cándúsa ndó yehe cúú á tátuhun xíxi ndó yiquí cuñu i ta cúú á tátuhun xíhi ndó níi i. ⁵⁴Ndá na xíxi na yiquí cuñu i ta xíhi na níi i, na cán cúú na cacu ndaa ínima ná ta jánditacu u na quiví nu ndíhí. ⁵⁵Jáchí yiquí cuñu i cúú ndusa tátuhun in ñaha vaha ndivaha cuxu na ta níi i cúú dó tátuhun in dó vaha xíhi na. ⁵⁶Ndá na ná ndiquehe vaha yehe cúú á tátuhun ndiquehe vaha na in pan cuxu na ta cúú á tátuhun ndiquehe na ticuúí xíhi na. Já quéa in nduu na xihín i ta já in nduu ri yehe va xihín mé ná. ⁵⁷Ta sahá ña tácu Ndióxi, tátá i, mé a nachindahá yehe sahá ña cán quéa tácu ri yehe va cája mé á. Quiahva já yaha ri xihín ñayivi jáchí tá ná ndiquehe vaha na yehe já catacu na caja i. ⁵⁸Jáchí yehe cúú u ndusa tátuhun pan ña nanuu indiví. Ta cō cúú á tátuhun ña ñayaha xihín tásáhnú jícó ndo tá ñaxixi na pan naní maná yucú íchí cán jáchí tá

nandihi naxihí tá naxihí na cán. Joo ndá na cándéé ini yehe cúú ná tátuhun na xíxi pan ña naquixi indiví. Ta na cán catacu na anda ama cáa quivi —nacachi Jesús.

⁵⁹Tócó ndihi ña yóho najánaḥa Jesús nu ná ini veñuhu ñuu Capernaum cán.

Cuu catacu ñayivi anda ama cáa quivi tá ná cándéé ini na Jesús

⁶⁰Ta cuahá táhan na xíca xihín Jesús cán tá naxini johó na ña nacahan mé á já nacasáhá cáhan núu na sahá já cáchí na já:

—Yáncá ndivaha candúsa í tuhun cáhan Jesús yóho. A cúu toho caja í xihín á —nacachi na cán.

⁶¹Tá naxini Jesús ña cáhvi núu ini na xíca xihín a cán já nacasáhá cáchí a já xihín ná:

—Ndíhíhvi ndó sahá tuhun nacahan í yóho. ⁶²Ndaja ga ví ndíhíhvi ndó tá ná cuni ndó yehe ndaa í cūhun í indiví nuú nasahíin í jáchi yehe cúú u da nachindahá Ndióxi nduu ñayivi. ⁶³Nasahan Ndióxi in ínimā nuú in in ñayivi ña ná chindeé a na ndinducú na mé á. Joo yiquí cuñu ñayivi cō chindeé toho a na ndinducú na mé á. Ta tóco ndihi ña nacahan í xihín ndo cúú á ña cuu xinu ini ínimā ndo ña ná catacu ndó anda ama cáa quivi.

⁶⁴Joo ndúu java ndó cámaní yíí candúsa ndó ña cáhan í xihín ndo —nacachi a.

Nacachi Jesús ña yóho jáchi sa xíní mé á anda saḥa ndá na cúú na cō cándúsa ñahá. Ta sa xíní Jesús ndá da cúú da jicó túhún ñahá. ⁶⁵Anda já nacachi tucu a já:

—Sahá ña cán queá cáchí í xihín ndó ña ni in túhún toho ñayivi a cuú candúsa na yehe tá cō jácahan Ndióxi ínimā ná —nacachi Jesús.

⁶⁶Tá nacachi Jesús ña yóho já queá cuahá táhan na nasaxíca xihín a cán najándacoo na mé á ta chí cōó naxeen ga na caca nuu na xihín á. ⁶⁷Anda já nandaca túhún Jesús ndíhuxu ivi na xíca tuun xihín a cán já nacachi a já xihín ná:

—Á cūhun ri ndóhó va cúni ndo —nacachi a.

⁶⁸Anda já nanducú ñehe Simón Pedro tuhun nuú Jesús já nacachi da já:

—Candehé ndo, xitoho í. Yo nuú ga cuu cūhun nde. Tuhun cáhan ndó xihín nde caja ña ná cūhun nde catacu nde anda ama cáa quivi tá ná candúsa nde ña. ⁶⁹Ta ndeḥe sa nacandúsa va nde ndohó. Ta sa xíní vaha nde ña cúú ndó Cristo, ña in túhún jini já jahyi Ndióxi, ña tácu indiví —nacachi Pedro cán xihín Jesús.

⁷⁰Anda já nacachi Jesús já:

—Mé a ndaa nacaxi í ndíhuxu ivi ndó ña ná caca tuun ndó xihín í. Ta vatí nacaxi í ndihi ndó joo in táhan ndó cúú dá cuéntá tiñáhá sacuaḥa —nacachi Jesús.

⁷¹Nacachi Jesús ña yóho saha Judas, jahyi Simón Iscariote jáchi mé Judas cán cúú dá da jicó túhún ñahá chága chí nuu vatí cúú dá in táhan da uxu ivi na xíca tuun xihín Jesús cán.

Cō cūni na cúú ñani Jesús candúsa na mé á

7 Tánayaha ña yóho já naxica nuu Jesús tá ñuu tá ñuu estado Galilea cán. Cōó naxeen ga cūhun a chí Judea jáchi cán nacasáhá na ndúcú na mé á cahní na a. ²Joo sahá ña nacayati víco tá ndúu ñayivi vehe tiyahvá válí cája na Israel ³sahá ña cán quéa nacachi java ñani Jesús já xihín á:

—Ndía cájún coún yóho. Cuáhán chí Judea já ná cuni na xíca xūhun cán ndaja ndaa ña náhnu cájún. ⁴Jáchi tá cūni in dataa nahá da ña náhnu cája da já quéa cō ndácoo jehé toho da cája da ña. Tá ta mé a ndaa cájún ña náhnu já quéa xíní ñúhú cajún ña já ná cuni níi cúú ñayivi ndaja náhnu ñaha cájún —nacachi ñani Jesús xihín á.

⁵Nacachi na cán ña yóho jáchi ni mé ñani a cán cōó nacandúsa ñahá.

⁶Anda já nacachi Jesús xihín na cán já:

—Cámaní yíi ndindaa hora cūhun i. Ta vaha ri ndóhó ndá hora nacuu va cuu cūhun ndó jan. ⁷Jáchi ñayivi cája ña núu ñuyívi yóho a cuú candají toho na ndohó joo cándají na yehe jáchi cáxí táhyí cáhan i xihín ná ña cája na ña núu. ⁸Cuáhán mé ndó víco tá cūni ndó cūhun ndo jáchi yehe a cūhun toho i jáchi cámaní yíi xinu hora cūhun i —nacachi a.

⁹Ña yóho nacachi Jesús xihín ñani a. Ta nacando mé á estado Galilea cán.

Tá naxinu cōo Jesús vicó vehe tiyahvá cán

¹⁰Joo tá nandihí naquee ñani Jesús cán cuahan na víco já naquee ri Jesús cuahan mé víco cán. Joo cōó naxeen a nahá tívi a mé á nuú ñayivi.

¹¹Ta mé na sacuahá nuú na Israel cán nacasáhá na ndúcú na Jesús: “Ndá xíca nuu da tañu víco cán”, cáhan na.

¹²Ta jandá johó ndítúhún yaá ñayivi sahá Jesús xíca nuu na víco cán. Java na cáchí na sahá Jesús ña cúú dá taa cája vaha. Ta java na cáchí na: “Cō cúú toho da taa vaha jáchi xíca nuu cuití da jándahvi da ñayivi”, cáchí na.

¹³Joo ni in na cō sáhan ndeé ini cahán sahá nuú na sacuahá nuú na Israel cán jáchi yíhvi ñahá na.

¹⁴Ta tá natahvi java víco cán já naquihvi Jesús ini veñuhu cáhnu ñuu Jerusalén cán já nacasáhá jánaha nuú ñayivi. ¹⁵Ta tá xíní johó na Israel cán nu cáhan Jesús chí catóntó na já nacasáhá ndáca túhún táhan na já cáchí na já:

—Ndájá nacatiahva nahá da yóho ña jánaha da nu yo jáchi a juú da naxica jácuaha cúú dá —nacachi xihín táhan na cán.

¹⁶Anda já nacachi Jesús já xihín ná:

—Ña jánahā i nu ndo yóho co cúu á ña naquixi jiní mí i jáchi cúu á ña quíxi nu Ndióxi, tátá i, mé á nachindahá yehe. ¹⁷Ta tá mé a ndaa sácú ini ndó caja ndó ña cúní Ndióxi já quéa cuu candaa ini ndó á cáhan i cuéntá Ndióxi, á cáhan i cuéntá mí cuití vi. ¹⁸Jáchi ndá na cáhan cuéntá mé ná já quéa ndúcú na ña ná caja cáhnu ñayivi na. Joo ndá na ndúcú ña ná ndicáhnu mé á nachindahá ñahá cán, na cán cúu ndusa na cáhan ña ndaa ta co cája na ña co ndítahan nu ná caja na.

¹⁹Mé a ndaa najándacoo Moisés ley nu ndo joo ni in túhún ndo co cája ndó ña cáchí a. Ta viti cúní ndó cahní ndó yehe —nacachi Jesús.

²⁰Anda já nanducú ñehe na cán tuhun nu á já nacachi na já:

—Rí quini va ndácaan ini yóhó jáchi ni in túhún toho na co ndúcú cahní yohó —nacachi na cán.

²¹Anda já nacachi Jesús já xihín ná:

—Chí catóntó ndivaha ndó sahá in túhún ña cáhnu nacaja i quivi ndíquehe ndée yo. ²²Joo candehé ndo. Moisés cúu da nasahnda chuun nu tásáhnu jícó yo ña ná chicaan na marca yiquí cuñu na vatí a juú Moisés natavá sahá, vaha. Mé tásáhnu jícó yo natavá sahá ta mé ndó chicaan tá chicaan ndó marca yiquí cuñu taa valí vatí cúu á quivi ndíquehe ndée yo. ²³Ta viti cáchí ndo xihín i ndaja cáa ri ña yóho. Mé ndó chicaan ndó marca yiquí cuñu da valí vatí cúu á quivi ndíquehe ndée yo jáchi co cúní ndó yaha nuú ña nasahnda Moisés nu ndó. Ta viti xójo ini ndó xihín i sahá ña nandaja vaha i in ní yiquí cuñu in dataa quivi ndíquehe ndée yo. Ndaja cáa ri ña jan cáa já. ²⁴Mé ndó ndaja nacuu cáhan núu ndó sahá ñayivi ta co ndítahan toho caja ndó já. Jáchi ndítahan nu ndó candaa ini ndó ña cúu ña ndaa —nacachi Jesús xihín na cán.

Ndícani Jesús ndáchí naquixi a

²⁵Ta java na ñuu Jerusalén nacasáhá ndaca tuhún táhan na já cáchí na já:

—Á a juú da yóho cúu da xíca na ndúcú na cahní na. ²⁶Nu ndíhi na cándichi da jánahā da ta ni in na co ndaa cúu da. Á tá coo ta janda na jutixia cáa cándusa na ña cúu dá Cristo, da nachindahá Ndióxi cacomí a cuéntá sahá ñayivi. ²⁷Joo mí xíní vaha í ndá ñuu naquixi da yóho ña cán quéa xíní yo ña co cúu toho da Cristo jáchi tá ná quixi ndusa Cristo cán ni in na a cándaa ini ndá ñuu quixi da —nacachi na cán cáhan na sahá Jesús.

²⁸Ta nani jánahā Jesús ini veñuhu cáhnu cán já nacasáhá cáhan cóhó a já nacachi a já:

—Mé a ndaa xíní vaha ndó yehe ta xíní ndó ndá ñuu naquixi i. Joo coo vaxi yehe cuéntá mí i. Mé Ndióxi nachindahá yehe vaxi i, mé a cán cája ña

ndaa. Joo mé ndó co xini toho ndó a. ²⁹Yehe xini vaha i yo cúu mé á jáchi naquixi i nu íin mé á ta nachindahá mé á yehe vaxi i —nacachi a.

³⁰Anda já ndúcú na tiin na Jesús chicaan na a vecaa joo ni in na coó nasahan ndeé ini tiin ñahá jáchi cámaní yíi ndindaa hora tiin na a. ³¹Ta cuaha táhan ñayivi naxini johu nuú nacahan Jesús cán nacandúsa na mé á ta já cáchí na já:

—Á a juú da yóho cúu Cristo jáchi tá ná quixi inga da ama ná caja da ñaha xitúhún chága a juú ga da yóho —nacachi na.

Ndúcú na fariseo chicaan na Jesús vecaa

³²Tá naxini johu na fariseo ña cáhan núu ñayivi sahá Jesús já nandindeé ini na ta nandindeé ini ri na sacuahá nuú jutú cán chí nachindahá na java soldado cuéntá veñuhu cáhnu cán ña ná tiin na Jesús chicaan na a vecaa.

³³Anda já nacachi tucu Jesús já:

—Chá tiempo cuití va coo tóo i xihin ndo ñuyívi yóho jáchi tá nandihi já cuhun tucu u nu íin mé á nachindahá yehe. ³⁴Anda jáví caca nuu ndó ndinducú ndó yehe joo a ndítahan ndó yehe jáchi a cúu cuhun ndó nuú coo i —nacachi Jesús.

³⁵Tá naxini johu na Israel cán ña nacachi Jesús já nacasáhá ndáca tuhún táhan na já cáchí na já:

—Ta ndáchí já cuhun ri da yóho ña cáchí da ña a cúu nditahan í da. Á cuhun xicá da ñuu na tóho nu ndúu na Israel ña ná jánaha da nuú na griego. ³⁶Ndíá cúní cachi da xihin yó tá nacachi da ña ndinducú yó da ta a ndítahan toho í da. Jáchi nacachi da xihin yó ña a cúu coho nuú coo da —nacachi xihin táhan na cán jáchi coó nacandaa ini na ña nacachi Jesús xihin ná.

Jesús cúu á tátuhun yuta ticuúí

³⁷Ta mé quívi nu ndíhí víco cán nasacuu a quívi cáhnu chága nuú na Israel. Ta mé quívi cán nandaca ndichi Jesús já nacayuhú a já nacachi a já:

—Ndá ndó íchi ini ticuúí, naha ndó nuú i já ná caja i ña ná ndivaha ini ndó. ³⁸Jáchi já nacahyi a nuú tuhun Ndióxi: “Ndá na ná candeé ini yehe, ini mé ínimá ná cana tátuhun yuta ticuúí, dó caja ña ná catacu na” —nacachi Jesús xihin na cán.

³⁹Ña cúní Jesús cachi a xihin na yóho quea tá ná candeé ini na mé á já xinu quívi ndiquehe na ínimá yíi Ndióxi ini ínimá ná. Vatí mé a ndaa a ñaha toho xinu ínimá yíi Ndióxi ini ñayivi jáchi cámaní yíi va ndindita Jesús ndicáhnu ndivaha mé á indiví.

Sa jín sa jín ñaha cáhan ñayivi sahá Jesús

⁴⁰Java na ndúu tañu ñayivi cuaha cán tá naxini johu na ña yóho já nacasáhá cáchí na já:

—Jivi ndusa da yóho cúu profeta nacachi Ndióxi chindahá a ñuyívi yóho —cáchí na.

⁴¹Ta java na cáchí na sahá Jesús ña cúu á Cristo, da nachindahá Ndióxi cacomí cuénta sahá ñayivi. Ta java na cáchí na ña a juú toho a jáchi cáhan na ña a cúu toho quixi Cristo estado Galilea. ⁴²Jáchi cáchí tuhun Ndióxi ña tá ná quixi Cristo ñuyívi yóho cacuu da da quixi chichi David, da nasacomí cuénta sahá ñayivi Israel sanahá. Ta cáchí tuhun Ndióxi ña cacu da cán ñuu Belén nuú nacacu mé David cán.

⁴³Ta chí nacasáhá na sáhndá java táhan na sahá ña coó nandique táhan tuhun na saha Jesús. ⁴⁴Ta java na cúni na tiin na a ña ná cañehe ñahá na cuhun a vecaa. Joo ni in na coó natiin ñahá.

Co cúni na jutixia candúsa na Jesús

⁴⁵Tá nandihi já nandicó coo soldado cuénta veñuhu cán nu ndúu na fariseo xihín na sacuahá nuú jutú cán joo coó Jesús ñehe na ná casaa na. Já nacasáhá na ndúu cán ndáca tuhún ñahá na já cáchí na já:

—Ndá cuénta quéa coó natiin ndó da —nacachi na cán xihín soldado.

⁴⁶Anda já nanducú ñehe soldado cán tuhun nu ná já cáchí da já xihín ná:

—Nacatóntó nde naxini johu nde nu cáhan da jáchi ñúchí ndivaha cáhan da ta ni in túhún na coó nacahan tá quiahva cáhan mé dá —nacachi soldado cán.

⁴⁷Já nacachi na fariseo já xihín dá:

—Á jári ndóhó va najándahvi da jan viti. ⁴⁸Jáchi janda ni in túhún toho táhan na sacuahá ndúu tañu mé nde co cándúsa nde da jan. Ta ni in na fariseo co cándúsa na nu cáhan Jesús jan. ⁴⁹Joo cháhan va vaxi jatá ñayivi cándeé ini Jesús jan jáchi co xini na ña cáchí ley Moisés —nacachi na fariseo xihín soldado.

⁵⁰Anda já nandicahan Nicodemo, da cúu in táhan na fariseo cán, mé dá nasahan da nandituhún xihín Jesús in ñuú. Já nacachi da já xihín na java ga cán:

⁵¹—Cáchí ley ña a cuú tiin in taa ta já chicaan ndaja nacuu da vecaa. Ña cáchí ley quéa ndítahan cuni johu í nuú cahan da já ná canda iní ndaja cáa ña nacaja da —nacachi Nicodemo.

⁵²Anda já nacaja cuehe na xihín Nicodemo já nacachi na já xihín dá:

—Á dā Galilea cúú ri yóhó va. Cuáhán cahvi vāha tūhun Ndióxi já cunún ña cō cána ni in profeta estado Galilea —ñacachi na xihín Nicodemo.

⁵³Tá nāndihi já nāndicuīta nuu ndihi na cán cuánúhu ná vehe na.

Cája cáhnu ini Jesús sahá in ñáñáha

8 Ta ndaja coonaquee Jesús cuāhan chí yúcu yitó olivo. ²Ta tá nativi inga quiví itaan já nāndicó cōo tucu a veñuhu cáhnu cán. Ta tá nācayati ñayivi nu á já nāsacōo a ta nācasáhá jánaha nu ná. ³Ta ndaja coo na jánaha ley Moisés xihín na fariseo ñéhe na in ñáñáha nāsaa na nu á. Mé ñáñáha cán nānditahan na ña mé hora cándúhu ñá xihín in dataa, dā cō cúú yí ña. Ta já ñéhe na ña nāsacu ndichi na ña nuú na ndúu cán. ⁴Já nācachi na já xihín Jesús:

—Candehé ndo Maestro. Nānditahan nde ñáñáha yóho cándúhu ñá xihín in dataa, dā cō cúú yí ña. ⁵Ta nu ley nājándacoo Moisés nuú nde táhnda chuun ña ná cuun nde yuu nājihí cája já. Ta mé ndó ndíā cachi ndó —ñacachi na.

⁶Nācachi na cán já xihín Jesús jáchi cúni na coto ndojó cuití ñahá na ta cúni na ñehe ínī na jácojo na cuachi jatá Jesús. Tá nāndihi já nāsacōo Jesús já nācasáhá cáhyí a nu ñúhu cán xihín nducu ndáha á. ⁷Ta sahá ña ndúcú ndéé na cán ndāca tūhún ñahá na nāndāca ndichi Jesús já nācachi a já xihín ná:

—Ndá ndó, na cōó nācāja cuachi jácana jihna ñúhú ndó yuú jata ña —ñacachi a xihín ná.

⁸Já nāsacōo tucu a cáhyí a nu ñúhu cán xihín nducu ndáha á. ⁹Ta tá naxini johó tóco ndihi na cán ña nācachi Jesús já nācasáhá na cácahan nuu ná ta tá in tá in na nācasáhá quée na cuāhan na. Ta jihna ñúhú ga na yatá nācasáhá quée cuāhan já ndíco na yúta chāga cuāhan na. Ta tá sa naquee ndihi na cuāhan na já nācandōo mé Jesús xihín ná cán. ¹⁰Anda já nāndāca ndichi a ta nāndāca tūhún a ña já nācachi a já xihín ñá:

—Ndáchí cuāhan na jácojo cuachi jatun. Á cōó ga na jácojo cuachi jatun viti —ñacachi Jesús xihín ña.

¹¹Anda já nācachi ná cán já xihín Jesús:

—Mé a ndaa cōó ga na.

Anda já nācachi Jesús já:

—Ta ni yehe a chícaan i cuachi jatun. Cuánúhu vehún ta a cája gaún cuachi —ñacachi a.

Jesús cúú á tátuhun ñúhu ña jándiyéhe ínima ñayivi

¹²Já nācasáhá tucu Jesús cáhan xihín ñayivi já cáchí a já xihín ná:

—Yehe cúú u tátuhun ñúhu ña jándiyéhe ínima ñayivi ta ndá na cándéé ini yehe cúú á tátuhun a cáca ga na nuú naá. Jáchí jándiyéhe e nu ná ta cája i ña ná catacu na anda ama cáa quiví.

¹³Anda já nacachi na fariseo já:

—Saha mé vún cáhun ta xihín ña jan náhún ña cúnun ndíñehe jícún mún. Ta xihín ña jan náha ña co cáhun ña ndaa —nacachi na.

¹⁴Anda já nacachi Jesús já xihín ná:

—Tóco ndihi ña cáhan i saha mí i cúú á ña ndaa ta íin sahá vatí mí i cáhan i ña. Jáchí xíní vaha i ndá naquixi i ta xíní vaha i ndá cūhun i. Joo ndóhó, co xíní toho ndó ndá naquixi i ta co xíní toho ndó ndá cūhun i.

¹⁵Mé ndó catóó ndó cándéhe ndaa ndó ñayivi tá quiahva cája ñayivi ñuyiví. Joo yehe co cája toho i já. ¹⁶Joo tá ná caja víi i sahá ñayivi, caja i ña tá quiahva ndítahan caja i jáchí cája i ña ndaa. Ta a juú in túhún yehe caja víi saha ná jáchí Ndióxi, tátá i, mé a nachindahá yehe, mé á cán quéa caja víi saha ná xihín mí i. ¹⁷Nu ley mé ndó cáchí a ña tá in nuú cáhan ivi ñayivi sahá ña nayaha já náha ña cúú á ña ndaa. ¹⁸Ta viti cuni johó ndó jáchí quiahva já yáha ri xihín yehe va. Jáchí yehe cúú in testigo ta cáhan i saha mí i. Ta inga testigo cúú Ndióxi, tátá i, mé a nachindahá yehe —nacachi Jesús xihín ná.

¹⁹Anda já nandaca tuhún na Jesús já cáchí na já xihín á:

—Ndájá íin tátún jan —nacachi na.

Anda já nacachi Jesús já:

—Tá ná cuni ndó yo cúú yehe já cuu candaa ri ini ndó yo cúú tátá i. Joo co xíní ndo yo cúú yehe ta cáchí ga ví tátá i co xíní ndó a —nacachi Jesús.

²⁰Tóco ndihi ña yóho nacachi Jesús xihín ná nani jánaḥa ini veñuhu cáhnu yati nuú nasahin sato ndée jiuhún jóco na cán. Joo ni in na coó nasahan ndeé ini tiin ñahá chican veca jáchí coó nasahan Ndióxi ñamaní sahá ña cámaní yí ndindaa hora tiin na mé á.

Cáhan Jesús xihín ñayivi ña a cúu toho cūhun na nuú cūhun mé á

²¹Anda já nacasáhá tucu Jesús cáchí a já xihín ná:

—Vaxi quiví quee yehe cūhun i. Ta caca nuu ndó ndinducú ndó yehe joo a ndíñehe ndó yehe jáchí cája tá cája ndó cuachi janda quiahva xinu quiví quiví ndó. Ta sahá ña cán quéa a cúu cūhun ndó nuú cūhun yehe cán —nacachi Jesús.

²²Anda já nacasáhá na Israel cán ndítúhún xihín táhan na já cáchí na já:

—Á cahní da yóho mé dá cúní da ña cán quéa cáchí da xihín yo ña a cúu toho caja í cohó nuú cūhun da —cáchí na.

²³Já nacachi tucu Jesús já:

—Mé ndó cúú ndó ñayivi ndúu ñuyíví yóho joo yehe cúú u da ñaquixi chí indiví. Mé ndó cúú ndó cuéntá ñuyíví yóho joo yehe co cúú toho i cuéntá ñuyíví yóho. ²⁴Sahá ña cán quea ñacachi i xihín ndó ña caja ndó cuachi janda quiahva xinú quiví quivi ndó. Jáchí tá co cándúsa ndó ña cúú yehe da cáchí i cúú u, da ñachindahá Ndióxi, já quea quivi ndó sahá cuachi ndó —ñacachi Jesús.

²⁵Anda já ñandaca tühún na cán Jesús já ñacachi na já xihín á:

—Ta ndá da cúú yóhó, dá já —ñacachi na.

Já ñacachi Jesús já:

—Janda sahá va ñacahan i xihín ndó yo cúú yehe. ²⁶Ta ña xini johó i cáhan mé á ñachindahá yehe, ña cán cúú ña cáhan i xihín ñayivi ñuyíví. Ta ndinuhu ña ndaa quea cáhan mé á. Ta mé a ndaa íin cuahá ndivaha ña núu cája ndó ta cuu tavá i sahá nu ndó tá ná caja víi i saha ndo —ñacachi Jesús.

²⁷Joo coó ñacandaa ini na ña cáhan Jesús saha Ndióxi, tátá a tá ñacachi a já xihín ná. ²⁸Sahá ña cán quea ñacachi tucu a já xihín ná:

—Tá ñandihi ná cata caa ndó yehe, da ñachindahá Ndióxi nduu ñayivi ndica crúxu já quea candaa ndusa ini ndó ña yehe cúú u da cáchí i cúú u. Ta ni in túhún ñaha co cája i cuéntá mí i. Ta ña jánaha i nu ndo cúú ña najánaha Ndióxi, tátá i nuú i. ²⁹Ta mé á ñachindahá yehe co najándacoo ndáha toho a yehe jáchí íin tuun Ndióxi, tátá i xihín i. Ta ní tiempo ña cája i cúú ña cájii ini Ndióxi xihín —ñacachi Jesús.

³⁰Ta chí cuahá ñayivi ñacandúsa na Jesús tá ñaxini johó na tóco ndihi ña yóho.

Na ndúu ndáha rí quini xihín na ndúu ndáha Ndióxi

³¹Anda já ñacahan Jesús xihín java na Israel, na sa ñacandúsa ñahá cán já ñacachi a já xihín ná:

—Tá ná caja ndó tá íin ñacahan i xihín ndo já ñaha ndó ña mé a ndaa táhyí cúú ndó na cuéntá mí i. ³²Ta já candaa ini ndó ña ndaa ta ña cán caja ña ná a cácuu ga ndó tátuhun in mozo, da ndúu ndáha rí quini —ñacachi Jesús.

³³Anda já ñacachi na cán já xihín á:

—Na ñaquixi chichi Abraham cúú nde. Ta janda ni in túhún tañu coó ñasacuu nde mozo. Joo yóhó cáchún xihín nde ña a cácuu ga nde mozo. Ndaja cáa ña cáa ri a já —ñacachi na.

³⁴Já ñacachi Jesús já xihín ná:

—Mé a ndaa ná cáhan i xihín ndo. Tóco ndihi na sá caja cuachi cúú tá cúú na tátuhun mozo nuú cuachi jáchí cómí a cuéntá saha ná. ³⁵Ta da cúú mozo nuú in xitoho, coó saha dá coo nahá da xihín xitoho da jáchí vaxi

quíví ndítahan quee da cùhun dà. Joo dà cúú jahyi mé dà cúú xitoho cán íin saha dá coo nahá dà xihín tátá dà jáchi cúú dá dà vehe tátá dà. ³⁶Ta quiahva já íin xihín yehe, dà cúú jahyi Ndióxi. Cája í ña ná a cácomí ga cuachi cuéntá saha ndo ta já a cácuu ga ndó tátuhun mozo nuú cuachi cája ndó. ³⁷Ta sa cándaa vaha ini í ña cúú ndó ñayivi naquixi chichi Abraham. Joo mé ndó cúní ndó cahní ndó yehe jáchi co cúní ndó ndiquehe vaha ndó tuhun cáhan í. ³⁸Cáhan í saha tóco ndihi ña nanaha Ndióxi, tátá í nuú í. Joo ndóhó cája ndó ña cáhan tátá ndo xihín ndó —nacachi Jesús.

³⁹Anda já nacachi na cán já xihín á:

—Abraham cúú tátá nde jáchi chichi dà cán naquixi nde —nacachi na.

Já nacachi Jesús já xihín ná:

—Tá jivi ndusa cúú ndó na naquixi chichi Abraham já quéa caja ndó tá quiahva nacaja dà cán, nduu. ⁴⁰Joo ndúcú ndó cahní ndó yehe jáchi cáhan í ña ndaa xihín ndo tá cáchí í ña najánaha Ndióxi nuú í. Mé Abraham coo nacaja toho da já. ⁴¹Joo cája ndó ña núu tá quiahva cája tátá ndo —nacachi Jesús.

Já nacachi na cán já xihín á:

—A juú jahyi ndáhví toho ñayivi cúú ndehe. Ndióxi cúú ndusa tátá nde —nacachi na.

⁴²Já nacachi Jesús já:

—Tá Ndióxi ndusa ná cacuu tátá ndo ta quihví ini va ndó yehe, nduu. Jáchi Ndióxi nachindahá yehe vaxi í ta íin í yóho viti. Coó vaxi toho í cuéntá mí í. Ndióxi quéa nachindahá yehe vaxi í. ⁴³Joo co cándaa ini ndó tóco ndihi ña ndícani í nu ndo ta cúú á sahá ña co cúní ndó cuni johó ndó nu cáhan í xihín ndo. ⁴⁴Tátá ndo cúú tiñáhá sacuahá ta cája ndó ña cúní rí cán jáchi núhu ndó ndáha rí. Ta rí sáhní ndii cúú rí cán janda mé saha. Ta ni in túhún tañu coo natiin rí ña ndaa já cáhan rí ña. Jáchi cáhan rí ña túhún cuití va ta cuéntá mé rí quíxi ndihi ña túhún. ⁴⁵Candehé ndo. Co cúní ndó candúsa ndó yehe jáchi cáhan í ña ndaa xihín ndó. ⁴⁶Ni in túhún toho ndó a cúu naha nuú ñayivi ña íin cuachi í. Ta tá cáhan í ña ndaa cuití va xihín ndó ndá cuéntá quéa co candúsa ndó yehe, dá já. ⁴⁷Jáchi ndá na cúú ndusa cuéntá Ndióxi táa johó na ña cúú tuhun Ndióxi. Joo náha cáxí a ña co cúú ndó cuéntá Ndióxi jáchi co cúní ndó cuni johó ndó nu cáhan mé á xihín ndo —nacachi Jesús.

Janda tá cámaní cacu Abraham sa íin va Jesús

⁴⁸Anda já nacanhá na Israel xihín Jesús já nacachi na já:

—Mé a ndaa cúún in dà Samaria ta ndácaan rí quini inún —nacachi na.

⁴⁹Anda já nacachi Jesús já xihín ná:

—Coó toho rí quini ndácaan ínima yehe. Ña cája i quéa cája cáhnu i Ndióxi, tátá i. Joo quéhe núu ndivaha ndó yehe. ⁵⁰Co cúni toho i ña ná caja cáhnu ndó yehe vatí mé a ndaa cúni Ndióxi ña ná caja cáhnu ndó yehe. Ta mé a cán quéa caja vií saha ndó. ⁵¹Mé a ndaa ná cahan i xihin ndó. Ndá na ná caja ña cahan i yóho, na cán catacu na anda ama cáa quivi —nacachi Jesús.

⁵²Já nanducú ñehe na cán tühun nu á já nacachi na já xihin á:

—Viti ndusa cándaa ini nde ña ndácaan rí quini inún jáchi cáchún ña tá ná caja nde ña cáhún já quéa catacu nde anda ama cáa quivi. Joo xini vaha nde ña naxihi tá naxihi Abraham, tásáhnu jícó nde ta jári na profeta nasanduu sanahá naxihi na. ⁵³Á cáhnu chága yóhó a juú ga Abraham, da nasacuu tásáhnu jícó nde, dá já. Mé Abraham naxihi da ta jári mé na profeta naxihi ri na cán va. Á cájún cuéntá ña cúun da cáhnu chága a juú ga na cán, dá já —nacachi na xihin Jesús.

⁵⁴Já nacachi Jesús já xihin ná:

—Tá ná caja cáhnu i mí i, coó saha toho ña cája i. Joo Ndióxi, tátá i jándicáhnu a yehe. Ta jári mé ndó cáchí ndo ña jivi mé a cán cúu Ndióxi cája cáhnu ndó. ⁵⁵Joo co xini toho ndó yo cúu mé á. Yehe xini yo cúu mé á. Tá ná cachi i ña co xini toho i mé á, cúu u in da tühún tátühun mé ndó. Joo mé a ndaa xini vaha i yo cúu Ndióxi ta cája i ña cáchí mé á. ⁵⁶Ta mé Abraham, da nasacuu tásáhnu jícó ndo nacajii íni da jáchi nañehe dá tühun ña quixi yehe ñuyívi yóho. Ta a juú quiahva nacajii ini da tá naxini da ña yóho —nacachi Jesús.

⁵⁷Anda já cánahá chága na Israel xihin á já nacachi na já xihin á:

—Ni ivi jícó uxu cuia co ndácaan yóhó viti. Ta ndaja cúu cáchún naxinún Abraham, da cúu tásáhnu jícó nde —nacachi na.

⁵⁸Já nanducú ñehe Jesús tühun nu ná já nacachi a já xihin ná:

—Mé a ndaa ná cahan i xihin ndo. Janda tá cámaní cacu Abraham sa íin va yehe jáchi cúu u Ndióxi —nacachi Jesús.

⁵⁹Anda já natiin na Israel cán yuu ña janí na jatá. Joo nandacoo jehé Jesús já nayaha tañu na cán ta naquee a veñuhu cáhnu cán cuahan.

Cája Jesús ña ná ndinuna núu in dataa nacacu cuáá

9 In tañu tá xíca Jesúscuahan já naxini a in dataa, da nacacu cuáá.

²Anda já nacasáhá na xíca tuun xihin Jesús cán ndaca tühún na mé á sahá da cuaá cán já cáchí na já xihin á:

—Maestro, ndá cuéntá quéa nacacu cuáá da yóho. Á nacacu cuáá da sahá cuachi nacaja tátá da á náná da. Á nacacu cuáá da sahá cuachi nacaja mé dá —nacachi na.

³Já nanducú ñehe Jesús tühun nu ná já nacachi a já xihin ná:

—Coo nacacu cuáá toho da yóho sahá cuachi mé dá ta ni sahá cuachi tátá da á náná da. Nacacu cuáá da já ná naha i nuú ñayivi ndá quiahva náhnu ñaha cúu cája Ndióxi. ⁴Jáchi ndítahan caja i chuun, ña nachindahá tátá i caja i nani xíca nuu i ñuyívi yóho. Ta cúu á tátuhun ndiví táhyí cúu á viti joo vaxi quívi a cóo ga i caja i ña yóho ta já cacuu a tátuhun nacuaá ndivaha. Ta mé tiempo já ni in na a cúu caja chúun. ⁵Nani íin too i ñuyívi yóho cúu á tátuhun jándiyéhe mí i nuú na ndúu ñuyívi yóho —nacachi Jesús.

⁶Tá nandihí nacachi Jesús ña yóho já naxihnu a tójií a nu núhu. Ta xihín tójií a cán nacavaha in mbohla loho ndahyi ta nachindaa mé á ña nduchú núu da cuáá cán. ⁷Tá nandihí já nacachi a já xihín dá:

—Cuáhán chichóho naní Siloé ta cán cuchún nuún —nacachi Jesús xihín dá. Mé tuhun Siloé yóho cúni cachi a: Da nachindahá na.

Anda já naquee mé da cuáá cán nasahan da nachichí nuú da ta tá nandicó coo da cán sa sándehe va da nasaa da. ⁸Ta ndaja coo java na cúu ñani táhan da xihín java na naxini ña sáti da cán tá naxini na ña sándehe tucu da já nacachi na xihín táhan na já:

—Á a juú da yóho cúu da da cuáá sácoo sáti yuhú íchi —cáchi xihín táhan na.

⁹Ta já cáchi java na já:

—Jivi da jan cúu dá.

Ta java na cáchi na:

—A juú toho da jan cúu dá vatí quiahva já cáa da —nacachi na.

Joo mé da nasahiin cuáá cán cáhan da xihín ná já cáchi da já:

—Jivi yehe cúu da nasacuu da cuáá cán —cáchi da.

¹⁰Anda já nasahá na ndaca tuhún na da já cáchi na já xihín dá:

—Ndaja nacajún nanuná nuún —cáchi na.

¹¹Já nacachi da cán já:

—Da naní Jesús cúu da nacavaha in mbohla loho ndahyi. Ta nachindaa da ña nuú i ta nacachi da xihín i ña ná cuhun i cuchú nuú i chichóho naní Siloé. Ta já nasahan i nachichí nuú i cán ta xihín ña yóho nanuná nuú i. Sándehe e viti —nacachi da.

¹²Já nandaca tuhún tucu na cán da já cáchi na já:

—Ta ndájá cuahan da nandaja vaha yohó viti —nacachi na.

—Coo xini toho i —nacachi da xihín ná.

Ndaja ndichi na fariseo da cuáá, da nandivaha cán

¹³Tá nandihí ndaca na da nasacuu da cuáá cán nasahan da nuú na fariseo ¹⁴jáchi nasacuu a quívi ndíquehe ndée na tá nandaja vaha Jesús da cuáá cán xihín mbohla loho ndahyi nachindaa a nuú da cán. ¹⁵Já nandaca

tuhún na fariseo cán da ndá quiahva nanuná nuu dá sándehe da viti. Já nanducú ñehe da tuhun nu ná já nacachi da já xihin ná:

—Nachindaa da ndahyi nuú i ta nachichí nuú i ta viti tívi nuú i sándehe e —nacachi da xihin ná.

¹⁶Joo java na fariseo nacachi na xihin da nasacuu da cuaá cán já:

—Da nandaja vaha yohó coó vaxi toho da cuéntá Ndióxi jáchi co cája cáhnu da quivi ndíquehe ndée yo —nacachi na.

Joo já cáchí java na fariseo já:

—Tá da cája cuachi ná cacuu Jesús jan ta a cúu caja da ñaha xituhún nahá tátuhun ña yóho, nduu —nacachi java na.

Chí coó nacuu ndique táhan vaha tuhun na fariseo cán sahá ña cán quéa nasahnda táhan ndaja táhan mé va na. ¹⁷Já nacasáhá ndaca tuhún tucu na da nasacuu da cuaá cán já cáchí na já xihin dá:

—Ta viti nanuná nuun nacaja da jan. Yo já cúu dá cáchún —nacachi na.

Já nanducú ñehe da tuhun nu ná já nacachi da já xihin ná:

—Yehe cáchí i ña cúu dá in profeta —nacachi da.

¹⁸Joo coó naxeen na Israel cán candúsa na ña nasacuu da da cuaá ta ni co cándúsa na ña nanuná nuu dá. Sahá ña cán quéa nasahan na nacana na tátá náná da. ¹⁹Ta já nandaca tuhún na tátá da xihin náná da já nacachi na já xihin ná:

—Á jahyi ndó cúu da yóho. Á mé a ndaa sa já cuaá já cáa da nacacu da. Ta ndá cuéntá quéa sa tívi nuu dá viti —nacachi na.

²⁰Anda já nanducú ñehe na cán tuhun nuú na Israel cán já nacachi na já xihin ná:

—Cándaá cáxí ini nde ña jahyi nde cúu da yóho. Ta xini vaha nde ña nacacu cuaá da. ²¹Joo co xini nde ndaja nacuu nanuná nuu dá sándehe da viti. Ta ni co xini nde yo cúu da nasuná nuu dá. Jan íin mé jahyi nde. Ndaca tuhún ndó mé dá. Sa quiahva cahán mé da jan xihin ndo cúu á jáchi a juú da loho ga cúu dá jan —nacachi tátá da nasacuu da cuaá cán xihin na Israel cán.

²²Nacachi na ña yóho jáchi yíhvi na ña ná a quiahva ga na Israel cán ñamani nu ná ndihvi na veñuhu. Jáchi mé na Israel cán najándique táhan na tuhun na ña a quiahva ga na ñamani nuú ñayivi quihvi na ini veñuhu tá ta cahán na ña cúu Jesús da nachindahá Ndióxi cacomí cuéntá sahá ñayivi. ²³Sahá ña cán quéa nacachi tátá náná da nasacuu da cuaá cán xihin na Israel ña ndítahan ndaca tuhún na mé dá jáchi a juú ga da loho cúu da jan.

²⁴Tá nandihi já nacana tucu na Israel da nasacuu da cuaá cán já nacachi na já xihin dá:

—Xini ñuhú caja cáhnún Ndióxi ta a cája cáhnún Jesús jan jáchi xini vaha nde ña cúu dá in da cája cuachi —nacachi na.

²⁵Anda já nacachi da cán já xihín na Israel:

—Cọ xíní toho í á cúú dá da cája cuachi á cúú dá da có cája cuachi. Ña xíní ndusa í quéa nasacuu u da cuaá ta jivi da jan nasuná nuú í sándehe é viti —nacachi da xihín ná.

²⁶Anda já nacasáhá ndáca tühún tucu na da já cáchí na já xihín dá:

—Ta ndaja nacaja da nasuná da nduchú núún. Ndía nacaja da xuhun —nacachi na xihín dá.

²⁷Anda já nacachi da nasacuu da cuaá cán já xihín ná:

—Sa nacachi ví xihín ndó ndá quiahva nacaja da nasuná da nuú í. Joo có cúní ndó candúsa ndó yehe. Ndá cuéntá quéa ndáca tühún tucu ndó yehe. Á cuhun ri ndóhó va caca nuu ndó xihín dá cúní ndó, vaha —nacachi da xihín ná.

²⁸Já nacasáhá na Israel cán cánahá na xihín dá ta já nacachi na já xihín dá:

—Yóhó va cúú da xíca nuu xihín da jan. Joo ndehe jácuaha nde ley Moisés cuití va. ²⁹Jáchí cándaa vaha ini nde ña nacahan Ndióxi xihín Moisés. Joo mé Jesús jan có cúú dá cuéntá Ndióxi ta ní có xíní nde ndájá naquixi da jan —nacachi na xihín da nasacuu da cuaá cán.

³⁰Anda já nacachi tucu da cán já xihín ná:

—Mé a ndaa cátontó ví xihín ña yóho jáchí jivi Jesús jan nasuná da nuú í ta ndóhó ní có cándaa ini ndó ndá da cúú dá ta ní có xíní ndo ndájá naquixi da. ³¹Sa xíní yo ña có xíní johó Ndióxi ña xíca tahví ñayivi cája cuachi nu á. Joo xíní johó mé á nu cáhan ñayivi tá cája cáhnu na mé á ta tá cája na ña cúní a. ³²Ta viti candehe ndo. Janda saha ñuyíví a ñáha cuni johó í ña ndícuná in dataa nduchú núú in da nacacu cuaá. ³³Ta Jesús yóho a cóu toho caja cuná a nuú í tá ta có cúú á ña naquixi cuéntá Ndióxi —nacachi da.

³⁴Anda já nanducú ñehe na cán tühun nu dá já nacachi na já xihín dá:

—Anda tá nacacún nachutú ndaún xihín cuachi. Ta viti chí cúní ri yóhó jánahún ndehe —nacachi na Israel cán xihín dá.

Anda já nataxí na da veñuhu cán.

Ñayivi, na sándehe cúú ná tátuhun na có tívi nuu

³⁵Tá nandihi já nacandaa ini Jesús ña nataxí na da nasacuu da cuaá cán veñuhu. Ta tá nanditahan tucu Jesús da já nacachi a já xihín dá:

—Á cándéé inún da nachindahá Ndióxi nduu ñayivi —nacachi Jesús xihín dá.

³⁶Já nacachi da já xihín á:

—Cachi ndó xihín í yo já cúú dá ña ná cuu candeé ini í da —nacachi da.

³⁷Anda já nacachi Jesús já xihín dá:

—Sa naxini vún yehe ta jivi yehe, da cahan xuhun yóho cúu da nachindahá Ndióxi nduu ñayivi —nacachi Jesús.

³⁸Ta tá nacachi Jesús ña yóho já nacaxítí da cán nu á caja cáhnu da a já nacachi da já xihin á:

—Mé a ndaa cándeé ini i ndohó, xitoho i —nacachi da.

³⁹Anda já nacachi tucu Jesús já xihin dá:

—Yehe naquixi i ñuyívi yóho já ná naha i nuú ñayivi ndá quiahva ndáa ña cája na. Jáchí ndá na cándeé ini yehe cúu ná tátuhun na sa nandiyehé nuu. Joo ndá na cahan ña cúu ná na sa nandiyehé nuu cúu ná tátuhun na cuaá —nacachi Jesús.

⁴⁰Ta java na fariseo, na ndíta xihin Jesús cán tá naxini johu na ña yóho já nandaca tuhún na mé á já cáchí na já:

—Á co cáchún ña cúu ri ndehé va na cuaá —nacachi na.

⁴¹Anda já nacachi Jesús já xihin ná:

—Tá ná ndicuni ndó ña cúu ndó tátuhun na cuaá ta coó toho cuachi ndó, nduu. Joo tá cáchí ndó ña tívi vaha ndivaha nuu ndo ta co xíní ñúhú ndó in na jánaha ndohó sahá ña cán quea iin tá iin cuachi ndó —nacachi Jesús xihin ná.

Jesús cúu á tátuhun in da ndáa ndicachi

10 Anda já nacachi Jesús já:

—Mé a ndaa ná cahan i xihin ndo. Tá ná quihvi in dataa ini in corra nu ñúhu ndicachi joo co cúni da quihvi da chí yéhe nu quihvi mé rí ta ña cája da quea ndáva ndojó da corra ri já naha xicá a ña cúu dá da cuihná. ²Joo mé da quihvi chí yéhe cúu dá da ndáa ndicachi. ³Ta mé da ndáa yéhe corra nu ñúhu ndicachi cán súná da yéhe ña ná ndihvi da ndáa ndicachi ta jácana da rí cán tá quivi in in rí. Ta mé ndicachi cán ndícuni rí tachi dá já quéta rí cuahan rí caca nuu rí xihin dá. ⁴Ta tá sa naqueta ndihi rí já ndaca da ri. Ta cánúu da nu ri cuahan da já vaha cuahan rí xihin dá jáchí ndícuni vaha rí tachi dá. ⁵Joo co ndíco rí jatá ñayivi tóho jáchí co ndícuni rí tachi ná jáchí cúu ná na tóho. Ña cája rí quea xínu rí nu ná —nacachi Jesús xihin na fariseo.

⁶Ta ña yóho nasacuu in quiahva nasacu Jesús nuú na fariseo joo coó nacandaa ini na ña cúni mé á cachi a xihin ná.

⁷Anda já nacachi tucu Jesús já xihin ná:

—Mé a ndaa ná cahan i xihin ndo. Yehe cúu u tátuhun in yéhe nu yáha ndicachi já ndihvi rí corra ri. ⁸Tóco ndihi na naquixi tá cámaní xinu i ñuyívi yóho najándahvi na ñayivi ta cúu ná tátuhun na cuihná. Joo coó naxeen na cúu cuéntá mí i, na cúu tátuhun ndicachi taa johu na nu cahan na cán. ⁹Yehe cúu u tátuhun in yéhe ta ndá na ná quixi nuú i quiahva i

ñamanì nù ná quìhvi na já ná cacu ndaa ínima ná. Cúú á tátuhun núná nuú ndicachi quìhvi rí ini corra rì ta núná nuú rí queta tucu rí jáchi ìn yucu cuì nù rì xíxáhan rí.

10' Jáchi da cúú da cuìhná cán cája cuìhná da rì ta sáhní da rì ta jándihi da sahá rì. Joo yehe ñaquixi i ñuyíví yóho já ná cuu catacu vaha ñayivi ta já ná cuu coo vaha na anda ama cáa quivi. 11 Yehe cúú u tátuhun in da ndáa vaha ndicachi. Jáchi da cán co yíhví da quivi da sahá ndicachi jana dá. 12 Joo da quéhe yahvi sahá ña ndáa da ndicachi, ndáa da rì sahá yahvi quéhe da cán cuití va. Sahá ña cán quéa tá xíní da vaxi ndivahyí quehe rí in ndicachi, ña cája da quéa xínu da cuahan da ta jándacoo da ndicachi ndáhví cán. Jáchi co cúú dá da ndáa vaha rí ta ni jana dá co cúú ndicachi cán. Ta co sáhní da mé dá tá ná xínu coo ndivahyí ña ná tiin rí ndicachi cán cata nuu ñahá rì. 13 Da quéhe yahvi cán jándacoo da rì jáchi co cúú rí jana mé dá ta co sáhní da mé dá cúú ndicachi.

14' Joo yehe cúú u tátuhun in da ndáa vaha ndicachi. Tá quiahva xíní vaha da cán ndá rí cúú ndicachi jana dá quiahva já xíní vaha i ndá na cúú cuéntá mí i. Ta jári xíní vaha mé ná yehe. 15 Tá quiahva xíní vaha Ndióxi, tátá i yehe ta xíní vaha i mé á quiahva já xíní vaha i na cúú cuéntá mí i. Ta sahá ña yóho ìn tiahva i ndiquiahva i mí i quivi i sahá ná jáchi cúú ná tátuhun ndicachi jana i. 16 Joo ndúu java ga ñayivi inga ñuu ta cacuu na cuéntá mí i. Xíní ñúhú ndiquehe e na cán ña ná cuni johó na nu cáhan i. Ta in nduu ndihi na ña ná candaa i tóco ndihi na.

17' Quìhvi ini Ndióxi, tátá i yehe jáchi ndiquiahva i mí i quivi i sahá na cúú cuéntá mí i ta tá nandihí nditacu tucu u. 18 Ta ni in na a cúu cahní yehe ndaja nacuu joo ndiquiahva i mí i quivi i jáchi cúní caja i ña. Núná nuú i ndiquiahva i mí i quivi i ta núná nuú i nditacu tucu u. Ña yóho cúú chuun nasahnda tátá i nuú i caja i —nacachi Jesús.

19 Tá naxini johó na Israel cán ña yóho já nacasáhá na sáhndá táhan tucu na. 20 Ta cuahá táhan na cán nacasáhá cáchí na já:

—Ndá cuéntá quéa táa johó ndó nu cáhan da jan ta da nacatachi va cúú dá. Tiñáhá va ndácaan ini da —cáchí xihín táhan na.

21 Joo java na cáhan vaha na sahá Jesús já cáchí na já:

—Ni in toho ñayivi a cúu cáhan vaha nahá tátuhun cáhan Jesús yóho tá ndácaan tiñáhá ini ínima ná. Jáchi ama ná cuu caja ri tiñáhá jándiyehe rí nuú na cuáá —cáchí java na cán.

Cándají na Israel Jesús

22 Naxinu coo quivi cája na víco nu cuía ñuu Jerusalén tá cája cáhnu na quiví naxinu veñuhu cáhnu ñuu Jerusalén. Ta mé tiempo vixi nasacuu a cán. 23 Ta jivi ini mé veñuhu cáhnu cán nasahin Jesús ta xíca nuu a yati

yuyéhé naní Salomón. ²⁴Já naçava tiyivi na Israel cán mé á já naçasáhá ndáça tuhún na mé á já naçachi na já xihín á:

—Ndaja cáa chí quiví caxi tuhun ndaun xihín nde ña á jivi ndusa cúun Cristo, da chindahá Ndióxi cacomí cuéntá sahá ñayivi. Jáchi in ivi joho cáhun xíní nde ta co cándaa vaha ini nde á jivún á a juú tohún —naçachi na cán.

²⁵Anda já nanducú ñehe Jesús tuhun nu ná já naçachi a já:

—Sa naçahan vi xihín ndó joo coo naçandúsa ndó yehe. Tóco ndihi ña náhnu cája i, cája i ña xihín ndée sahan tátá i nuú i ta jivi mé ña náhnu jan náha nu ndó ña cúu u da nachindahá Ndióxi. ²⁶Joo ndóhó co cándúsa ndó yehe jáchi co cúu ndó tátuhun ndicachi janá i. ²⁷Joo ñayivi, na cúu tátuhun ndicachi janá i, na cán cúu na ndícuni nu cáhan i ta ndícuni i na ña cúu ná cuéntá mí i ta já ndíco na yehe. ²⁸Ta caja i ña ná catacu na anda ama cáa quiví já ná a ndíhi saha ná. Ta ni in túhún ñayivi a cúu caja candaa na cán ndahá i tá sa ñúhu na ndahá i. ²⁹Ndióxi, tátá i nasahan na cán nuú i ta mé á quéa cáhnu chága nu tóco ndihi náha. Ta ni in na a cúu caja candaa na cán ndáha mé á. ³⁰Yehe xihín Ndióxi, tátá i in cúu va nde —naçachi Jesús.

³¹Anda já natiin tucu na Israel cán yuu cuun na Jesús ña cahní ñahá na.

³²Anda já naçachi Jesús já xihín ná:

—Cuahá ndivaha ña náhnu naçaja i nu ndó, ña nasahan tátá i ñamaní nuú i caja i nu ndo yóho ta viti cachi ndó xihín i ndá quéa co táhan ini ndó xihín. Ndá cuéntá quéa vaxi ndó cuun ndó yuú yehe —naçachi Jesús.

³³Anda já naçachi na cán já xihín á:

—Co ndúcú toho nde cuun nde yuu yohó sahá ña náhnu cájún. Cuun nde yuu yohó cúni nde jáchi ndája núun Ndióxi. Jáchi cúun in taa tátuhun ndehe ta ndájún mún cúun Ndióxi —naçachi na cán.

³⁴Anda já naçachi Jesús já xihín ná:

—Nu ley najándacoo Moisés nu ndo cáchí a ña cúu ñayivi tátuhun Ndióxi sahá ña cúu ná jahyi mé á. ³⁵Ta sa cándaa vaha iní ña a cuú tahnu ña cáhan tuhun Ndióxi. Ta naçachi Ndióxi xihín na nandiquehe tuhun mé á ña cúu ná tátuhun Ndióxi. ³⁶Sahá ña cán quéa ndá cuéntá quéa cáchí ndo ña nandaja núu i Ndióxi sahá ña cáchí i cúu u in túhún jini já jahyi Ndióxi. Jáchi mé Ndióxi naçaxi a yehe ta nachindahá a yehe vaxi i ñuyiví yóho. ³⁷Sahá ña cán quéa co ndítahan candúsa ndó yehe tá ta co cája i ña náhnu tátuhun ña cája Ndióxi, tátá i. ³⁸Joo tá cája i ña já quéa xíní ñúhú candúsa ndó ña náhnu xíní ndo cája i vatí co cúni ndó candúsa ndó yehe. Ta xihín ña yóho cuu candúsa ndó ña in cúu Ndióxi, tátá i xihín i ta in cúu yehe xihín mé á —naçachi Jesús.

³⁹Anda já ndúcú tucu na tiin na a chicaan na a vecaa joo nachijehé a nu ná cuahan.

⁴⁰Ta já naquee tucu a cuahan chí inga xoo yuta Jordán nuú nacaja ndúta Juan ñayivi nu cuítí cán. Ta nacandoo Jesús nasahiin a cán. ⁴¹Ta cuahá ñayivi nacasáhá na xínu na nu á ta já cáchí xihin táhan na já:

—Mé a ndaa coó toho ñaha xitúhún nacaja Juan. Joo tóco ndihi ña nacachi da cán saha Jesús yóho cúú á ña ndaa —nacachi xihin táhan na cán.

⁴²Ta cuaha ná nacandúsa na Jesús mé nuú nasahiin a cán.

Tá najánditacu Jesús Lázaro

11 Ta ndaja coonaquehe cuehe in da naní Lázaro, da ñuu Betania. Ta jivi mé ñuu yóho cúú ri ñuu María xihin Marta, quihvi ña. ²Mé María, ña cúú quiahva Lázaro yóho cúú ña ña naxojo perfume jatá saha Jesús ta najándihichi ña do xihin ijí jini ña. ³Ta mé ña xihin quihvi ña nachindahá na chuun cuahan nuú Jesús ña cácahvi ndivaha Lázaro, da quihvi ini mé á.

⁴Ta tá nañehe Jesús tuhun yóho já nacachi a já:

—A juú cuehe cahní ñahá cúú toho ña yóho. Joo xihin cuehe yóho cuu nahá ndá quiahva cáhnu cúú Ndióxi. Ta xihin ña yóho nahá nuú ñayivi ndá quiahva cáhnu cúú yehe, da cúú in túhún jini já jahyi Ndióxi —nacachi a.

⁵Ta ndaja coo quihvi ndivaha ini Jesús Marta xihin quihvi ña ta quiahva já quihvi ri ini a Lázaro viti. ⁶Joo tá nañehe Jesús tuhun ña quihvi Lázaro já nacandoo a ivi quivi chága mé nuú nasahiin a cán. ⁷Ta tá nandihí já nacachi Jesús já xihin na xíca tuun xihin á:

—Xíhín ndo ná cohó tucú chí Judea —nacachi a.

⁸Anda já nacachi na cán já xihin á:

—Maestro, viti chá va ndúcú ñayivi ndúu cán cahní na ndohó xihin yuu ta cáa tucu ri ndó cuhun ndo cúni ndo —nacachi na.

⁹Joo sa xini Jesús ña cámaní xinu quivi quivi a saha ña cán quéa nacachi a já xihin ná:

—Candehé ndó. Uxu ivi hora ndáca in quivi ta tá xíca nuu na ndiví a cúú toho cachihin saha ná jáchi tívi xíca yéhe nu xíca na. ¹⁰Joo ndá na xíca nuu ñuú cuu cachihin saha ná jáchi co yéhe nu xíca na —nacachi Jesús.

¹¹Tá nandihí já nacachi tucu a já xihin ná:

—Sa naquiji va amigo yo Lázaro viti. Joo vílaá cuhun i ndiñehe e da —nacachi Jesús.

¹²Anda já nacachi na cán já xihin á:

—Maestro, tá ta nanaá ini da naquiji dá já quéa íin vaha da, dá já —nacachi na cán.

¹³Joo ña cúní cachi Jesús quéa sa naxihí va Lázaro vatí na xíca tuun xihín a cán nacahán na ña cúní mé á cachi a quéa naquiji Lázaro cán tá quiahva quíji tóco ndihi ñayivi. ¹⁴Anda já nacahan cáxí táhyí tucu Jesús xihín ná já nacachi a já:

—Naxihí va Lázaro. ¹⁵Joo cájii va ini i ña coó i ná sahiin i tá naxihí da jáchi ña yóho chindeé a ndohó já ná candúsa chága ndó yehe. Cóho candehe yo Lázaro —nacachi Jesús.

¹⁶Anda já nacasáhá Tomás, da cáhan na cuatí xihín cán cáhan da xihín java ga na xíca tuun xihín Jesús já cáchí da já:

—Cóho ri mí ví quiví xihín mé dá, dá já —cáchí da.

Já naquee na cuahan na.

Cúú cája Jesús ña ná nditacu tucu na sa naxihí

¹⁷Tá naxinu coo Jesús yati ñuu Betania cán já nañehe á tūhun ña sa naxihí Lázaro ta sa íin comí quiví nachicaan va na da ini in cáva. ¹⁸Mé ñuu Betania cán ñehe táhan yati a xihín Jerusalén tátūhun uní kilometro ñehe táhan. ¹⁹Ta cuaha táhan na Israel cán nasahan na ndúu tóo na xihín Marta xihín María tá quiahva jáyaha na ini na sahá ña naxihí Lázaro quiahva na. ²⁰Ta tá nañehe Marta tūhun ña cáyati Jesús ñuu cán cuahan já ndáva ña nasahan ñehe ñahá ña. Joo nacandoo María vehe. ²¹Tá nandique táhan Marta xihín Jesús já nacachi ña já xihín á:

—Xitoho, tá ná coo ndó yóho ta ni a quiví toho Lázaro quiahva i, nduu.

²²Joo cándaá vaha ini i ña tá ná caca ndó ña cúní mé ndó nu Ndióxi quiahva va mé a cán ña nu ndo —nacachi Marta.

²³Anda já nacachi Jesús já xihín ñá:

—Candehe Marta. A ndícani inún jáchi nditacu tucu va Lázaro, quiahvún jan —nacachi Jesús.

²⁴Anda já nacachi ña já xihín á:

—Sa xíní ví ña nditacu tucu quiahva i tá ná xinu coo quiví nu ndíhí tá ná nditacu tóco ndihi na sa naxihí —nacachi Marta.

²⁵Já nacachi Jesús já xihín ñá:

—Yehe cúú da cuu caja ña ná nditacu tucu ndii ta cuu caja i ña ná catacu ñayivi anda ama cáa quiví. Ta ndá na candeé ini yehe vatí ná quivi na catacu tá catacu na. ²⁶Ta tóco ndihi na candeé ini yehe catacu na anda ama cáa quiví ta a ndíhi toho saha ná ini indayá. Á cándúsún ña cáhan i xuhun —nacachi Jesús.

²⁷Anda já nacachi Marta já xihín á:

—Cándusa i ndohó ña cúu ndó in túhún jini já jahyi Ndióxi ta cándusa i ña mé ndó cúu Cristo, da nachindahá Ndióxi quixi ñuyívi yóho —nacachi ña xihin á.

Sácu Jesús saha Lázaro

28Tá nandihi já naquee Marta nasahan ña cana ña María quihvi ña. Ta já nacahan yaá ña xihin María já nacachi ña já xihin ña:

—Sa naxinu coo Jesús, xitoho í ta iin a yóho. Cuáhán nu iin a jáchi cána yohó —nacachi Marta xihin quihvi ña.

29Tá naxini johó María cán ña nacachi quihvi ña xihin ña chí ivi laá ndáva ña nasahan ña nu iin Jesús. 30Mé Jesús nasandati a cán yuhú ñuu, mé nuú nandique táhan xihin Marta cán. 31Ta ndaja coo mé na Israel, na ndúu jáyaha ini ña cán tá naxini na naquee númi johó ña cuahan ña já nandicuítá na ndíco na jata ña cuahan na. Jáchi nacahan na cuahan ña cuacu ña nu ndacaan Lázaro, quiahva ña. 32Ta tá naxinu coo ña nu iin Jesús já nacaxítí ña nu á já nacasáhá cáchí ña já xihin á:

—Tá ná coo ndó yóho, nduu ta ni a quívi toho Lázaro quiahva i —nacachi ña.

33Ta tá naxini Jesús ña sácu cóhó María xihin na Israel, na ndíco nasaa xihin ña cán já natahvi ndivaha ini a janda quiahva nandisaa ini a. 34Anda já nandaca tuhún a María cán já nacachi a já xihin ña:

—Ndájá nachicaan ndó da já —nacachi Jesús.

—Naha quíi ndó, xitoho i. Candehé ndo nuú nachicaan nde da —nacachi María.

35Anda já nasacu Jesús. 36Tá naxini na Israel ña yóho já nacasáhá cáchí xihin táhan na já:

—Candehé ndo ndaja náha naquihvi ini Jesús yóho Lázaro —nacachi na.

37Ta java na nacasáhá cáchí na já:

—Mé Jesús yóho nasuná da nduchú núu na cuaá. Á chí a cuú cuití caja da chindeé da Lázaro já ná a quívi da, nduu —nacachi java na cán.

Jánditacu tucu Jesús Lázaro

38Tá nandihi já nacasáhá táhvi ndivaha tucu ini Jesús ta já nacayati a nuú nachicaan na yiquí cuñu Lázaro. Mé nuú ndacaan da cán nasacuu a in ndica cáva ta in yuu jáhnda cáhnu nasaji nuu yéhe cán. 39Anda já nandicahan Jesús xihin java na ndúu cán ña ná jácaxoo na yuu ndájí nuu nu ndacaan Lázaro cán. Joo ndaja coo Marta, ña cúu quiahva mé ndii cán nacasáhá ña cáchí ña já xihin Jesús:

—Candehé ndo, xitoho i. Sa quini cúu sahan ndii quiahva i jan jáchi sa iin comí quívi naxihí da —nacachi ña.

⁴⁰Anda já nacachi Jesús já xihín ñá:

—Xíní ñúhú ndicuhun inún tá nacachi i xuhun ña tá ná candúsún Ndióxi já cunún ndá quiahva cáhnu ñaha cuu caja mé á —nacachi Jesús.

⁴¹Tá nandihí já najácaxoo na yuu cáhnu ña nasaji nuu nuú nasandacaan Lázaro. Já nandínehe Jesús nuu á chí indiví já nacachi a já:

—Tátá Ndióxi, ndíquiahva i ndixahvi nu ndo jáchi naxini johó ndó nuú nacahan i xihín ndo. ⁴²Vatí mé a ndaa cándaa vaha ini i ña níi tiempo xíní johó ndó nu cáhan i xihín ndo. Joo cáhan i ña yóho sahá ña ná cuni johó ñayivi ndúu xihín i yóho já ná candúsa na ña mé ndó nachindahá ndó yehe vaxi i ñuyíví yóho —nacachi Jesús ndíquiahva ndixahvi nu Ndióxi.

⁴³Tá nandihí já nacayuhú cóhó a já nacachi a já:

—Lázaro, cuáhán queta.

⁴⁴Tá nandihí já naqueta Lázaro nuú nasandacaan da. Nacava nuu ndáha dá anda saha dá xihín ticoto ta ndáji jáhma nuu dá naqueta da vaxi da. Anda já nacachi Jesús xihín java na ndúu cán ña ná ndaxí na da já ná quee da cuhun da. Ta já nacaja na.

Jándique táhan na Israel tuhun na ña tiin na Jesús chícaan na vecaa

(Mt. 26:1-5; Mr. 14:1-2; Lc. 22:1-2)

⁴⁵Ta cuaha táhan na Israel, na ndáca táhan nasahan xihín María cán tá naxini na ña najánditacu tucu Jesús Lázaro cán já nacandúsa na mé á.

⁴⁶Joo java táhan na Israel cán ndáva na nasahan na cáhan na xihín na fariseo ta nandicani na nu ná ña nacaja Jesús. ⁴⁷Anda já nacasáhá na fariseo xihín na sacuahá nuú jutú cán najátaca na tóco ndihí na sacuahá nuú na Israel já nacachi na já xihín ná:

—Ndía caja í xihín Jesús viti jáchi cuahá ndivaha ñaha xitúhún cája da yóho. ⁴⁸Xíní ñúhú caji nuu í nu dá jáchi tá ná a cáji nuu í nu dá vaxi quivi tá tóco ndihí ñayivi candeé ini na mé dá. Ta xihín ña yóho xinú ini na jutixia ñuu Roma quixi na jándicani na veñuhu í ta jándihí na saha tóco ndihí mí, na Israel —nacachi na.

⁴⁹Joo in táhan da ndúu cán naní da Caifás, da nasacuu da sacuahá chága nu ndíhi jutú mé cuia cán, nandicahan da já nacachi da já:

—Mé ndó cúu ndó ñayivi co xíní túni. ⁵⁰Jáchi co cándaa ini ndó ña vaha chága ña ná quivi in taa nu ndíhi ñayivi já ná a ndíhi saha tóco ndihí ñayivi. Ña cán quea cáhán i ña vaha chága ná quivi Jesús jan já ná a ndíhi saha mí —nacachi Caifás.

⁵¹Joo coo nacahan Caifás ña yóho sahá ña naquixi a jiní mé dá. Ndióxi quea najácahan ínima dá ña cáchí da já jáchi mé tiempo já nasacuu da sacuahá chága nu ndíhi jutú ta najácahan Ndióxi ínima dá ña ná cachi da ña ndítahan quivi Jesús sahá na Israel. ⁵²Ta a juú sahá in túhún na Israel

cuití va vaha jáchi mé Jesús nanditahan quivi a sahá tóco ndihi na cúu cuénta Ndióxi, na ndicuíta nuu ndúu ndijáá ñuyívi já ná cuu coo in ñuu. ⁵³Chí janda mé quivi já nasacu ini na Israel cán cahní na Jesús.

⁵⁴Sahá ña cán quéa coo naxica nuu tívi ga Jesús tañu na Israel cán. Ña nacaja mé á quéa naquee a estado Judea cán já nasahan chí in ñuu naní Efraín, ña íin yati xoo yucú íchí nuú coo ñayivi. Cán nasahiin a xihín na xica tuun xihín á.

⁵⁵Tá nacayati quivi coo vicó pascua cája na Israel já naquee cuahá ñayivi ndúu ndijáá ñuu cán cuahan na chí Jerusalén jáchi cúni na ndaja vii na mé ná, ná coo tiaha na tá quiaha nasahnda ley Moisés nu ná caja na tá camani chá quivi coo vicó pascua. ⁵⁶Tá nataca ñayivi ñuu Jerusalén cán nacasáhá ndúcú na Jesús. Joo nani ñúhu na veñuhu cáhnu cán ndáca tuhún táhan na sahá Jesús já cáchí xihín táhan na já:

—Ndaja xini ndo á quixi Jesús á a quíxi toho a vicó pascua yóho —nacachi xihín táhan na cán.

⁵⁷Ta na fariseo xihín na sacuahá nuú jutú nasahnda na chuun ña ndá na ná cuni Jesús já ná cuhun na caxi tuhun na xihín na cán ndájá íin a jáchi cúni na tiin na a chicaan na a vecaa.

Tá nachojó in ñañaáha perfume sahá Jesús

(Mt. 26:6-13; Mr. 14:3-9)

12 Ta tácamani iñu quivi coo vicó pascua já naquee Jesús nasahan ñuu Betania, mé ñuu nu íin Lázaro, da najánditacu tucu mé á cán. ²Ta cán nacaja ndívi na ña cajíni Jesús jáchi cúni na caja cáhnu na mé á. Ta mé Marta cúu ña cája ndívi nu ná. Ta Lázaro cúu in táhan da íin coo nu mesa xíxi xihín Jesús. ³Ta ndaja coo María nasahan ña quehe ña tátuhun java litro perfume, dó yahvi ndivaha. Jáchi cúu dó dó nacavaha xihín ndinuhu yucu támi sahan naní nardo. Najácuyu ña do jata sáha Jesús. Ta tá nandihí já najáhichi ña sahá xihín íj jini ña. Ta ní ini vehe cán nandicuíta nuu jíco perfume cán. ⁴Anda já naxini in táhan da xica tuun xihín Jesús, da naní Judas Iscariote cán ña yóho. Mé Judas yóho cúu dá da jíco tuhún Jesús tá nu ndíhi ta já cáchí da já:

⁵—Ndá cuénta quéa coo nacayahvi perfume yóho já ná cana jiuhún jasá yó nuú na ndahví, nduu. Jáchi quiaha na uni ciento denario sahá dó, nduu —nacachi Judas cán. Ta in denario cúu ña quéhe ñayivi cája chúun na in quivi.

⁶Joo coo nacachi Judas ña yóho sahá ña quíhvi ini ndusa da na ndahví, vaha. Nacachi da já jáchi cúu dá da cuíhná ta ndáha mé dá núhu ndihi jiuhún ta cája cuíhná da ña tá cúni da. ⁷Anda já nacachi Jesús já xihín dá:

—A cáhun xihín ñá jáchi nasacu vaha ñá do ña ná chojó ñá do yiquí cuñu i. Jáchi sa xini ñá ña sa nacayati quiví quivi i. ⁸Ta ní tiempo canduu na ndahví jan tañu ndó ta ndá tañu cúni mé ndó cuu chindeé ndó na. Joo yehe a cóo tuun toho i xihín ndo —nacachi Jesús.

Sácú ini na sacuahá nuú jutú cahní na Lázaro

⁹Cuahá na Israel cán nañehe ná tuhun ña íin Jesús ñuu Betania. Sahá ña cán queá nasahan na cán jáchi cúni na cuni na Jesús ta cúni na cuni na Lázaro, mé da najánditacu tucu Jesús. ¹⁰Anda já nasacu ini na sacuahá nuú jutú cán cahní ri na Lázaro viti. ¹¹Jáchi saha Lázaro cán cuahá na Israel nacasáhá na cándéé ini na Jesús. Ta najándacoo na ndíco na jatá na sacuahá nuú na Israel.

Tá naquihvi Jesús ñuu Jerusalén

(Mt. 21:1-11; Mr. 11:1-11; Lc. 19:28-40)

¹²Ta inga quiví itaan cuahá ndivaha ñayivi naxinu coo na ñuu Jerusalén nuú coo vicó pascua. Ta tá nacandaa ini na ña xinu coo Jesús ñuu Jerusalén cán ¹³já nasahan na nasahnda na ndáha tó ñuu já ndáva na nasahan na nañehe ñahá na. Ta cáyuhú na já cáchí na já:

—Cája cáhnu í Ndióxi. Cáhnu nahá ná cacuu da cómi cuéntá saha na Israel jáchi cúu dá da vaxi yuhú nuu Ndióxi —cáchí na.

¹⁴Nanditahan Jesús in búrru ta nasanúu a ri tá quiahva nacachi tuhun Ndióxi sanahá tá cáchí a já:

¹⁵A cáyihví toho ndó, na ndúu ñuu Sión.

Candehé ndó da cómi cuéntá saha ndó jan,

cánúu da jatá búrru loho vaxi da, cáchí tuhun Ndióxi.

¹⁶Ta cóo nacandaa ini na xica tuun xihín Jesús cán ndá cuéntá queá cája ñayivi já xihín á. Joo chága chí nuu tá sa nandindita Jesús cuahan indivi já nacandaa ini na ña quiahva já ndaa nuú tuhun Ndióxi sanahá ña caja na xihín Jesús.

¹⁷Mé ñayivi, na nasanduu xihín Jesús tá nacaahan xihín Lázaro ña ná queta da nuú nanduxu da ña nditacu da, mé na cán nandicani na nuú java ga ñayivi ña naxini na nacaja Jesús cán. ¹⁸Sahá ña cán queá naqueta ñayivi nasahan na ñehe ná Jesús jáchi nañehe ná tuhun saha ña cáhnu nacaja mé a cán. ¹⁹Tá naxini na fariseo ña yóho já nacasáhá cáchí xihín táhan na já:

—Candehé ndo. Ndá cuu caja í quee vaha í xihín da jan. Jáchi tóco ndihi ñayivi cáti na cuahan na xihín da jan —nacachi xihín táhan na fariseo cán.

Java na griego ndínducú na Jesús

²⁰Tañu ñayivi cuaha naxinu coo cája cáhnu Ndióxi víco ñuu Jerusalén cán naxinu coo ri java na naquixi chí ñundáhyi cuéntá Grecia. ²¹Ta mé na

griego yóho n̄acayati na n̄u Felipe, da ñuu Betsaida cuéntá Galilea cán. Ta já n̄acasáhá n̄a cáhan ndahví n̄a xihín dá já n̄acachi na já xihín dá:

—Cáhan nde xihín Jesús cúni nde —n̄acachi na.

²²Anda já naquee Felipe n̄asahan da caxi t̄uhun da xihín Andrés ta já ndáca táhan ndívi da n̄asahan da ndícani da ña nuú Jesús. ²³Anda já n̄acachi Jesús já xihín dá:

—Sa n̄axinu coo va tiempo caja cáhnu Ndióxi yehe, da n̄achindahá mé á nduu ñayivi. ²⁴Mé a ndaa ná cáhan i xihín ndo. Tá quiahva ndihi sahá in ndiquí trigo tá ndícava ña ini ñundáhyi quiahva já ndítahan nuú i quivi i. Jáchí tá ná a ndíhi sahá ndiquí trigo cán já in já cacuu va ña. Joo tá ná ndihi sahá ña cán já nduta ña ta já ndicuahá ndivaha ña. ²⁵Ndá na cátóo chága cája ña cúni mé cuití na a juú ga ña cúni Ndióxi, na cán cúu na ndihi sahá. Joo na cája ña cúni Ndióxi, na cán cúu na catacu anda ama cáa quivi. ²⁶Ta ndá na cúni caja chúun cuéntá mí i ndítahan n̄u ná candico na yehe. Jáchí nuú coo yehe, cán coo ri na cája ña cúni yehe. Ta na cán cacuu na na ndínehe jícó Ndióxi.

Cáxi t̄uhun Jesús ña quivi a

²⁷Ta viti ñúhú cácuéha ndivaha ini i. Ta a cúu caca tahví i n̄u Ndióxi ña ná a quiahva mé á ñamaní ndoho ini i jáchí sahá chuun yóho n̄aquixi i ñuyíví yóho. ²⁸Ña ndítahan cachi i quéa: “Tátá Ndióxi, cáhnu ná cacuu mé ndó” —n̄acachi Jesús.

Tá n̄acachi Jesús ña yóho, n̄acahan Ndióxi indiví já n̄acachi a já:

—Sa n̄andaja cáhnu i mí i ta caja tucu u ña —n̄acachi a.

²⁹Ta ñayivi ndúu cán tá n̄axini johó na ña yóho já n̄acachi na ña javi va cána. Ta java na n̄acachi na táto Ndióxi quéa n̄acahan.

³⁰Anda já n̄andicahan Jesús xihín ná já n̄acachi a já:

—A juú sahá yehe n̄axini johó ndó ña yóho. Joo n̄acatácu a já ná cuni johó mé ndó. ³¹Ta sa n̄atandaa quiví cavií sahá ñayivi ndúu ñuyíví ta sa n̄atandaa quivi ndihi sahá ña cája tiñáhá sacuahá, mé rí sáhdá chuun ñuyíví yóho. ³²Jáchí tá ná cata caa na yehe já caja i ña ná casáhá ñayivi níi cúu ñuyíví candeé ini na yehe —n̄acachi Jesús.

³³Xihín ña yóho cúni mé á ndícani a n̄u ná ña quivi a ndica crúxu.

³⁴Anda já n̄acachi ñayivi ndúu cán já xihín á:

—Tá cáhvi nde ley Moisés n̄acahyi sanahá já cándaa ini nde ña anda ama cáa quivi catacu da chindahá Ndióxi cacomí cuéntá sahá ñayivi. Yo já cúu da cáhun sahá. Tá tá mé a ndaa cúun da n̄achindahá Ndióxi nduu ñayivi, da catacu anda ama cáa quivi ndá cuéntá quéa cáhun quivún —n̄acachi na xihín Jesús.

³⁵Já n̄acachi Jesús já xihín ná:

—Yehe cúú da jándiyehé ínimā ñayivi ta coo tóo loho chága i xihin ndo. Sahá ña cán queá xíní ñúhú caca nuu ndó nani jándiyehé íchí cūhun ndo ta viti núná nu ndó caja ndó ña. Jáchí vaxi quiví quivi i caja na ta anda já cacuu a tátuhun canaá yávi ta já a cándaā ini ndó ndá xoo cūhun ndo. ³⁶Xíní ñúhú candeé ini ndó yehe jáchí cúú u da jándiyehé nu ndó nani íin i xihin ndó. Anda jáví xinu coo ndó cacuu ndó ñayivi cuéntá mí i —ñacachi Jesús.

Tá nandihí já ñaquee Jesús cuahan chíjehé a nu ná.

Có cándúsa na Israel Jesús

³⁷Vatí ñacaja Jesús cuahá ña xitúhún nuú ñayivi cán joo coo ñaxeen na candúsa na mé á. ³⁸Já ñasahiin jáchí nanditahan xinu coo nuú tuhun ña ñacahyí Isaías sanahá cán tá ñacachi a já:

Tátá Ndióxi, có cúni na candúsa na tuhun ña cáhan í xihin ná.

Vatí xíní na ña náhnu cája mé ndó joo có cúni na candúsa na ndohó, já ñacahyí Isaías sanahá.

³⁹Sahá ña cán queá coo ñacuu candúsa ñahá ñayivi cán. Ta inga tucu tuhun ñacahyí Isaías queá cáchí já:

⁴⁰Mé Ndióxi queá najácuaá ñahá ta coo ñasuná a ínimā ná,

já ná a cúu candaā ini na yo cúú mé á,

já ná a cúu ndicó coo na nu mé á ña ná ndaja vaha mé á na, ñacahyí Isaías.

⁴¹Quiáhva já ñacahan Isaías jáchí ñaxini mé dá ndá quiahva cáhnu cúú Jesús.

⁴²Ta cuahá táhan na Israel cán ñacandeé ini na Jesús. Ta janda java na sacuahá nuú na Israel cán ñacandeé ini na Jesús. Joo coo ñaxeen na ñaha tuhun na sahá jáchí ñayihví na taxí na fariseo cán na veñuhu. ⁴³Jáchí cúni na candoo vaha chága na nuú ñayivi a juú ga nu Ndióxi.

Táhví ini ñayivi sahá cuachi na tá xíní johó na nu cáhan Jesús

⁴⁴Tá nandihí já ñacahan cóhó Jesús já ñacachi a já:

—Ndá na candeé ini yehe já queá a juú in túhún yehe candeé ini na, vaha. Jáchí candeé ini ri na Ndióxi, tátá i, mé a ñachindahá yehe vaxi i ñuyiví yóho. ⁴⁵Ta ndá na xíní yehe xíní ri na mé a ñachindahá yehe vaxi i ñuyiví. ⁴⁶Yehe ñaquixi i ñuyiví yóho ña ná jándiyehé ínimā ñayivi já queá ndá na ná candeé ini yehe, a cánduu ga na nuú naá. ⁴⁷Joo na xíní johó nu cáhan i ta có cája na ña, a juú toho yehe chícāan cuachi jata ná. Joo tuhun cáhan i queá chícāan cuachi jata ná. Jáchí coo vaxi i ñuyiví yóho chícāan i cuachi jata ñayivi. Ñaquixi i já ná cuu cacu ndaa ínimā ná. ⁴⁸Ndá na cándají yehe ta có cúni na caja na ña cáchí i xihin ná, na cán cúú na cūhun

indayá jáchi mé tuhun nacahan i cacuu a ña chicaan cuachi jata ná tá ná xinu coo mé quiví nu ndíhí cuíí. ⁴⁹Jáchi co jánaha i ña quíxi jiní mé cuití i. Tóco ndihi ña cáhan i ta tóco ndihi ña jánaha i nuú ñayivi cúú á ña nachindahá Ndióxi, tátá i yehe jánaha i nu ná. ⁵⁰Ta cándaá cáxi ini i ña tóco ndihi ña jánaha Ndióxi, tátá i caja ña ná cuhun na coo na indiví anda ama cáa quiví. Ta tóco ndihi ña cáhan i xihín ñayivi, cáhan i ña tá quiahva nasahnda Ndióxi, tátá i nuú i caja i —nacachi Jesús.

Jándoo Jesús sahá na xíca tuun xihín á

13 Tácamaní in quiví coo vicó pascua já sa xíní Jesús ña sa naxinu coo quiví quivi a jándacoo a ñuyiví yóho já ndaa mé á ndique táhan xihín Ndióxi, tátá a. Níí tiempo naquihví ini Jesús tóco ndihi na cúú cuéntá mé á ndúu ñuyiví yóho ta coo najándacoo mé á ña quíhvi ini a na.

²Ta ndaja coo íin Jesús xihín na xíca tuun xihín á xijíni na. Jihna sa najacahan tiñahá sacuahá Judas Iscariote, da cúú jahyi Simón, ña ná jicó túhún da Jesús. ³Joo sa xíní vaha Jesús ña nasahan Ndióxi, tátá a tóco ndihi ndée á nu mé á. Ta sa xíní a ña naquixi a nu Ndióxi ta jivi nu Ndióxi ndindita tucu a cuhun a. ⁴Ta nani xijíni na nandaca ndichi Jesús já natavá a cotó níhnu a ta já natiin a in jáhma nachínee a tóco á. ⁵Tá nandihí já nataán a ticuíí ini in tisahan loho já nacasáhá jándoo a sahá na xíca tuun xihín a cán. Ta já najándihichi a saha ná xihín jáhma cánee tóco á cán.

⁶Ta tá nanditahan ndoo saha Simón Pedro já nandaca túhún da Jesús já cáchí da já:

—Á mé a ndaa jándoo ndó sahá i, xitoho i —nacachi da.

⁷Já nacachi Jesús já xihín dá:

—Viti ñúhú co cándaá toho inún ndía queá cája i yóho joo chága chí nuu já candaá inún ndá cuéntá queá cája i já —nacachi Jesús.

⁸Anda já nacachi Pedro já:

—Chí a quiahva toho mí i ñamaní nu ndó jándoo ndó sahá i —nacachi da.

Anda já nacachi Jesús já xihín dá:

—Tá ná a quiahvún ñamaní jándoo i sahún já a cúu cacuún cuéntá mí i —nacachi Jesús.

⁹Anda já nacachi tucu da já xihín Jesús:

—Tá ta já cáchí ndo quiahva va i sahá i jándoo ndó ta quiahva ri ñamaní jándahá ndó yehe ta quiahva ri ñamaní chihin ndó jiní i viti —nacachi da.

¹⁰Anda já nanducú ñehe Jesús tuhun nu dá já nacachi a já xihín dá:

—Tá sa nachichi vaha ñayivi já ndúu víí na ta saha cuití va ndó xíní ñúhú ndicata i. Mé ndó, na xíca tuun xihín i, sa ndúu víí ndo jáchi sa

najándoo i cuachi ndó sahá ña cándeé ini ndó yehe vatí a juú ndihi ndó ndúu vií —ñacachi Jesús.

¹¹Ñacachi Jesús a juú ndihi na ndúu vií jáchi sa ñacandaa va ini mé á ndá da cúu da jicó túhún ñahá.

¹²Tá nandihí najándoo Jesús saha ná já ñacandixi tucu a cotó níhnu a. Já nasacoo tucu a nu mesa já ñacachi a já xihín ná:

—Cája i cuénta co cándaa vaha ini ndó ndá cuénta quea najándoo i saha ndo. Sahá ña cán quea ndicani i ña nu ndo viti. ¹³Mé ndó cáchi ndo maestro xihín i ta cáchi ndo cúu u xitoho ndó ta ndaa cáhan ndó jáchi jivi ndusa i. ¹⁴Ta viti candehé ndó. Yehe cúu u maestro ndo ta cúu u xitoho ndó ta najándoo i saha ndo. Sahá ña cán quea quiahva já ndítahan caja ndó xihín ndaja táhan mé ndó. ¹⁵Sa nasacu u in quiahva nu ndo ta ndítahan caja ndó tá quiahva ñacaja mí i xihín ndo. ¹⁶Xíní ñúhú cándaa ini ndó ña ni in túhún toho mozo a cuú cacuu da da cáhnu chága a juú ga xitoho da. Ta mé a ndaa ín chága sahá in da sáhndá chuun a juú ga mé da cuahan caja chúun cán. ¹⁷Tá ñacandaa ini ndó ña cáhan i xihín ndo yóho ta tá ná caja ndó ña já quea cuu cajii ini ndó.

¹⁸A juú saha tóco ndihi ndó cáhan i jáchi sa cándaa vaha ini mí i ndá ndó ñacaxi i. Joo sahá in ndó ndítahan xinu coo nuú tuhun Ndióxi tá ñacachi a já: “In da sácoo tuun xixi xihín i, da cán cúu da nandicuítá xihín i”, cáchi tuhun Ndióxi. ¹⁹Sa cáxi tuhun cuéé e ña yóho xihín ndo já quea tá sa naxinu ña yóho já candeeé ini ndó yehe, ña cúu u da cáchi i cúu u. ²⁰Mé a ndaa ná cáhan i xihín ndo. Ndá na ná ndiquehe vaha in da ná chindahá i, cúu á tátuhun ndíquehe vaha na yehe. Ta ndá na ndíquehe vaha yehe, ndíquehe vaha ri na Ndióxi, mé a ñachindahá yehe quixi i ñuyívi yóho —ñacachi Jesús.

Cáxi tuhun Jesús ña cúu Judas da jicó túhún ñahá

(Mt. 26:20-25; Mr. 14:17-21; Lc. 22:21-23)

²¹Tá nandihí ñacachi Jesús ña yóho já ñacacuéha ndivaha ini a já ñacachi a já:

—Mé a ndaa ná cáhan i xihín ndo. In táhan ndó cacuu da cuhun jicó túhún yehe —ñacachi Jesús.

²²Tá nandihí já ñacasáhá na xíca tuun xihín Jesús cán sándeheé nu táhan na. “Yo saha cáhan Jesús”, cáhan na. ²³Jíin Jesús cán ín coo in táhan da xíca tuun xihín á, da quíhvi ini mé á cán. ²⁴Sahá ña cán quea ñacuu ndáha Simón Pedro nu dá ña ná ndaca tuhún da mé á saha ndá da cúu da jicó túhún ñahá. ²⁵Anda já ñacativi chága da cán jíin Jesús já ñacasáhá da ndaca tuhún ñahá da já ñacachi da já:

—Ndá da cúu dá, xitoho i —ñacachi da.

²⁶Anda já nacachi Jesús já xihín dá:

—Viti ñúhú chindaxi i in túhun pan ta ndá da ná quiahva i túhun pan cán nuu, da cán cúú dá —nacachi Jesús.

Tá nandihí já nachindaxi a in túhun pan já nasahan ña nu Judas Iscariote, da cúú jahyi Simón. ²⁷Ta tá natiin Judas pan cán chí ivi laá nandihvi tiñáhá sacuahá ini da. Já nacachi Jesús já xihín dá:

—Xíní ñúhú ndihí inún cajún ña nasacu inún cajún —nacachi Jesús.

²⁸Joo ni in túhún java ga na ndúu coo xíxi xihín Jesús cán coo nacandaa ini na ndá cuéntá quea nacachi Jesús ña yóho xihín Judas. ²⁹Java na nacahán na ña nasahnda Jesús chuun nu Judas ña ná cūhun da cueen da ñaha cuéntá víco pascua. Ta java na nacahán na ña nasahnda chuun nu dá ña ná jasá da jīhún nuú na ndahví jáchi ndáha mé dá ñúhu ndihí jīhún. ³⁰Tá nandihí natiin Judas pan nasahan Jesús nu dá chí ivi laá naquee da cuahan da. Ta sa ñuú va quea cán.

Ndítahan quihvi ini táhan na cúú cuéntá Jesús

³¹Tá sa naqueta Judas cuahan da já nacasáhá cáchi Jesús já xihín na xíca tuun xihín á:

—Viti ndusa quea nacasáhá ndicáhnū ndivaha yehe, da nachindahá Ndióxi nduu ñayivi. Ta sahá ña caja i ndicáhnū ndivaha Ndióxi, tátá i.

³²Ta tá náha yehe ndá quiahva cáhnū cúú Ndióxi, tátá i quiahva já náha ri Ndióxi ndá quiahva cáhnū cúú yehe, da nachindahá Ndióxi nduu ñayivi. Ta ja chá cámaní coo tóco ndihí ña yóho. ³³Candehé ndo, jahyi mání i. Ja chá cuití tiempo coo i xihín ndo. Anda já ndinducú ndó yehe joo a ndínehe ndó yehe. Ndítahan ndicūhun ini ndó tá nacachi i xihín na Israel ña a cúu cūhun na nuú cūhun yehe. Quiahva já cáchi ri xihín ndóhó va: A cúu cūhun ndó nuú cūhun i. ³⁴Ta viti sáhndá i inga chuun nu ndo ta cúú á ña saá. Ta ña yóho cúú á: Ndítahan quihvi ini táhan ndó. Tá quiahva quihvi ini yehe ndóhó quiahva já ndítahan quihvi ri ini táhan ndó. ³⁵Jáchi tá ná quihvi ini táhan ndó já candaa ini tóco ndihí ñayivi ña mé a ndaa táhyí cúú ndó cuéntá mí i —nacachi Jesús.

Cáxi tūhun Jesús ña chijehé tūhun Pedro ña xíní da mé á

(Mt. 26:31-35; Mr. 14:27-31; Lc. 22:31-34)

³⁶Anda já nandaca tūhún Simón Pedro cán Jesús já nacachi da já xihín á:

—Xitoho i, ndájá cūhun ndó já —nacachi da.

Anda já nacachi Jesús já xihín dá:

—A cúú toho cūhun yóhó nuú cūhun i viti. Joo cacuáchi lohún já xīnu coún cán —nacachi Jesús.

³⁷Anda já nacachi Pedro já xihín Jesús:

—Ndá cuéntá quéa cáchí ndo ña a cúu candico i ndohó cūhun i nuú cūhun ndó viti. Jáchí sa íin tiahvā i quivi i saha ndo —ñacachi Pedro.

³⁸Já nanducú ñehe Jesús tūhun nu dá já ñacachi a já xihín dá:

—Mé a ndaa ná cāhan i xūhun. Vatí íin tiahvún quivún sahá i joo tá cámaní cana chéle já uní tañu chijehé tūhún sahá i ta cāhún ña co xíní tohún yehe —ñacachi Jesús xihín Pedro.

Ndáca Jesús ñayivi cūhun na nu Ndióxi, tátá a

14 Jánacachi tucu Jesús já:

—Coto a ndícani ini ndó. Ndítahan candeé ini ndó Ndióxi ta ndítahan candeé ini ndó yehe. ²Mé nu íin Ndióxi, tátá i, cán íin cuahá ndivaha nu núná nu ndó canduu ndó. Tá ná a cóo nuú canduu ndó cán janda mé saha va sa ñacaxi tūhun i xihín ndó, nduu. Ta cūhun i cacu tiahvā i mé nuú canduu ndó cán. ³Tá sa ná quee e cūhun i ta tá sa ná caja ndíví i nuú canduu ndó cán já quixi tucu u ndiquehe e ndohó já ná cūhun ndó canduu ndó xihín i mé nuú coo i cán. ⁴Mé ndó sa xíní ndó ndá íchí candico ndó já cuu saa ndó nuú cūhun i —ñacachi Jesús xihín na xíca tuun xihín a cán.

⁵Anda já nandicāhan Tomás xihín Jesús já ñacachi da já xihín á:

—Mé nde co xíní toho nde ndájá cūhun ndo, xitoho nde. Ndaja caja ri nde candaā ini nde ndá íchí quehe nde cūhun nde —ñacachi da xihín á.

⁶Já nanducú ñehe Jesús tūhun nu dá já ñacachi a já xihín dá:

—Yehe cúu tátūhun íchí ña ndítahan candico ñayivi ta yehe cúu da jánaha ña ndaa. Ta yehe cúu da cája ña ná catacu ñayivi anda ama cáa quiví. Ta in túhún yehe ndítahan candeé ini ñayivi já ná cuu xínu coo na nu Ndióxi, tátá i. ⁷Tá xíní ndó yo cúu yehe já xíní ri ndó yo cúu Ndióxi, tátá i. Ta viti xihín chí nuu xíní ndó a jáchí sa ñaxini ndó a —ñacachi Jesús.

⁸Anda já ñacachi Felipe já xihín Jesús:

—Xitoho nde, jánaha ndó nuú nde yo cúu tátá ndo já ná cajíi ini nde —ñacachi da.

⁹Anda já ñacachi Jesús já xihín dá:

—Ndá cuéntá quéa cáchún já jáchí janda jihna ndivaha va íin i xihín ndo ta sa ndítahan candaā ini ndó yo cúu yehe. Jáchí ndá na sa xíní yo cúu yehe xíní ri na yo cúu Ndióxi, tátá i. Sahá ña cán quéa ndá cuéntá quéa cúni ndó ña ná jánaha i tátá i nu ndo. ¹⁰Xíní ñúhú candúsa ndó ña in cúu va yehe xihín Ndióxi, tátá i ta in cúu va mé á xihín i. Tóco ndihi ña cāhan i xihín ndo yóho co cāhan i ña sahá ña quíxi a jíní mé cuití ví. Cāhan i ña quixi nu Ndióxi jáchí íin mé á xihín i. Ta chuun cája i quixi a nu Ndióxi jáchí cája chúun mé á. ¹¹Xíní ñúhú candúsa ndó ña in cúu yehe xihín

Ndióxi, tátá i ta in cúu Ndióxi, tátá i xihín i. Ta tá co cúni ndó candúsa ndó ña já quea xini ñuhú candúsa ndó ña sahá ña náhnu naxini ndó nacaja i. ¹²Mé a ndaa ná cahan i xihin ndo. Ndá na cándeé ini yehe, cuu caja na ña xituhún tátuhun ña cája mí i. Ta janda ña náhnu chága cuu caja na jáchi cūhun i nu íin Ndióxi, tátá i. ¹³Ta tóco ndihi ña caca ndó nu Ndióxi, xini ñuhú caca ndó ña xihín quivi mí i já ná caja i ña. Ta ndicáhnu Ndióxi, tátá i xihín ña caja i saha ndo. ¹⁴Ta caja i ndá ña ná caca ndo nuú i tá ná caca ndó ña xihín quivi mí i.

Sáhan Jesús tuhun a ña chindahá a ínima yii Ndióxi cañuhu a ini ñayivi

¹⁵Tá mé a ndaa quíhvi ini ndó yehe, caja tá caja ndó ña sáhdá i nu ndo caja ndó. ¹⁶Ta caca i nu Ndióxi, tátá i ña ná chindahá mé á ínima yii mé á nu ndo. Ta chindeé mé á ndohó já ná quiahva tuhun ndéé ini ndó ta já cuu coo tuun a xihin ndo. ¹⁷Joo ñayivi, na co cúu cuéntá mí i, a cúu ndiquehe na ña jáchi co cándaa ini na yo cúu mé á ta ni co cúni na ndiquehe vaha na ña. Joo ndóhó xini vaha ndó a jáchi sa íin a xihin ndo ta ní tiempo cañuhu a ini ndó. ¹⁸A jándacoo ndáha toho i ndohó jáchi ndicó coo tucu u já coo i xihin ndo. ¹⁹Ja chá cuití ta a cúní ga ñayivi cuéntá ñuyívi yehe. Joo mé ndó cuni tá cuni ndó yehe. Ta sahá ña nditacu tucu u sahá ña cán quea cuu catacu mé ndó anda ama cáa quivi. ²⁰Ta mé quivi cán cándaa ini ndó ña mé a ndaa in cúu yehe xihin Ndióxi, tátá i. Ta cándaa ini ndó ña quiahva já in cúu ndó xihín i ta in cúu yehe xihin mé ndó viti. ²¹Ndá na ndiquehe vaha tuhun cahan i ta cája na ña, náha na xihín ña yóho ña mé a ndaa quíhvi ini na yehe. Ta mé Ndióxi, tátá i quíhvi ini a ndijáa na quíhvi ini yehe. Ta quíhvi ri ini yehe na ta náha i mí i nu ná —nacachi Jesús.

²²Anda já in da naní Judas, da co cúu toho da naní Judas Iscariote, nandaca tuhún da Jesús já nacachi da já xihin á:

—Xitoho nde, ndá cuéntá quea cáchí ndó ña náha ndó mé ndó nuú nde joo a náha toho ndó mé ndó nuú ñayivi cuéntá ñuyívi —nacachi da.

²³Já nanducú ñehe Jesús tuhun nu dá já nacachi a já xihin dá:

—Ndá na quíhvi ini yehe, na cán cúu na cája ña cahan i. Ta já quíhvi ini Ndióxi, tátá i na ta já quixi nde coo nde xihin ná. ²⁴Joo na co quíhvi ini yehe, na cán cúu na quéhe núu tuhun cahan i. Ta mé tuhun cahan i nu ndó yóho co cúu á ña quíxi jini mí i. Cúu á tuhun Ndióxi, tátá i, mé a nanchindahá yehe quixi i ñuyívi yóho.

²⁵Tóco ndihi ña yóho ndicani i ña nu ndó viti nani íin i xihin ndo. ²⁶Joo ínima yii Ndióxi, mé a chindahá Ndióxi yuhú nuú i quixi a, chindeé a ndohó. Mé a cán quea jánáha tóco ndihi náha nu ndo. Ta jándicūhun a ini ndó tóco ndihi ña nacachi i xihin ndo.

27'Tá sa ná quee e cūhun i já caja i ña ná coo vaha ini ndó. Joo a cácuu a tátuhun tá cája ñayivi cuénta ñuyívi. "Ná coo vaha ini ndó", cáchí xihín táhan na joo coo íin vaha ini xihín táhan na. Coto a ndícani nahá ini ndó ta coto a yíhvi ndo jáchi caja i ña ná coo vaha ini ndó. 28Sa naxini johó ndó ña nacachi i xihín ndo ña quee e cūhun i ta ndicó coo tucu u já coo i xihín ndo. Ta tá mé a ndaa quíhvi ndusa ini ndó yehe já quea cajii ini ndó sahá ña cáchí i cūhun i nu íin Ndióxi, tátá i. Ta íin chága saha mé á a juú ga yehe. 29Sa ndícani cuéé vi ña yóho nu ndo já quea tá ná xinu coo ña cáchí i xihín ndo coo já quea cuu candúsa ndó yehe.

30Ja chá cuití va coo i ñuyívi yóho nditúhún i xihín ndo jáchi sa natandaa hora xinu rí quini, rí cómi cuénta sahá ñayivi ñuyívi yóho vatí mé a ndaa coo ndée rí caja rí ni in ñaha xihín i. 31Joo yaha tá yaha ña cúni ri caja rí xihín i. Ta xihín ña yóho candaa ini ñayivi ndúu ñuyívi ña mé a ndaa quíhvi ini ndusa i Ndióxi, tátá i ta cája i ña nasahnda mé á nuú i caja i. Candichi ndó. Xihín ndo ná cohó —nacachi Jesús xihín na xíca tuun xihín a cán.

Jesús cúu á tátuhun in tó uva

15 Andá já nacachi tucu Jesús já xihín ná: —Yehe cúu ndusa tátuhun in tó uva ta Ndióxi, tátá i cúu á tátuhun da ndája víi saha mé tó uva cán. 2Ta ñayivi cúu ná tátuhun ndáha tó uva cán. Ta ndá na coo xéen caja ña cúni Ndióxi jácaxoo a na nu mé á tá quiahva cája da ndája víi dó cán tá chítuhun dá ndáha tó uva, ña coo cána uva nuu. Joo tá cána cuaha uva nu do já quea ndája víi da ndáha do ta ndíjatá da do já ná cana cuaha chága uva nu do. Quiahva já cája ri Ndióxi xihín ñayivi, na cája ña cúni mé á. 3Joo mé ndó sa nandivií va ndó jáchi naxini johó ndó ña jánaha i nu ndo. 4Xíní ñúhú in cacuu ndó xihín i tá quiahva in cúu yehe xihín ndo. Jáchi in ndáha tó uva a cuú cana uva nu do tá coo tíin dó tóco tó uva cán. Quiahva já íin ri xihín ndóhó va. A cúu caja ndó ña cúni Ndióxi tá coo in cúu ndó xihín i.

5Yehe cúu u tátuhun tó uva ta ndóhó cúu ndó tátuhun ndáha mé tó uva cán. Ta ndá na in cúu xihín i tá quiahva in cúu u xihín ná já quea cuu caja ndihi na ña cúni Ndióxi. Cacuu a tátuhun cána cuaha uva vaha nu ndáha tó uva cán. Jáchi mé a ndaa ni in túhún ñaha a cúu caja ndó tá ná a chindeé yehe ndóhó. 6Ta ndá na coo cúni in cacuu xihín i, na cán cúu na jácaxoo Ndióxi. Ta cúu ná tátuhun in ndáha tó uva, dó sa nahichi ta nditaca dó cūhun dó cayi do.

7'Tá in ná cacuu ndó xihín i ta tá ná caja ndó ña najánaha i nu ndo já cuu caca ndó ndá ña cúni mé ndó nuú i já quiahva i ña nu ndo. 8Mé Ndióxi, tátá i ndicáhnú ndivaha tá ná caja ndó ña cúni a xihín ndinuhu ini

ndó. Ta xihín ña yóho náha ndó ña cúu ndó cuéntá mí i. ⁹Quíhvi ini i ndohó tá quiahva quíhvi ini Ndióxi, tátá i yehe. Xíní ñúhú coo tuun ndó xihín i jáchi quíhvi ini i ndohó. ¹⁰Tá ná caja ndó tóco ndihi ña sáhndá i nu ndo caja ndó já queá coo tuun ndó xihín i jáchi quíhvi ini i ndohó. Quiahva já cája ri yehe va. Cája i tóco ndihi ña nasahnda Ndióxi, tátá i caja i ta xihín ña yóho íin tuun i xihín á jáchi quíhvi ini a yehe.

¹¹Cáxi tuhun i ña yóho xihín ndo já ná cajii íní ndo tá quiahva cájii íní yehe. Ta xihín ña yóho ndicutú ndaa ínima ndo xihín ña cájii ini ndó.

¹²Cuni johó ndó ña sáhndá i nu ndo yóho: Ndítahan quíhvi ini táhan ndó tá quiahva quíhvi ini yehe ndohó. ¹³Tá mé a ndaa táhyí quíhvi ini ñayivi ñani táhan na já queá íin tiahva na quivi na saha ná. ¹⁴Mé ndó cúu ndó amigo i tá cája ndó ña sáhndá i nu ndó caja ndó. ¹⁵Cáchí i xihín ndo ña cúu ndó amigo i jáchi cáxi tuhun ndihi i xihín ndo ña cáhan Ndióxi, tátá i xihín i. Ta a cáhan ga i xihín ndo ña cúu ndó mozo jáchi in mozo co xíní toho da ndaja cáa ña cája xitoho da. ¹⁶Mé ndó coó nacaxi ndó yehe caca nuu i xihín ndo. Joo mí i nacaxi i ndohó ña ná caca nuu ndó xihín i. Ta najánaha i ndohó ndá quiahva caja ndó já ná cacuu ndó tátuhun in yító, dó sáhan cuahá cuihi ña a ndíhi saha. Tá ná caja ndó ña cúní Ndióxi já quiahva tátá i ndá a cúní mé ndó tá ná caca ndó ña xihín quívi mí i. ¹⁷Ña yóho queá sáhndá i nu ndó caja ndó: Quíhvi ini táhan ndó.

Cándají ñayivi cuéntá ñuyíví Jesús ta cándají ri na na cúu cuéntá mé á

¹⁸Candehé ndo. Tá ná casáhá candají ñayivi cuéntá ñuyíví ndohó xíní ñúhú ndicuhun ini ndó ña jihna ñúhú ga nacandají ri na yehe va. ¹⁹Tá ná caja ndó tá quiahva cája ñayivi ñuyíví já queá quíhvi ini va na cán ndohó. Jáchi já cája xihín táhan mé na cán. Joo yehe nacaxi i ndohó ña ná quee ndó tañu na cán. Sahá ña cán queá co cúní na cán ndohó jáchi co cúu ga ndó na ñuyíví yóho. ²⁰Coto a ndíndójó ndo ña nacahan i xihín ndo tá nacachi i ña ni in túhún toho mozo a cúu cacuu da da cáhnu chága nuu xitoho da. Ta ni mé ndó co cúu ndó na náhnu chága a juú ga yehe. Jáchi tá quiahva nacaja xíxi na xihín yehe quiahva já caja xíxi ri na xihín ndohó va. Tá ná candúsa na ña nacahan i xihín ná quiahva já candúsa ri na ña ná cahan ri ndohó va xihín ná. ²¹Tóco ndihi ña yóho caja na xihín ndo sahá ña cándéé ini ndó yehe. Jáchi co xíní na Ndióxi, tátá i, mé a nachindahá yehe vaxi i ñuyíví yóho.

²²Tá ná a quíxi toho i ñuyíví yóho caxi tuhun i xihín ñayivi, nduu coó toho na jácojo cuachi jata ná, nduu. Joo viti naquixi i ñuyíví yóho ta ndítahan nu ná ndiquiahva na cuéntá sahá cuachi na. ²³Ndá ñayivi cándají yehe, cándají ri na Ndióxi, tátá i. ²⁴Nacaja i ña náhnu nu ná joo coó nacandúsa na yehe sahá ña cán queá ndójo na cuachi. Ta ni in túhún toho

ñayivi coó ñacaja ña náhnú tá quiahva ñacaja i nu ná. Vatí ñaxini na ña náhnú ñacaja i joo cándají na yehe ta cándají na Ndióxi, tátá i. ²⁵Joo xihín tóco ndihi ña cúu yóho xínu coo nu ley najándacoo Moisés nu ná sanahá tá cáchí a já: “Chí coó saha ná candají na yehe”, já ñacachi Moisés sanahá.

²⁶Tá ná quixi ínimá yíi Ndióxi, mé a chindahá i cuéntá Ndióxi, tátá i, mé a cán quéa cahan vaha sahá i. Ta jánaha ña ndaa saha Ndióxi ta chindeé a ñayivi. ²⁷Ta jári mé ndó cahan vaha ndó sahá i jáchi janda saha tá ñacasahá cája chúun i ñuyíví yóho nasanduu tuun ndó xihín i —ñacachi Jesús.

16 Jánacachi tucu Jesús já: —Caxi tuhun i ña yóho xihín ndó já ná a jándacoo ndó ña cándéé ini ndó yehe. ²Jáchi vaxi quiví tá taxí ñayivi ndohó veñuhu. Ta ndá na ná cahní ndohó cahan na ña cája chúun na cuéntá Ndióxi. ³Caja na ña yóho jáchi co xíní na yo cúu Ndióxi, tátá i ta ni co xíní na yehe. ⁴Sa caxi tuhun cuéé e ña yóho xihín ndó já quéa tá ná xínu coo quiví cán já ndicuhun ini ndó ña sa ñacaxi tuhun yachi vi xihín ndó ña já coo.

Ña cája ínimá yíi Ndióxi

‘Coó ñacaxi tuhun i ña yóho xihín ndó jihna jáchi nasahiin i xihín ndó. ⁵Ja chá cuhun i coo i xihín Ndióxi, tátá i, mé a ñachindahá yehe ñuyíví yóho joo ni in ndó co ndáca tuhún ndó yehe ndájá cuhun i. ⁶Ña cája ndó quéa cácuéha ndivaha ini ndó sahá ña ndícani i tóco ndihi ña yóho nu ndó. ⁷Joo mé a ndaa ná cahan i xihín ndó: Vaha chága ná quee e cuhun i. Jáchi tá ná a quée yehe cuhun i já a cúu quixi ínimá yíi Ndióxi coo a xihín ndó ta mé a cán chindeé a ndohó. Joo tá ná quee e cuhun i já chindahá i mé á quixi a nu ndó. ⁸Ta tá ná xínu a cán jánaha cáxí táhyí a nuú ñayivi ña cája na cuachi. Ta jánaha nu ná ndaja íin íchi cuéntá ña ndaa. Ta jánaha nu ná ndá quiahva cavií sahá ñayivi caja Ndióxi. ⁹Ta jánaha cáxí táhyí a ña íin cuachi na jáchi co cándéé ini na yehe. ¹⁰Ta jánaha ínimá yíi Ndióxi ndaja íin íchi cuéntá ña ndaa jáchi quee e cuhun i nu íin Ndióxi, tátá i ta a cúní ga ndó yehe. ¹¹Ta jánaha cáxí táhyí a ña caja víi Ndióxi sahá cuachi jáchi sa ñacaja víi a sahá tiñahá sacuahá vatí viti ñúhú cómí rí cuéntá sahá ñayivi ñuyíví yóho.

¹²Íin cuahá ndivaha ñaha cúní cahan chága i xihín ndó. Joo vatí já va viti jáchi a cándoo ga jini ndó. ¹³Tá ná xínu ínimá yíi Ndióxi, mé a cúu ña ndaa, mé a cán candaca ndohó íchi cuéntá ña ndaa. Ta a cahan toho a cán ña quixi jini mé á jáchi cahan mé á ña xíní johó a cahan Ndióxi. Ta caxi tuhun a xihín ndó ndá a coo chága chí nuu. ¹⁴Ta mé a cán caja cáhnu a yehe jáchi jánaha nu ndó ña cúní mí i jánaha i nu ndó. ¹⁵Tóco ndihi ñaha jánaha Ndióxi, tátá i cúu ri a ña jánaha yehe va. Sahá ña cán quéa cáchí i

xihin ndó ña ínima yii mé á caxi tuhun a xihin ndó ña cuni mí i jánaha i nu ndo.

¹⁶Já chá cuití coo i xihin ndo ta a cuní ga ndó yehe jáchi quee e cuhun i nu íin Ndióxi, tátá i. Joo tá nandihi já cuni tucu ndó yehe —cáchi Jesús.

¹⁷Anda já nacasáhá java na xica tuun xihin á cán ndaca tuhún táhan na já cáchi xihin táhan na já:

—Ndía cuni ri Jesús cachi a xoho tá cáchi a ña ja chá cuití va ta a cuní ga í mé á ta tá nandihi já cuni tucú mé á. Ta cáchi a ña cúu á sahá ña quee a cuhun a nu íin Ndióxi, tátá a. ¹⁸Ndía cuni ri a cachi a ña ja chá cuití va cuni mé á. Co cánda vaha toho iní ndía cuni mé á cachi a xihín tuhun yóho —nacachi xihin táhan na.

¹⁹Joo nacandaa ini Jesús ña cuni na ndaca tuhún na mé á sahá ña cán quea nacachi a já xihin ná:

—Nacachi i xihin ndó ña ja chá cuití ta a cuní ga ndó yehe ta tá nandihi já cuni tucu ndó yehe. Ta viti cuni ndo ndaca tuhún ndó yehe ndía cuni cachi ña yóho. ²⁰Mé a ndaa ná cahan i xihin ndo. Tandaa quivi cuacu ndó ta cacuéha ndivaha ini ndó ta ñayivi ñuyiví yóho cavatá ndivaha na sahá ña ndoho i. Ta vatí cacuéha ini ndó joo in cuití ndajama ña jan ta já cajii ndivaha ini ndó. ²¹Cacuu a tátuhun tá xinu coo hora cacu jahyi in ñáñáha ta já casáha ndóho ini ñá. Joo tá sa nacacu jahyi ña ndíndójó ndihi ña sahá ña nandoho ini ña jáchi sa nacacu jahyi ña ta cájii ndivaha ini ña xihín á. ²²Quiahva já ndóho ini ndó xihín ña táhnda ini ndó viti. Joo ndicó coo tucu yehe já cuni táhan tucú ta já ndicutú ndaa ínima ndó xihín ña cájii iní ndo. Ta ni in na a cúu caja caji nuu nuú ña cájii iní ndó jan.

²³Mé quivi cán coo ga ñaha caca ndó nuú i. Jáchi mé Ndióxi, tátá i quiahva tóco ndihi ña xíní ñúhú ndo tá ná caca ndó ña nu á xihín quivi mí i. ²⁴Janda viti a ñaha caca ndó ñaha nu Ndióxi, tátá i xihín quivi yehe. Joo viti xíní ñúhú caca ndó ña cuni ndó nu mé á xihín quivi yehe ta já quiahva mé á ña nu ndo. Ta xihín ña yóho cuu ndicutú ndaa ini ndó xihín ña cájii iní ndo.

Naquee vaha Jesús nu tóco ndihi ña núu ñuyiví yóho

²⁵Xihín quiahva cuití nacahan i ña yóho xihin ndo. Joo tandaa quivi ta a cahan ga i xihín quiahva nu ndo. Ña caja i quea cáxi táhyí cahan i saha Ndióxi, tátá i nu ndo. ²⁶Ta mé quivi cán caca ndó ña cuni ndó nu Ndióxi, tátá i xihín quivi mí i. Sa núná nu ndó caca tahví ndó nu á ta co xíní ñúhú ga caca tahví yehe nu mé á saha ndo. ²⁷Jáchi sa quíhvi ini tátá i ndohó sahá ña quíhvi ini ndó yehe ta sahá ña nacandúsa ndó ña nachindahá mé á yehe vaxi i. ²⁸Mé nu íin Ndióxi, tátá i naquee e vaxi i ñuyiví yóho. Ta

yachi chá ta jándacoo i ñuyíví yóho já ndicó coo tucu u cūhun i nu íin Ndióxi, tátá i —ñacachi Jesús.

²⁹Anda já ñacachi na xíca tuun xihín á cán já:

—Viti ndusa quéa cáhan cáxi táhyí ndo xihín nde ta co sácú ga ndó quiahva nuú nde. ³⁰Ta viti ndusa cándaā ini nde ña xíní ndo tóco ndihi ñaha. Ta ni co xíní ñúhú toho ndó ña ná ndaca tuhún nde ndohó jáchi sa xíní va ndó ña cúní nde candaā ini nde. Sahá ña cán quéa cándúsa nde ña naquixi ndó nu íin Ndióxi —ñacachi na.

³¹Já nanducú ñehe Jesús tuhun nu ná já ñacachi a já xihín ná:

—Á ja víti ndusa cándúsa ndó yehe. ³²Joo sa naxinu coo va hora ndicuita nuu ndó ndá nacuu cūhun ndo ta jándacoo in túhún ndó yehe. Vatí mé a ndaa a cándoo mé toho i jáchi íin Ndióxi, tátá i xihín i. ³³Cáxi tuhun i ña yóho xihín ndo já ná coo vaha ini ndó sahá ña in cúu ndó xihín i. Mé a ndaa ndoho tá ndoho ini ndó ñuyíví yóho. Joo a cáyihví toho ndó jáchi yehe ñacandee e nasahnu i nu tóco ndihi ña núu ñuyíví yóho —ñacachi Jesús xihín na xíca tuun xihín á cán.

Xíca tahví Jesús nu Ndióxi sahá na xíca tuun xihín á

17 Tánandihí ñacachi Jesús tóco ndihi ña yóho xihín na xíca tuun xihín á cán já nandíñehe a nuu á chí indiví já ñacachi a já:

—Tátá Ndióxi, sa naxinu coo quiví quivi i. Caja ndó ña ndicáhnú ndivaha mí i, da cúu in túhún jiní já jahyi mé ndó já ná cuu caja cáhnú ri yehe va ndohó. ²Jáchi mé ndó nasahan ndó nuú i ña ná cacomí i cuénta saha tóco ndihi ñayivi já ná cuu caja i ña ná catacu na anda ama cáa quiví jáchi cúu ná na nasahan ndo nuú i. ³Ta tá xíní na yo cúu mé ndó ta tá xíní na yo cúu yehe, da nachindahá ndó ñuyíví yóho já cuu catacu na anda ama cáa quiví. Jáchi in túhún mé ndó cúu ndusa Ndióxi.

⁴Sa ñacaja cáhnú i ndohó nani íin i ñuyíví yóho ta sa najáxinu coo ndihi i ña nasahnda ndó nuú i caja i. ⁵Ta viti xíca tahví i nu ndo, tátá Ndióxi ña ná ñaha ndo nuú ñayivi ndaja cáhnú cúu yehe nu mé ndó jáchi quiahva já in cáhnú nasacuu u xihín ndó janda tá cámaní cava sahá saha ñuyíví.

⁶Ta ñacaxi ndó na cacuu cuénta mí i tañu ñayivi cuénta ñuyíví yóho. Ta sa ñacaxi tuhun i xihín ná yo cúu mé ndó. Ñacaxi ndó na ta nandiquiahva ndó na nuú i. Ta ñacandúsa na tuhun ndó. ⁷Ta viti cándaā ini na ña tóco ndihi ña sahan ndó nuú i quíxi a cuénta mé ndó. ⁸Ta sa ñacaxi tuhun i xihín ná tóco ndihi ña nasahan ndó nuú i ta nandiquehe vaha na ña. Ta sa ñacandaā ini na ña mé a ndaa naquixi i cuénta mé ndó. Ta ñacandúsa na ña nachindahá ndó yehe.

⁹Co xíca tahví i nu ndó sahá ñayivi cuénta ñuyíví yóho. Joo xíca tahví i nu ndó sahá na nasahan ndó nuú i jáchi cúu ná cuénta mé ndó. ¹⁰Tóco

ndihi na cúu cuéntá mí i cúu ná cuéntá mé ndó viti. Ta tóco ndihi na cúu cuéntá mé ndó cúu ri na cuéntá yehe va. Ta ndicáhnú ndivaha mí i sahá ña cája na.

¹¹A cóo ga i ñuyíví yóho jáchi saa i nu íin mé ndó. Joo na nacaxi ndó yóho canduu tóo na ñuyíví yóho. Tátá Ndióxi, yíi ndivaha cúu mé ndó. Xíca tahví i nu ndó ña ná candaa vaha ndó na cúu cuéntá mé ndó jáchi xihín ndée mé ndó cuu candico na íchi cuéntá mé ndó. Já quea in ná nduu ndihi na tá quiahva in cúu mé ndó xihín yehe. ¹²Jáchi nani íin i xihín ná ñuyíví yóho ndáa i na xihín ndée mé ndó. Ta ni in túhún toho táhan na nasahan ndó nuú i cacomí i cuéntá saha cán coo nandihí saha. In túhún da nandihí saha cúu da janda sanahá nasahiin saha ña ndihi saha dá já ná cuu xinu coo nuú ña nacahyi nuú tuhun Ndióxi sanahá.

¹³Ta viti quee e ñuyíví yóho saa i nu íin ndó jan. Joo cáhan i ña yóho xihín ndó nani íin i ñuyíví yóho já ná ndicutú ndaa ini na yóho xihín ña cájií íní na tá quiahva cájií íní mí i. ¹⁴Sa nacaxi tuhun i tuhun mé ndó nu ná. Joo na cúu cuéntá ñuyíví cándají na na cúu cuéntá mí i jáchi co cúu ná cuéntá ñuyíví yóho tá quiahva co cúu toho yehe cuéntá ñuyíví yóho. ¹⁵Co xíca tahví i nu ndó ña ná tavá ndó na ñuyíví yóho. Ña cúní quea ná chindee ndó na já ná a quee vaha tiñahá sacuahá xihín ná. ¹⁶Tá quiahva co cúu toho i da cuéntá ñuyíví yóho quiahva já co cúu ga na cán ñayivi cuéntá ñuyíví. ¹⁷Ta xíca tahví i nu ndó ña ná ndaja víí ndó na xihín tuhun mé ndó ña jánaha ndó nu ná jáchi tuhun mé ndó cúu ña ndaa. ¹⁸Ta tá quiahva nacaja ndó nachindahá ndó yehe tañu na ñuyíví yóho quiahva já chindahá ri yehe va na cúu cuéntá mí i tañu ñayivi cuéntá ñuyíví. ¹⁹Ta ndíquiahva i mí i caja i ña cúní mé ndó já quea ná cuu ndíquiahva na yóho mé ná ndáha mé ndó sahá ña sa xíní na ña ndaa.

²⁰Ta a juú sahá na yóho cuití va xíca tahví i nu ndó, vaha. Xíca tahví ri nu ndó sahá na ná candúsa yehe chága chí nuu sahá tuhun cahan mé na yóho xihín ná. ²¹Tátá Ndióxi, xíca tahví i nu ndó ña ná caja ndó ña in ná nduu tóco ndihi na cúu cuéntá mé ndó yóho. Ta caja ndó ña in ná nduu ndihi na xihín yó tá quiahva in cúu ndó xihín yehe ta in cúu yehe xihín mé ndó. Jáchi tá ná caja ndó ña in ná nduu tóco ndihi na já cuu candúsa ñayivi cuéntá ñuyíví ña mé a ndaa nachindahá ndó yehe vaxi i. ²²Nacaja i ña ndicáhnú na cán tá quiahva nandaja cáhnú ndó yehe. Já quea in ná nduu ndihi na tá quiahva in cúu mé ndó xihín yehe. ²³Ta in cúu yehe xihín ná tá quiahva in cúu mé ndó xihín i já ná xinu coo ndihi na cacuu na tátuhun in víxí ñayivi. Ta já ná cuni ñayivi cuéntá ñuyíví ña mé a ndaa nachindahá ndó yehe vaxi i. Ta já ná cuni na ña quíhvi ini ndó na tá quiahva quíhvi ini ndó yehe.

²⁴Tátá Ndióxi, n̄acaja ndó ña cómí i cuéntá sahá na yóho. Ta cúní ña ná coo na xihín i nuú coo i já ná cuni na ndá quiahva cáhnu cúu u jáchi n̄acaja ndó ña ná ndicáhnu ndivaha i. Jáchi janda tá camaní cava sahá sahá ñuyívi quíhvi ini ndó yehe. ²⁵Tátá Ndióxi, cája ndó ña ndaa. Ta ñayivi cuéntá ñuyívi yóho co xini toho na ndohó. Joo yehe xini vaha i ndohó ta na cúu cuéntá mí i yóho sa cándaa vaha ini na ña nachindahá ndó yehe. ²⁶Sa n̄acaja i ña ná candaa ini na yo cúu mé ndó ta cája i ña ná candaa chága ini na sahá ndo. Ta xihín ña yóho candaa ini na ña quíhvi ini ndó na tá quiahva quíhvi ini ndó yehe ta já in ná nduu na xihín i —n̄acachi Jesús xica tahví a nu Ndióxi.

Tá n̄atiin na Jesús

(Mt. 26:47-56; Mr. 14:43-50; Lc. 22:47-53)

18 Tánandihí n̄axica tahví Jesús nu Ndióxi já naqueta mé á xihín na xica tuun xihín a cán cuahan chí inga xoo yívi naní Cedrón. Ta yati cán cáa cuaha yitó cuihi nuú naquihvi Jesús xihín na xica tuun xihín á. ²Ta Judas Iscariote, mé da jícó túhún ñahá cán sa xini vaha da nu sáhiin Jesús xihín na xica tuun xihín á jáchi cuahá tañu n̄anditútú ndihí na cán. ³Na cán quéa ndáca da in táhndá soldado ta ndáca da java policía, na ndáa veñuhu cáhnu ñuu Jerusalén cán. Cúu ná na nachindahá na sacuahá nuú jutú xihín na fariseo. Ta jandá johó ñéhe na ñaha ná caní na a cuahan na ta ñéhe ri na ití yúsá jándiyéhe na nu ná. ⁴Joo sa xini vaha Jesús ndíá ndítahan ndoho a sahá ña cán quéa naqueta nu ná já n̄andaca tuhún a na já n̄acachi a já xihín ná:

—Yo ndínducú ndo já —n̄acachi a.

⁵Já n̄anducú ñéhe na cán tuhún nu á já n̄acachi na já xihín á:

—Ndínducú nde Jesús, da ñuu Nazaret —n̄acachi na.

—Yehe cúu u da ndínducú ndo —n̄acachi a.

Ta tañu na cán ndácaan ri Judas, da najícó túhún ñahá cán. ⁶Tá n̄acachi Jesús: “Yehe cúu u da ndínducú ndo”, já n̄axica játa na ta n̄acuyu na nu ñúhu. ⁷Já n̄andaca tuhún tucu Jesús na já n̄acachi a já xihín ná:

—Yo ndínducú ndo já —n̄acachi a.

Já n̄anducú ñéhe na cán tuhún nu á já n̄acachi na já xihín á:

—Jesús, da ñuu Nazaret ndínducú nde —n̄acachi na.

⁸Anda já n̄acachi tucu Jesús já xihín ná:

—Sa n̄acachi vi xihín ndo ña yehe cúu u da ndínducú ndo. Sahá ña cán quéa quiahva ndó ñamaní nuú na yóho ña ná quee na cūhun na —n̄acachi Jesús.

⁹N̄acachi Jesús ña yóho já ná a t̄iin na na xica tuun xihín a cán já ná xinu coo nuú tuhún ña n̄acachi mé á tá n̄axica tahví a nu Ndióxi tá n̄acachi

a já: “Tátá Ndióxi, ni in túhún toho táhan na nasahan ndó nuú i cóo nandihí saha jáchi nasandaa vaha i na.” ¹⁰Ta ndaja coo nasañee in machítí nu tóco Simón Pedro. Já natuhun da ña ta nachitúhun dá johó cuáha in da naní Malco, da cúú mozo nuú da cúú sacuahá chága nu ndíhi jutú. ¹¹Anda já nacachi Jesús já xihín Pedro:

—Chicaan vaha machítí jan. Jáchi sa nasacu ini Ndióxi, tátá i ndoho ini i tóco ndihí ña vaxi nuú i ta íin tiahvá i ndoho ini i —nacachi Jesús.

Ñéhe na Jesús cuahan na nuú da sacuahá chága nu ndíhi jutú

(Mt. 26:57-58; Mr. 14:53-54; Lc. 22:54)

¹²Tóco ndihí soldado cán xihín da sáhdá chuun nu dá xihín java na ndáá veñuhu cán natiin na Jesús ta nacató na a. ¹³Jihna ñúhú ñéhe na a nasahan na nu Anás, da cúú xojo Caifás, da sacuahá chága nu ndíhi jutú mé cuia cán. ¹⁴Mé Caifás yóho cúú dá da nacachi xihín na Israel ña vaha chága ña ná quivi in taa nu ndíhi ñayivi já ná a ndíhi saha tóco ndihí ñayivi.

Chíjehé tuhun Pedro ña xíní da Jesús

(Mt. 26:69-70; Mr. 14:66-68; Lc. 22:55-57)

¹⁵Ta ndaja coo Simón Pedro xihín inga táhan da xíca tuun xihín Jesús cán ndíco na jatá nu ñéhe na a cuahan na. Ta da inga cán xíní táhan vaha da xihín da sacuahá chága nu ndíhi jutú ña cán quéa nañehe dá ñamaní ndihvi da xihín Jesús yuyéhé vehe jutú cán. ¹⁶Joo nacandoo Pedro jata véhe yati yéhé cán. Joo da inga cán nandicó cóo da já naxíca da ñamaní nu ña ndáá yéhé vehe jutú cán ña ná quiahva ña ñamaní nu Pedro quihvi da. Saha ña cán naquihvi Pedro chí yuyéhé vehe cán. ¹⁷Ta mé ña ndáá yéhé cán nandaca tuhún ña Pedro já nacachi ña já xihín dá:

—Á a juú in táhan da xíca tuun xihín Jesús cúú yóhó —nacachi ña.

Anda já nacachi Pedro já xihín ña:

—Coo cúú toho i in táhan da xíca tuun xihín á —nacachi Pedro.

¹⁸Ta mé ñuú cán vixi xíní na cúú mozo xihín na ndáá veñuhu cán. Saha ña cán quéa nandicahmi na ñúhu ta nandaca nduu na xítúní na ta tañu na cán cándichi ri Pedro xítúní da.

Ndája ndichí da sacuahá chága nu ndíhi jutú Jesús

(Mt. 26:59-66; Mr. 14:55-64; Lc. 22:66-71)

¹⁹Tá nandihí já nacasáha da sacuahá chága nu ndíhi jutú cán ndája ndichí da Jesús já nandaca tuhún da mé á saha na naxíca tuun xihín á. Ta nandaca tuhún da mé á saha ña najánaha nuú ñayivi. ²⁰Anda já nacachi Jesús já xihín dá:

—Coó nacahan jehé toho i xihín ñayivi tá najánaha i nu ná. Níi tiempo najánaha i tuhun Ndióxi nu ná ini veñuhu ta quiahva já najánaha i nu ná nu táca na ini veñuhu cáhnu ñuu Jerusalén. Ta ni in túhún toho ñaha coó najánaha jehé e nu ná. ²¹Ta viti cachi ndó xihín i ndá cuéntá quea ndaca tuhún ndó yehe sahá ña yóho. Cuáhán ndó ndaca tuhún ndo ñayivi, na najánaha i nu cán já ná ndicani na cán nu ndo ndaja cáa ña najánaha i nu ná. Jáchí xíní vaha na ña nacahan i xihín ná —nacachi Jesús.

²²Tá nacachi Jesús ña yóho já nacani in da ndáa veñuhu cán jahndá nuu á já nacachi da já xihín á:

—A váha toho ndínehe yúhún nuú da sacuahá chága nu ndíhi jutú —nacachi da.

²³Anda já nacachi Jesús já xihín dá:

—Tá co váha ná caja i, cahan xihín i ndá cúú ña coó nacaja vaha i. Joo tá nacaja vaha i ndá cuéntá quea cánún yehe —nacachi Jesús.

²⁴Tá nandíhi já nasanehe na Jesús nuú Caifás, da sacuahá chága nu ndíhi jutú cán ta sa já ndíco a xihín yóho ñéhe na a cuahan na.

Chíjehé tuhun tucu Pedro ña xíní da Jesús

(Mt. 26:71-75; Mr. 14:69-72; Lc. 22:58-62)

²⁵Ta ndaja coo íin coo yíi Pedro xítúní da xihín java na ndúu cán. Ta já nacasáhá na cán ndaca tuhún na da já nacachi na já xihín dá:

—Á a juú táhan da xíca tuun xihín Jesús cúú yóhó —nacachi na.

Joo nachijehé tuhun Pedro ña xíní da Jesús já nacachi da já:

—Co cúú toho i in táhan da xíca tuun xihín á —nacachi da.

²⁶Joo tá nandíhi já nandaca tuhún in da cúú mozo nuú da sacuahá chága nu ndíhi jutú cán, da cúú in táhan da nachitúhún Pedro johó. Ta nacachi da já xihín Pedro:

—Cája i cuéntá naxini i yohó nu cáa cuahá yitó cuihi nuú natiin na Jesús cán —nacachi da.

²⁷Joo nachijehé tuhun tucu Pedro ña xíní da Jesús ta iví laá nacana chéle tá quiahva nacachi Jesús xihín dá coo.

Ñéhe na Jesús cuahan na nu Pilato

(Mt. 27:1-2, 11-14; Mr. 15:1-5; Lc. 23:1-5)

²⁸Ta tá natívi yaa já natavá na Jesús vehe Caifás cán já ñéhe na a cuahan na vechúun nu ndacaan da cúú gobernador cuéntá ñuu Roma. Joo mé na Israel coó naxeen na ndíhvi na vechúun cán jáchí cáchí ley na ña tá ná ndíhvi na vehe na tóho já cuu yuxu na ta já a cúu cajíni na vicó pascua ña coo quiví itaan. ²⁹Sahá ña cán quea naqueta Pilato, da cúú gobernador jata véhe cahan da xihín na Israel já nacachi da já:

—Ndá cuachi nacaja da yóho —nacachi Pilato.

³⁰Já nanducú ñehe na Israel cán tuhun nu dá já nacachi na já:

—Ta tá a juú taa quini ná cacuu da yóho ta a cáñehe toho nde da quixi da nu ndó, nduu —nacachi na.

³¹Já nacachi Pilato já xihín ná:

—Mé ndó cañehe ndó da cuhun ndo. Caja víí ndó saha dá tá quiahva sáhndá ley mé ndó —nacachi Pilato.

Já nacachi na Israel cán já xihín dá:

—Ña cúni nde quéa ná cata caa ndó da ndica crúxu jáchi cúu nde na Israel ta co ñehe toho nde ñamaní cahní nde ñayivi —nacachi na.

³²Ta xihín ña yóho naxinu co nuú ña nacachi Jesús tá nacachi a ndá quiahva quivi a. ³³Tá nandihí já nandihví tucu Pilato ini vechúun cán ta nacana da Jesús já nandaca tuhún ñahá da já nacachi da já xihín á:

—Á mé a ndaa cúun in rey, da cómí cuéntá sahá na Israel —nacachi da.

³⁴Já nacachi Jesús já xihín dá:

—Á jini mé ndó naquixi ña ndaca tuhún ndó yehe. Á ndaca tuhún ndó yehe sahá ña nacachi ñayivi sahá i —nacachi a.

³⁵Anda já nacachi Pilato já xihín Jesús:

—Co cándaa ini i saha ña yóho jáchi co cúu yehe da Israel. Mé ñayivi Israel jan xihín na sacuahá nuú jutú cúu na nandiquiahva yohó ndahá i. Ndía nacajún, vaha —nacachi Pilato.

³⁶Já nanducú ñehe Jesús tuhun nu dá já nacachi a já xihín dá:

—Co cómí i cuéntá sahá ñayivi tátuhun cája ñayivi cuéntá ñuyíví. Jáchi tá ná cacomí i cuéntá saha ná tátuhun na ñuyíví já quéa cuu caja i xihín na cómí i cuéntá saha ña ná caní táhan na xihín na Israel ña ná a tíin na yehe. Joo co cómí toho i cuéntá saha ná tátuhun cája ñayivi cuéntá ñuyíví —nacachi a.

³⁷Anda já nacachi tucu Pilato já xihín Jesús:

—Á cúun da cómí cuéntá sahá ñayivi, dá já —nacachi da.

Já nacachi Jesús já xihín dá:

—Ña ndaa quéa cáhan ndó jan. Yehe cúu u da cómí cuéntá sahá ñayivi cuéntá mí i jáchi nacacu u ñuyíví yóho ña ná caja i já. Ta naquixi i já ná caxi tuhun i ña ndaa xihín ñayivi. Ta tóco ndihi na cúu cuéntá ña ndaa xini johó ña cáhan i —nacachi a.

³⁸Já nacachi tucu Pilato já xihín á:

—Yo xini ndía cúu ña ndaa —nacachi da.

Tá nandihí já naqueta tucu Pilato vechúun cáhan da xihín na Israel já nacachi da já xihín ná:

—Chí co ndíñehe mí ví ndá cuachi quéa nacaja da yóho. ³⁹Taño mé víco pascua íin in costumbre ndo ña ná janí i in da sá ndacaan vecaa. Ta viti

cachi ndó xihín i á cō cūni ndó ña ná janí i da cúu rey nuú na Israel —nacachi Pilato.

⁴⁰Ta já nacasáhá tóco ndihi na cán cáyuhú cóhó na já cáchí na já:
—A janí toho ndó Jesús jan. Vaha chága ná janí ndó Barrabás jan
—cáchí na cáyuhú na nū Pilato.

Ta Barrabás cán nasacuu da in taa cuihná.

Sácú na sahá Jesús quivi a

19 Anda já nasahnda Pilato chuun ña ná jácaxáhan na Jesús xihín churrú. ²Ta da cúu soldado cán najehén da in tiyivi xihín íñu já nachinúu da a jiní á ta nachinúu da in jáhma cuáhá túun jatá. ³Tá nandihí já nacativi da nū á sácū ndaa ichi ñahá da já nacachi da já xihín á:

—Cáhnū nahá ná cacuu yóhó, da cúu rey nuú na Israel —nacachi da.
Anda já cáni da nū á.

⁴Tá nandihí já naqueta tucu Pilato chí jatá já nacachi da já xihín tóco ndihi na ndúu cán:

—Candehé ndo. Tavá ñéhe e Jesús nū ndo já ná candaa ini ndó ña coó toho cuachi da ndítahan i —nacachi da.

⁵Tá nandihí já natavá ñéhe Pilato Jesús ta sa já cánúu tiyivi íñu jiní á. Ta sa já tácaa jahmá cuáhá túun jatá naqueta. Anda já nacasáhá cáchí Pilato já:
—Candehé ndo. Yóho íin da —nacachi da.

⁶Joo na sacuahá nuú jutū xihín na ndáá veñuhu tá naxini na Jesús já nacasáhá na cáyuhú cóhó na já cáchí na já:

—Cata caa ndó da ndica crúxu, cata caa ndó da —cáchí na.

Anda já nacachi Pilato já xihín ná:

—Mé ndó cañehe ndó da cūhun ndo cata caa ndó da ndica crúxu tá cūni ndo. Jáchī yehe cō ndítahan i ndá cuachi nacaja da —nacachi Pilato.

⁷Anda já nacachi na Israel cán já xihín Pilato:

—Nū ley mé nde ndítahan quivi da jáchī cáchí da cúu dá in túhún jiní já jahyi Ndióxi —nacachi na.

⁸Tá naxini johō Pilato cán ña yóho já nayihví chága ví da. ⁹Já naquihvi tucu Pilato xihín Jesús ini vechúun cán já nandaca tūhún da mé á já nacachi da já xihín á:

—Ndá ñuu naquisún já —nacachi da.

Joo coó nanducú ñehe Jesús tūhun nū dá.

¹⁰Já nacachi tucu Pilato já:

—Ndá cuéntá quéa cō cūnun nducú ñehún tūhun nuú i. Á cō xínī tohún ña cuu cahnda i chuun ña ná cata caa na yóhó ndica crúxu. Ta cuu janí rī yóhó ña ná queún cūhun tá cūni —nacachi da.

¹¹Anda já nanducú ñehe Jesús tūhun nū dá já nacachi a já xihín dá:

—Ni in túhún toho ñaha cō núná nū ndó caja ndó xihín i tá cō sáhan Ndióxi, tátá i ñamaní nū ndo. Joo mé a ndaa íin chága cuachi nuú da nandiquiahva yehe ndáha ndó a juú ga ndóhó —ñacachi Jesús.

¹²Anda já nanducú Pilato ndá quiahva caja da janí da Jesús ña ná quee a cūhun a. Joo coó naxeen na Israel ta ñacasáha na cáyuhú cóhó na nū dá já cáchí na já:

—Tá ná janí ndó Jesús jan já quéa náha ña cō cúú ndó da ñéhe táhan vaha xihín da cómí cuéntá sahá ñayivi ñuu Roma. Jáchi Jesús jan cáchí da ña cúú dá da cómí cuéntá sahá ñayivi ta xihín ña yóho jándihíhvi da emperador, da cómí cuéntá sahá ñayivi ñuu Roma —ñacachi na.

¹³Tá naxini johō Pilato ña yóho já ñasahnda da chuun ña ná tavá na Jesús. Ta ñasacōo mé dá nū sácōo da sáhnda chuun vechúun. Mé nū sácōo da cán naní a Gabata tūhun hebreo. Mé tūhun yóho cúni cachi a nuú naquihvi piso yuu. ¹⁴Ñayaha tóco ndihi ña yóho tá cámaní in quivi coo víco pascua. Ta cúú á tátūhun caxivi ta nandaca ndichi Pilato já ñacachi da já xihín na Israel cán:

—Jan íin da cúú rey nū ndo —ñacachi da.

¹⁵Joo na cán ñacasáha tucu na cáyuhú cóhó na nū dá já cáchí na já:

—Cahní ndó da. Ná quivi da. Cata caa ndó da ndica crúxu —cáchí na.

Já ñacachi Pilato já xihín ná:

—Ama ná cata caa ri da cúú rey nū ndó ndica crúxu —ñacachi Pilato.

Anda já ñacachi na sacuahā nuú jutū cán já:

—Da cómí cuéntá sahá ñuu Roma, in túhún da cán cuití va cúú rey nuú nde —ñacachi na cán.

¹⁶Anda já nandiquiahva Pilato Jesús nū ná ña ná cañehe na a cūhun na cata caa na a ndica crúxu.

Cáta caa na Jesús ndica crúxu

(Mt. 27:32-44; Mr. 15:21-32; Lc. 23:26-43)

¹⁷Nachinúu na in crúxu joco Jesús já ndójo a do cuahan chí xiqui naní a nū ndúu lásá yiquí jíní ndii. Ta cáchí na Gólgota xihín á tūhun hebreo. ¹⁸Ta cán ñacata caa na a ndica crúxu ta ñacata caa ri na inga ivi da xihín á, in in da in in xoo jín á. Ta tácaa Jesús mañnú ndívi da cán. ¹⁹Ta ñasahnda Pilato chuun ña ná cūhun java na chítivi ndaa na in tabla ndica crúxu yati jini Jesús cán. Ta nū tabla cán ñacahyí na: “Da yóho cúú Jesús, da ñuu Nazaret, da cúú rey nuú na Israel.” ²⁰Ta cuahá na Israel ñacahvi na ña ñacahyi cán jáchi yati yuhú ñuu Jerusalén ñacata caa na Jesús. Ta ña ndaa nū tabla cán ñacahyí na ña tūhun hebrero ña cáhan na Israel xihín tūhun latín ña cáhan na ñuu Roma xihín tūhun griego ña cáhan na nación Grecia. ²¹Ta tá naxini na sacuahā nuú jutū cán ña yóho já ñacachi na já xihín Pilato:

—A cáhyí toho ndó ña cúú da jan rey nuú na Israel. Vaha chága ná cáhyí ndó ña cáchí da cúú dá rey nuú na Israel —nacachi na.

²²Já nanducú ñehe Pilato tuhun nu ná já nacachi da já xihín ná:

—Coo tá coo ña sa nasacu u ta a tává toho i ña —nacachi da.

²³Tá nandihi nacata caa mé soldado Jesús ndica crúxu, já natiin da jahmá a ta nandicahnda nu táhan ndícomi dá ña. Ta cotó ndée a cúú á ña nacavaha níí na ña jini á ta janda sahá ta coó nacucu na ña. Ta natiin da ña ²⁴ta já nacachi xihín táhan da já:

—Ná a jácuachí toho í jáhma jan já ná coo níí yii va. Ña cuu caja í queá cajíquí yó sahá ta ndá da ná quee vaha, da cán ndiquehe jáhma jan —nacachi xihín táhan da cán.

Nacaja da ña yóho já ná xinu coo nuú tuhun Ndióxi nacahyi sanahá tá nacachi a já: “Nandicahnda nu táhan mé ná jahmá i ta já nasajíquí na sahá cotó ndée e ta da naquee vaha cán nandiquehe da ña.” Quiahva já nacahyi tuhun Ndióxi sanahá. Ta quiahva já nacaja soldado cán xihín jáhma á.

²⁵Ta jiiin mé crúxu nuú nacata caa na Jesús cán nasandichi náná a xihín quihvi ña cán xihín María, ña cúú ñájíhí Cleofas xihín María, ña ñuu Magdala. ²⁶Tá naxini Jesús ña cándichi náná a saha crúxu ta tá naxini a cándichi yehe, da naní Juan, da xica tuun xihín á, da quihvi ndivaha ini mé á chí já nacachi a já xihín náná a:

—Da jan cúú tátuhun jahyi ndó viti —nacachi Jesús.

²⁷Tá nandihi já nacachi a já xihín mé da xica tuun xihín a cán:

—Candaa vaha ña jáchi cúú ña tátuhun nánún viti —nacachi Jesús.

Tá naxini johó da ña yóho já nandiquehe vaha da María cán ndáá da ña tátuhun náná da.

Tá naxihí Jesús

(Mt. 27:45-56; Mr. 15:33-41; Lc. 23:44-49)

²⁸Tá sa nayaha tóco ndihi ña yóho já sa xini vaha Jesús ña sa naxinu coo tóco ndihi ña nacachi tuhun Ndióxi coo. Ta naxinu coo nuú ña nacahyi nuú tuhun Ndióxi sahá Jesús sanahá tá nacachi a já:

—Íchi ini i ticuí.

²⁹Mé cán nasandichi in tindohó nachutú jini xihín vino iyá. Ta najándaxi na in ticoto xihín vino cán já nacató da ña nuú in yito naní hisopo ta já nachitivi na ña yati yuhu Jesús ña ná coho a do. ³⁰Anda já naxihí Jesús mé vino iyá cán já nacachi a já:

—Sa nayaha tóco ndihi ñaha ña ndítahan ndoho i —nacachi a.

Já nanditoo jico á. Naxihí a.

Tá natuxú na in yító tátuhun póyá yicá ndícá Jesús

³¹Ta ndaja coo nasahan na Israel cán naxica na ñamaní nu Pilato ña ná cahnda da chuun ña ná cahnu da lásá sahá da tácaa ndica crúxu cán já ná quivi yachi da. Jáchí coó naxeen na Israel cán ña ná tácaa ndii ndica crúxu inga quivi itaan. Jáchí cacuu a quivi ndiquehe ndée ná ta cacuu a in quivi yii ndivaha nu ná. ³²Sahá ña cán quéa naquee soldado nasahan da já nasahnu da lásá sahá ndívi da tácaa ndica crúxu jín Jesús cán. ³³Joo tá nacayati da nu Jesús ña cahnu da lásá sahá, naxini da ña sa naxihí va mé á sahá ña cán quéa coó nasahnu da lásá sahá.

³⁴Joo in táhan soldado cán natuxú da in yító tátuhun póyá yicá ndícá a já nacana nii xihín ticuí cán. ³⁵Ta yehe cúu u da ndícani ña yóho nu ndo ta naxini i ña xihín nuú i. Ta cúu á ña ndaa. Ta cándaa cáxí ini i ña cáhan i ña ndaa já ná candúsa ndó ña ndícani i nu ndo. ³⁶Jáchí tóco ndihi ña yóho nayaha já ná xinu coo nuú tuhun Ndióxi tá cáchí a já: “Ni in túhún toho lásá da, a cáhnu na”, já cáchí tuhun Ndióxi. ³⁷Ta inga tucu cáchí tuhun Ndióxi já: “Cuni tucu na da, da natuxú na póyá yicá ndícá”, já nacahyí na nuú tuhun Ndióxi sanahá.

Tá najánduxu na Jesús

(Mt. 27:57-61; Mr. 15:42-47; Lc. 23:50-56)

³⁸Tá sa nayaha tóco ndihi ña yóho já naxinu coo in da naní José, da ñuu Arimateo, nu Pilato. Ta naxica da ñamaní nu Pilato ña ná ndiquehe da yiquí cuñu Jesús cañehe da cūhun da. Mé José yóho cúu dá cuéntá Jesús joo coó nanaha tuhun da sahá jáchí yíhví da na Israel. Ta ndaja coo nasahan Pilato ñamaní nu dá ña ná ndiquehe da yiquí cuñu Jesús. Chí nasahan da nandiquehe da ña. ³⁹Ta jári íin in da naní Nicodemo ta ñéhe da tátuhun oco uxu kilo perfume, dó nacavaha xihín ña naní mirra ta xihín ña naní aloes. Mé Nicodemo yóho cúu da da nasahan nanditúhún xihín Jesús tá ñuú. ⁴⁰Ña cán quéa natiin José xihín Nicodemo yiquí cuñu Jesús ta nachitiví na ña xihín in jáhma vaha ña nachindaxi da xihín mé perfume cán. Jáchí quiahva já íin costumbre na Israel cája na tá jánduxu na ndii. ⁴¹Ta yati nuú nacata caa na Jesús cán nasahiin nu cáa cuaha yitó cuihi. Ta tañu yító cán nasahiin in yávi ndica cáva nuú cuu chicaan na ndii. Mé cáva cán nasacuu a ña saá jáchí ni in ndii a ñaha chicaan na ini ña cán. ⁴²Ta cán nachicaan da yiquí cuñu Jesús jáchí yati nasahiin a. Ta númí dá jáchí sa nacativi quivi ndiquehe ndée na Israel.

Tá nanditacu tucu Jesús

(Mt. 28:1-10; Mr. 16:1-8; Lc. 24:1-12)

20 Ta tása nayaha mé quiví ndíquehe ndée ná ta naha vaha chá quiví domingo tá cámaní queta candii já nasahan María, ña ñuu Magdala nuú nachicaan na yiquí cuñu Jesús cán. Já naxini ña ña nacaxoo yuu cáhnu nasandaji yuhú cáva cán. ²Anda já naxinu ña nasahan ña nu íin Simón Pedro xihín inga da naxica tuun xihín Jesús, da quíhvi ndivaha ini mé á cán. Ta tá naxinu coo ña nu dá já nacachi ña já xihín dá:

—Natavá na yiquí cuñu xitoho i ta yo xíní ndájá nasacu na ña —nacachi ña.

³Anda já naqueta Pedro xihín inga da naxica tuun xihín Jesús cán ndáva da cuahan da nuú nasandacaan Jesús. ⁴In nuú xínu ndíví da cuahan da. Joo nihí chága xínu da inga cán a juú ga Pedro ña cán quéa jihna ñúhú da naxinu coo da nuú nandacaan Jesús cán. ⁵Anda já nacandayi da sándehe da nuú nasandacaan Jesús cán. Já naxini da ñúhu ticoto nasativí a cán cuití va. Joo coo nandihvi da janda mé ini cáva cán. ⁶Anda já naxinu coo Simón Pedro ta nandihvi da cán. Ta naxini da mé ticoto nasativí yiquí cuñu Jesús cán. ⁷Ta naxini da ticoto ña nasativí jini á nacaxoo jín ña cán ta nanditivi vaha ña. ⁸Anda já nandihvi ri da inga cán, da naxinu jihna ñúhú. Ta tá naxini da ña coo yiquí cuñu Jesús ndácaan já nacandúsa da ña nanditacu tucu a. ⁹Jáchí coo nacandaa ini na cúu cuéntá mé á ña cáchí tuhun Ndióxi nu cáchí a ña nditacu tucu Jesús. ¹⁰Tá nandihi já ndáca táhan ndíví da naxica tuun xihín Jesús cán nandicó coo da vehe nuú nasanduu na.

Tá naxini María, ña ñuu Magdala Jesús

(Mr. 16:9-11)

¹¹Ta nani nayaha tóco ndihi ña yóho, nandicó coo María mé nuú nasandacaan yiquí cuñu Jesús. Sácu ña íin ña yuhú cáva cán. Ta nani sácu ña nacandayi ña ndicoto nihni ña ini cáva cán. ¹²Já naxini ña ivi táto Ndióxi, ña ndíxi jahmá yaa. Ndáa ndúu coo a nuú nasahin yiquí cuñu Jesús: in a nuú nasahin jini Jesús ta inga nuú nasahin sahá. ¹³Anda já nandaca tuhún táto Ndióxi cán María já nacachi a já xihín ña:

—Ndá cuéntá quéa sácún —nacachi a.

Já nacachi ña já xihín á:

—Sácu u jáchi naquehe na yiquí cuñu Jesús, xitoho i ta co xíní ndájá nasacu na ña —nacachi ña.

¹⁴Tá jacá nacachi uun ña ña yóho já nandicoto nihni ña já naxini ña in a cándichi a nu ña já va joo coo nandicuni ña ña cúu á Jesús. ¹⁵Anda já nandaca tuhún Jesús ña já nacachi a já xihín ña:

—Ndá cuéntá quéa sácún. Yo já ndínducún —nācachi a.

Ta nācāhān María ña mé da cāhān xihín ña cúú dá da ndáá mé yitó cuihi cáa cán. Sahá ña cán quéa já nācachi ña já:

—Tá nātavún yiquí cuñu Jesús ña nāsāndacaan ini cáva yóho, caxi tūhún xihín i ndájá nāsacún ña já ná cūhūn i ndiquehe e ña —nācachi María.

¹⁶Anda já nācachi Jesús já xihín ña:

—María.

Anda já nācava nuu ña já nāndicuni ña Jesús ta nācāhān ña tūhūn hebreo xihín á já nācachi ña já:

—Raboni —mé tūhūn yóho cúni cachi a maestro.

¹⁷Já nācachi Jesús já xihín ña:

—A tīn tuún yehe. Jáchī a ñāha toho ndindita i cūhūn i indiví nu īn Ndióxi, tátá i. Joo cuáhān caxi tūhún xihín nā cúú cuéntá mí i ña cūhūn i nu īn Ndióxi, tátá i, mé a cúú tátá mé ndó viti. Cúú á Ndióxi nu mí i ta cúú ri a Ndióxi nu mé ndó —nācachi Jesús.

¹⁸Anda já ndáva María, ña ñuu Magdala nāsāhān ña nāndicani ña nuu nā nāxica tuun xihín Jesús cán ña nāxini ña mé á. Ta nāndicani ña ña nācachi Jesús xihín ña.

Tá nāxini nā nāxica tuun xihín Jesús mé á

(Mt. 28:16-20; Mr. 16:14-18; Lc. 24:36-49)

¹⁹Ta tá nācuaá mé quivī domingo cán já nānditútú tóco ndihi nā nāxica tuun xihín Jesús cán. Núhu tuun na ini vehe ta nāchicaji tuun nā yéhé jáchī yíhvī nā xīnu nā Israel cán tiin ñahá nā. Ta in cuití nāxīnu coo Jesús nu ná ta nādaça ndichi a mahñú ndaa nu ndúu nā cán. Já nācāhān Ndióxi a xihín ná já nācachi a já:

—Ná coo vāha ini ndó —nācachi a.

²⁰Ta tá nācachi a ña yóho já nājānaha ndáha á xihín yicá ndícá a nu ná ña ná candaā ini na ña jivi cúú mé á. Ta nācājií ínī nā tá nāxini na a. ²¹Tá nāndihi já nācachi tucu Jesús já xihín ná:

—Ná coo vāha ini ndó. Tá quiahva nācaja Ndióxi, tátá i nāchindahá a yehe ñuyívī yóho quiahva já chindahá ri yehe va ndohó cūhūn ndo caxi tūhūn ndó xihín ñayivi saha mí i —nācachi Jesús.

²²Anda já nātivi a nu ná já nācachi a já xihín ná:

—Ndiqhehe ndó ínimā yīi Ndióxi. ²³Ta tá ná cāhnu ini ndó sahá cuachi ñayivi, nā cán cúú nā sa nācaja cāhnu ini Ndióxi saha. Ta tá ná a cāja cāhnu ini ndó sahá cuachi, nā cán cúú nā coo nācaja cāhnu ini Ndióxi saha —nācachi Jesús.

Tá naxini xihín nuu Tomás Jesús

24 In táhan da naxica tuun xihín Jesús, da naní Tomás, da cáhan na cuatí xihín cán, coó toho da nasahiin xihín na cán tá naquixi Jesús nu ndúu na.

25 Tá nandihi já nacaxi tuhun na java cán xihín dá já nacachi na já:

—Naxini nde Jesús, xitoho í —nacachi na.

Já nanducú ñehe Tomás tuhun nu ná já nacachi da já xihín ná:

—A cándusa toho i ña cáchí ndo janda quiahva ná cuni xihín nuú i ndáha Jesús ta já jáquihvi i nducu ndahá i ini yávi nuú naquihvi clavo nacaja na cán. Ta xíní ñúhú jáquihvi i nducu ndahá i ini yávi nacaán na yicá ndicá a cán. Anda jáví candúsa i ndohó —nacachi da.

26 Tá nayaha una quivi já nandique táhan tucu na naxica tuun xihín Jesús cán ini in vehe. Ta mé tañu já nasahiin Tomás xihín ná. Ta quiahva já nasaji tuun tucu na yéhe vehe nu ñúhu na cán. Anda já in cuití naxinu coo Jesús nu ná ta nandaca ndichi a mahñú na cán ta nacahan Ndióxi á xihín ná já nacachi a já xihín ná:

—Ná coo vaha ini ndó —nacachi a.

27 Tá nandihi já nacachi a já xihín Tomás:

—Naha quíi jáquihvi nducú ndáhun ini ndahá i ta candehé ini ndahá i nuú naquihvi clavo. Ta jáquihvi nducú ndáhun yicá ndicá i já ná cunún nuú najándicuehe na yehe. A cáhvi ivi joho inún jáchi xíní ñúhú candúsún yehe —nacachi Jesús.

28 Anda já nacatontó Tomás já nacachi da já:

—Mé ndó cúu xitoho i ta cúu ndó Ndióxi ña cája cáhnu i —nacachi da.

29 Anda já nacachi Jesús já xihín dá:

—Mé a ndaa cándúsún yehe viti jáchi naxinún yehe. Joo cajii ini ñayivi, na cándusa yehe vatí coó i xíní na xihín nuu ná —nacachi Jesús.

Cáhan Juan ndá sahá nacahyí da libro yóho

30 Cuahá ndivaha java ga ña xituhún nacaja Jesús nuú na naxica tuun xihín a cán vatí co ná cahyi a nu libro yóho. 31 Joo ña yóho nacahyi a já ná candúsa ndó ña cúu Jesús da nachindahá Ndióxi cacomí cuéntá sahá ñayivi, mé a cúu in túhún jiní já jahyi Ndióxi. Ta sahá ña cándeé ini ndó mé á cuu catacu ndó anda ama cáa quivi.

Náha Jesús mé á nuú usa táhan na naxica tuun xihín a cán

21 Tása nayaha ña yóho já nanaha tucu Jesús mé á nuú na naxica tuun xihín á nani nasanduu na yati yuhú tañuhú naní Tiberias cán. Ta quiahva joho nasahiin a. 2 In tañu ndúu tútú Simón Pedro xihín Tomás, da cáhan na cuatí xihín cán. Ta jári ndúu Natanael, da ñuu Caná cuéntá

Galilea cán xihín ndíví da cúú jahyi Zebedeo cán. Ta nasanduu ri inga ivi ga táhan da naxica tuun xihín Jesús. ³Anda já nacahan Simón Pedro xihín tóco ndihi na cán já nacachi da já xihín ná:

—Cuhun i tavá i tiyacá —nacachi da.

—Cuhun ri ndehe va tavá nde tiyacá xuhun —nacachi na cán xihín dá.

Já nandihvi ndihi na ini barco cuahan na tavá na tiyacá. Joo coó tiyacá natavá na mé ñuú cán. ⁴Ta tá sa cuahan ndúcú tìvi já nacanaha Jesús yuhú ticuú cán. Joo na naxica tuun xihín a cán co xini na ña cúú á Jesús. ⁵Anda já nacayuhú Jesús ndáca tuhún á na já nacachi a já xihín ná:

—Á coó toho tiyacá natavá ndo, ñani —nacayuhú a.

—Coó mé rí ná tavá nde —nanducú ñehe na tuhun nu á.

⁶Anda já nacachi tucu Jesús já xihín ná:

—Jácana tucu ndó ñunu ndó chí xoo cuáha barco jan já tavá ndó ri —nacachi a.

Anda já najácana na ñunu ná cán xoo cuáha barco ta tá nandihvi chí co ndéé na tavá na ñunu cán jáchi a juú quiahva nachutú ndaa ña xihín tiyacá. ⁷Anda já nandicahan yehe, da quihvi ndivaha ini mé a cán já nacachi i já xihín Pedro:

—Cúú á Jesús, xitoho í —nacachi i.

Tá naxini johó Simón Pedro ña cúú a cán Jesús já nandicandixi da cotó da jáchi coó toho cotó da ndíxi da, nduu. Tá nandihvi já ndáva da cuahan da jitá da ticuú chí yuhú tañuhú cán. ⁸Tá nandihvi já naxinu coo java ga na naxica tuun xihín Jesús cán xihín barco na chí yuhú tañuhú já ñuhu na ñunu nachutú xihín tiyacá cán nasaa na janda yuhu. Jáchi tátuhun in ciento metro nasandichi barco na yuhú tañuhú cán tá natavá na tiyacá. ⁹Tá naxinu coo na cán nu ñuhu já naxini na cáyi ñuhu. Ta naxini na cánúu in tiyacá yáta rí nu ñuhu cán. Ta naxini na ña sa íin pan cuxu na viti. ¹⁰Anda já nacachi Jesús já xihín ná:

—Taxi ndó java tiyacá, rí jacá natavá ndó jan —nacachi a.

¹¹Anda já ndáva Simón Pedro nasahan da nandaa da jata barco cán já ñuhu da ñunu, ña nachutú ndaa xihín tiyacá nahnú cán, naxinu da janda yuhu. Ta nasacuu rí in ciento ivi jico sahun uni. Ta vatí cuaha ndivaha cúú rí coó natahnda ñunu nuú nasañuhu rí cán. ¹²Anda já nacachi Jesús já xihín ná:

—Naha ndó cajini ndó —nacachi a.

Ta ni in tuhún na cán coó nasahan ndéé ini na ndaca tuhún na yo cúú mé á. Jáchi sa nacandaa cáxi ini na ña cúú á Jesús, xitoho na. ¹³Tá nandihvi já natiin Jesús pan cán já nasahnda java ña já nasahan ña nu ná. Ta quiahva já nacaja ri a xihín tiyacá va, nandicahnda ri já nasahan rí nu ná.

¹⁴Xihín ña yóho naxinu uní tañu nanaha Jesús mé á nuú na naxica tuun xihín á janda naní nanditacu tucu a.

Cáhan Jesús xihín Simón Pedro

¹⁵Tá nandihi naxijini na já nandaca tuhún Jesús Simón Pedro já nacachi a já xihín dá:

—Simón, da cúu jahyi Jonás á quíhvi ini chágún yehe a juú ga na java yóho —nacachi a.

Já nacachi da cán já:

—Mé ndó cúu ndó xitoho i ta sa xini vaha ndó ña quíhvi ini i ndohó —nacachi da.

Já nacachi Jesús já xihín dá:

—Xíní ñúhú candaa vahún na cúu cuénta mí i tá quiahva ndáa vaha pastó ndicachi válí jana dá —nacachi a.

¹⁶Anda já nacachi tucu Jesús já xihín dá:

—Simón, da cúu jahyi Jonás, á quíhvi inún yehe —nacachi a.

Anda já nacachi da já xihín á:

—Mé ndó cúu ndó xitoho i ta cándaa vaha ini ndó ña quíhvi ini i ndohó —nacachi da.

Já nacachi Jesús já xihín dá:

—Xíní ñúhú candaa vahún na cúu cuénta mí i tá quiahva ndáa vaha pastó ndicachi jana dá —nacachi a xihín dá.

¹⁷Anda já nandaca tuhún tucu a da táhnda uní já nacachi a já xihín dá:

—Simón, da cúu jahyi Jonás, á mé a ndaa quíhvi inún yehe —nacachi a.

Tá naxini mé Simón Pedro cán ña naxinu uní táhnda ndaca tuhún Jesús da sahá ña yóho já nacacuéha ini da já nacachi da já xihín Jesús:

—Jesús, mé ndó xini vaha ndó tóco ndihi ñaha. Mé ndó xini vaha ndó ña quíhvi ini i ndohó —nacachi da.

Já nacachi Jesús já xihín dá:

—Xíní ñúhú candaa vahún na cúu cuénta mí i tá quiahva ndáa vaha pastó ndicachi jana dá. ¹⁸Jáchí mé a ndaa ná cahan i xuhun. Tá nasacuún taa yúta chá já ndicandisún jáhmün ña cúnun ta já cuahún ndá nu cuni mún cuhun. Joo tá ná cayatún já jácaún ndáhun ta inga na jácandixi yohó jáhmün. Ta já tiin ndaa na yohó cuhún xihín ná nuú co cuni mún cuhun —nacachi a.

¹⁹Xihín ña yóho cuni Jesús ndicani a nu Pedro cán ndá quiahva quivi da ña ná caja cáhnu da Ndióxi. Tá nandihi já nacachi Jesús já xihín dá:

—Xíní ñúhú candicún yehe —nacachi a.

Ndáca tuhún Pedro sahá Juan nu Jesús

²⁰Nani xíca na cása_{han} na xihín Jesús já nandicoto nihni Pedro chí jata dá já naxini da tácaa Juan vaxi da. Mé Juan yóho cúú dá da quíhvi ndivaha ini mé Jesús. Ta sa mé Juan yóho cúú yehe, da nasahin coo jín á tá naxijini na vicó pascua. Ta cúú yehe, da nandaca tuhún mé á sahá ndá da cúú da jicó tuhún ñahá. ²¹Tá naxini Pedro ndíco da yóho jata ná já nandaca tuhún da Jesús já nacachi da já xihin á:

—Ta ndaja coo Juan yóho, xitoho i. Ndaja quivi da —nacachi Pedro.

²²Anda já nanducú ñehe Jesús tuhun nu dá já nacachi a já xihin dá:

—Tá cúní yehe ña ná catacu da janda quiahva ná xinu coo quiví ndicó coo i ñuyiví yóho, co ndítahan toho ndihi inún sahá. Ña ndítahan cajún quéa candicún yehe —nacachi a.

²³Ta sahá ña nacachi Jesús ña yóho sahá ña cán quéa nandicuita nuu tuhun tañu tóco ndihi na naxica tuun xihín Jesús cán. Ta cáchí na sahá i ña a quiví toho i. Joo a juú toho ña yóho quéa cúní Jesús cachi a xihin ná. Ña nacachi Jesús quéa tá cúní mé á catacu u janda quiahva ná ndicó coo mé á, co ndítahan toho ndihi ini Pedro sahá ña cán.

²⁴Ta jivi mé da cáhan na sahá cán cúú yehe, da cáhyí tóco ndihi ña yóho. Ta tóco ndihi na xini na ña cúú á ña ndaa.

²⁵Cuahá ndivaha nuú ñaha nacaja chága Jesús. Tá ná cacu ini i cahyí i tá in tá in ña nacaja mé á, cája i cuénta a quéta toho ñuyiví yóho coo libro cahan sahá ña nacaja mé á. Já ná coo.